

四庫全書

經部

欽定四庫全書

儀禮經傳通解續卷四

宋 黃幹 撰

士虞禮四

喪禮三

鄭目錄云虞安也士既葬父毋迎精而反日中而祭之於殯宮以安

之虞於五禮屬凶 疏曰案此經云側亨於廟門外之右又記云陳牲于廟門外皆云廟目錄云祭之殯

宮者廟則殯宮也故鄭注士喪禮凡宮有鬼神曰廟以其虞卒哭在寢祔乃在廟是以鄭注喪服小記云

虞於寢祔於祖廟是也

經十四

士虞禮

右篇目

記士三虞

詳見喪大記虞祭條

始虞用柔日再

虞如初三虞卒哭他用剛日

詳見本篇饗神條

既封主

人贈而祝宿虞尸既反哭主人與有司視虞牲有

司以几筵舍奠於墓左反日中而虞葬日虞是日

也以虞易奠

詳見喪禮義

婦之喪虞卒哭其夫若子

主之祔則舅主之

婦謂凡過婦庶婦也虞卒哭祭婦非舅事也祔於祖廟尊者宜

主焉疏曰婦之喪虞卒哭其夫若子主之者虞與卒哭其在於寢故其夫或子則得主之祔是祔

於祖廟其事既重故舅主之婦之所祔者則舅之母也

### 凡主兄弟之喪

### 雖疏亦虞之

喪事虞祔乃畢疏曰凡主兄弟之喪雖疏亦虞之者此疏謂小功總麻

喪事虞祔乃畢雖服總小功之疏彼既無主故疏總小功者亦為之主虞祔之祭案小記云大功者

主人之喪有三年者則必為之再祭鄭注云小功總麻為之練祭可也與此不同者彼承大功有三

年者此則總小功有三年者故至小祥也今此言疏者亦虞但虞者謂無服者朋友相為亦虞祔也

故熊氏云主喪者於死者無服謂袒免以外之兄弟云喪事虞祔乃畢者經云虞而注連言祔者以

祔與虞相近故連言之離記

### 士祭不足則取於兄弟大功以

### 下者

詳見喪大記虞祭條

### 虞沐浴不櫛

櫛莊乙反沐浴者將祭自潔清不



櫛未在於飾也唯三年之喪不櫛期  
以下櫛可也今文曰沐浴本經記

凡喪小功

以上非虞祔練祥無沐浴

言不有飾事則不沐浴疏曰凡居喪之禮自

小功以上恩重哀深自宜去飾以沐浴是自飾故  
不有此數條祭事則不自飾言小功以上則至斬

同然各在其服限如此耳練祥不主大功小功也  
若三年之喪虞祭之時但沐浴不櫛故士虞禮云

沐浴不櫛鄭注云唯三年之喪不櫛期以下櫛可  
也又士虞禮云明日以其班祔沐浴櫛搔翦注云

彌自飾此雖士禮明大  
夫以上亦然雜記

自天子達於庶人喪從

死者祭從生者

詳見士喪  
禮篇目下

父為大夫子為士祭

以士父為士子為大夫祭以大夫

詳見士喪  
禮下室條

報

葬者報虞三月而后卒哭

報請為赴疾之赴謂不及期而葬也既葬即虞

虞安神也卒哭之祭待哀殺也疏曰此一節論不得依常葬之禮也赴猶急疾也急葬謂貧者或

因事故死而即葬不得待三月也急虞謂亦葬竟而急設虞虞是安神故宜急也三月而后卒哭者

雖急即虞而不即卒哭猶待三月卒哭所以然者卒哭是尊於哀痛故不忍急而待哀殺也喪服

小記

並有喪虞先重而後輕

詳見喪變禮並有喪條

父母

之喪偕先葬者不虞祔待後事其葬服斬衰

詳見喪服

變除並有喪變服條

父母之喪將祭而昆弟死既殯而祭

如同宮則雖臣妾葬而后祭祭主人之升降散等

執事者亦散等雖虞祔亦然

詳見卒哭祔練祥禫記練條

朋

友虞祔而已

詳見變通禮主後條

朋友虞祔而退

詳見巾禮會葬

特豕饋食

饋其位反饋猶歸也

疏曰左氏傳云卜

牢故云少牢此虞為喪祭又葬日虞故略無卜牲之禮故以承體而言不云牲大夫以上亦當然雖記云大夫

之虞也損牲又此下記陳牲于廟門外檀弓云與有司視虞牲皆言牲者記人之言不依常例故也然少牢云

司馬到羊士擊豕不言牲者指事而言也云饋猶歸者謂以物與神及人皆言饋是以此虞及特牲少牢皆言饋

坊記云父母在饋獻不及車馬是生死皆言饋又云饋者上下通稱陽貨饋孔子豚鄉黨云朋友之饋膳夫王

之饋食用六設其實通也

側亨于廟門外之右東面

亨皆反反劉廙兩反注同側

亨亨一胖也亨於爨用鑊不於門東未可以吉也是日  
也以虞易奠祔而以吉祭易喪祭鬼神所在則曰廟尊  
言之 胖音判鑊戶郭反 疏曰案吉禮全左右胖皆  
云亨不云側此云側亨明亨一胖而已必亨一胖者以  
其虞不致爵自獻賓以俊則無主人主婦及賓已下之  
組故唯亨一胖也若然持牲亦云側殺者彼雖亨左右  
胖少牢二特牲一故以一牲為側各有所對故也云亨  
於爨用鑊者案少牢有羊鑊故亨在鑊云不於門東未  
可以吉也者持牲吉禮鼎鑊皆在門東此云廟門外之  
右是門之西未可以吉也云是日也以虞易奠祔而以  
吉祭易喪祭此檀弓文謂立尸而虞以易奠也云祔而  
以吉祭易喪祭者案下記云三虞卒哭他用剛日亦如  
初曰哀薦成事鄭注亦引檀弓文是日也以吉祭易喪  
祭如是則卒哭即是吉祭而鄭此注云祔為吉祭者卒  
哭對虞為吉祭卒哭比祔為喪祭故下記卒哭祭乃饌  
云尊兩甒于廟門外之右少南水尊在酒西洗在尊東

南水在洗東匯在西注云在門之左入少南則鼎鑊亦在門左以此知卒哭對虞為吉祭也又云明日以其班祔用專膚為折俎取諸脰膾其地如饋食是祔乃與特牲吉祭同是以云祔而以吉祭易喪祭也鬼神所在則曰廟尊言之者廟與寢別今以既葬迎魄而反神還在寢故以寢為廟

魚腊饔亞之北上

饔饔上則次在豕鼎之北而云饔饔者周公經為饔至孔子時為饔故王孫賈問孔子曰寧媚於竈是前後異名故鄭舉後決前也

饔饔在東壁西面

饔饔尺志反炊黍稷曰饔饔北上上齊於屋宇於虞有亨饔之饔彌吉疏曰以三饔在西方反吉案特牲云

主婦視饔饔于西堂下宗婦主之在西方今在東亦反吉也少牢虞饔饔饔牲饔同在門外東方也周禮饔人云掌凡祭祀共咸即黍稷也云北北上齊于屋宇者此案特牲記云饔饔在西壁鄭注云西壁堂之西牆下高

說云南北直屋。栳稷在南，彼此東西皆言壁。彼云屋栳，此云屋宇，故知此亦齊屋也。云於虞有亨饌之饌，彌吉者，以其小飲，大飲未有泰稷。朔月薦新之等，始有泰稷，向吉仍未有饌，至此始有亨饌之饌，故云彌吉。設

洗于西階西南水在洗西，籩在東

反吉也。亦當西，榮南北以堂深。疏曰：上

文設饌反吉，此亦反吉。吉時設洗，皆堂東，榮南北以堂深，可知也。尊

于室中北墉下，當戶兩甌醴酒。酒在東，無禁，寡用絺布

加勺南枋

冪亡狄反。酒在東，上醴也。絺布，葛屬。疏曰：酒在東，上醴也。者，吉禮，玄酒在酒上，今以

喪祭禮，無玄酒，則醴代玄酒，在上，故云上醴也。云絺布，葛屬者，絺，綌以葛為之，布則以麻為之。今絺布並言，則此麻葛離故有兩疏。是以鄭云葛屬也。素几葦席在西序下

有儿始。鬼神

几席具有注唯云几者以其大歛奠時已有席至此虞祭乃有几故也然天子諸侯始死則几筵具周禮司几

筵云每煮一几是始死即几席具也 苴刊茅長五寸束之實于籩饌于西

玷上

苴子餘反劉子都反下及記同刊七本反 苴猶藉也 藉在夜反後皆同 疏曰此苴而云藉祭

故易云藉用 饌兩豆菹醢于西楹之東醢在西一鉶亞

之

醢在西南面取之得左取菹右取醢便其設之 婢面反後放此 疏曰此饌繼西楹言之則以西楹

為主向東陳之云一鉶亞之者菹以東也云醢在西南面取之得左取菹右取醢便其設之者以其尸在與東

面設者西面設於尸前菹在南醢在北今於西楹東饌之菹在東醢在西是南面取之得左取菹右取醢至尸

前西面又左菹 從獻豆兩亞之四邊亞之北上 豆從主人獻祝

籩從主婦獻尸祝北上菹與棗不東陳別於正  
列反疏曰此從獻豆籩雖文承一銅之下而云亞之  
下別云北上是從銅東為次宜於銅東北以北為上  
向南陳之若然文承一銅下而云亞之者以其次在銅  
以東去楹漸遠故云亞不謂亞銅以東也據此陳之次  
然則東北菹為首次南醢醢東棗北棗棗東棗棗南  
栗此以東面取之而入北而設之祝前得右菹左醢其  
籩亦然先陳者先設後陳者後設棗在左亦得其設故  
鄭云北上菹與棗也云豆從主人獻祝者以其尸前正  
豆已設訖以為陰厭不名為從此二豆主人先獻祝酒  
後乃薦豆故言從云籩從主婦獻尸祝者以其四籩二  
籩從主婦獻祝亦是從也云不東陳別於正者以二豆  
與銅在尸為獻前為正此皆  
在獻後為非正故東北別也  
**饌黍稷二敦于階間西上**  
**藉用葦席**  
敦音對劉又都愛反後放此藉猶薦也古  
文藉為席疏曰謂先陳席乃陳黍稷於上



是所陳鼎藉薦黍稷也

匱水錯于槃中南流在西階之南簾布在

其東

匱音移錯音七

匱吐水口也

陳三鼎于門外之右北

面北上設局鼎

門外之右門西也

今文局為鉉鉉立

後知者案士喪禮小斂云右人左執七抽局予左手兼執之取鼎委于鼎北加局則局在鼎上故先抽局後去

鼎則鼎先設可知局鼎雖在三鼎之下總言其實陳一鼎訖即設之知者案下記云皆設局鼎注云嫌既陳乃

設局鼎是也

七俎在西塾之西

不饌於塾上統于鼎也

疏曰云不饌於塾上統于鼎也者決下文羞燔俎在西塾上又云賓降反俎于西塾至于主婦亞獻訖直

云賓燔從如初明尸受燔訖賓羞燔俎在內西塾上南

順燔音煩南順於南面取  
縮執之便也肝俎在燔東

右陳饌具 記虞而立尸有几筵

疏曰有几筵者未葬之前殯宮

雖有醢醢之奠不立几筵其大斂之奠雖在殯宮但有席而已亦無几也此席素席故前云奠以素器其下室之內有吉几筵今葬訖既設虞祭有素几筵筵雖大練之時已有至於虞祭更立筵與几

相配檀弓

陳牲于廟門外北首西上寢右

言牲在牲中

西上變吉寢右者當升左胖也腊用於檀弓曰既反哭主人與有司視虞牲 疏曰知腊在牲中者

士虞唯有一豕而云西上明知兼兔腊得云西上也云西上變吉者案少牢二牲東上今此西上是變吉也云寢右者當升左胖也者特牲腊在東置於於東首牲在西尚右今虞禮反吉故寢右升左

肱知腊用於者案持牲陳鼎于門外北面日中而

行事

朝葬日中而虞君子舉事必用辰正也再虞三虞皆質明疏曰云辰正者謂朝夕日中

也以朝有葬事故云日中而行虞事也云再虞三虞皆質明者以朝無葬事故皆質明而行虞事也

殺于廟門西主人不視豚解

主人視牲不視殺凡為喪事略也豚解

前後腰脊膏而已熟乃體解升於鼎也今文無廟疏曰特牲饋食禮風興主人立于門外東方南

而視側殺然則特牲吉祭故主人視牲又視殺今虞為喪事故主人視牲不視殺是其略也解前後

腰脊膏而已熟乃體解升於鼎也者體解下文七體是也羹飪升左肩臂臠肫

骼脊脅離肺膚祭三取諸左臚上肺祭一實于上

鼎

臠而甚反臠乃報反臠音純又之脊反臠音格  
臠音益肉謂之羹臠熟也脊脊正脊正脊也

喪祭略七體耳離肺舉肺也少牢饋食禮曰舉肺  
一長終肺祭肺三皆判臠臠肉也古文曰左股上

字從肉從爰爰予之爰聲受予上音殊下莫侯  
反疏曰持牲云不貶正脊不奪正也然則此為

長祭體數雖略亦不奪正故知脊脊正脊正脊也  
又持牲尸俎右肩臂臠肫肫正脊二骨橫脊長脊

二骨短脊注云士之正祭禮九體貶於大夫有併  
骨二亦得十一之名合少牢之體數此所謂放而

不致者然則此所升唯七體故云喪祭略七體耳  
又持牲注云離猶搯也小而長午剗之亦不提心

謂之舉肺是也引少牢饋食禮者證離肺舉肺之  
異又少牢云雍人倫膚于一鼎注云倫擇也膚脊

革肉擇之取美者衆下注今以臠肉貶  
於純吉則此用臠為貶於純吉之事也升魚鱠鮓

九實于中鼎

轉市專反又市轉反鮒音附差減之疏曰特牲魚十有五今為喪祭

略而用九故云差減之也

升腊左脾髀不升實于下鼎

髀反又方

爾反腊亦七體牲之類

疏曰上文升左肩臂

記云腊如牲骨是也皆設局鼎陳之

嫌既陳乃設局鼎也今文局作鉉古文鼎作密

設局鼎故記人辨之皆先局鼎後陳之也

本經言

記

鉶芼用苦若薇有滑夏用葵冬用苴有杞

音薇

微苴音凡

苦若茶也苴苴類也乾則滑夏秋用生葵冬春用乾苴古文苦為枯今文或作芼茶

音徒堂音謹枯如字又音姑劉本作枯音先古反疏曰案公食記三牲具則牛豢羊苦豕薇各用

其一若一牲者容兼用其二是以及特牲一豕皆云銅芼若薇是料用其一也知苴苴類者內則云苴苴粉榆同為滑物故知苴苴類也云乾則滑者以其冬用故知乾則滑于苴也云夏秋用生葵冬春用乾苴者以其秋與夏同有生葵春初未生者故春得與冬同是以經直云冬明舉夏以兼秋舉

冬以兼春也

豆實葵菹菹以西羸醢邊棗烝栗擇

羸力禾反

藤也 棗烝栗擇則菹刊也棗烝栗擇則豆不揭邊有

斂云駢豆兩其實葵菹芋羸醢兩邊無藤布巾其實栗不擇脯四脰自大斂後皆云如初則莽奠四

豆脾析葵菹亦長矣四邊棗糗栗脯亦不擇也至此乃云棗烝栗擇則菹亦切矣豆邊有飾可知

同上 陳小斂奠條烝畢用棗大祝俎髀脰脊

脅離肺陳于階間敦東

不升於鼎賤也統於敦神惠也祭以離肺下尸

下尸嫁反

疏曰云不升於鼎賤也者祝對上尸

組羹飪升於鼎為賁者也云統於敦明神惠也者

案上文饌黍稷二敦于階間西上是神之黍稷今

陳祝饌于神饌之東統于神物明惠由神也云祭

以離肺下尸者以其尸祭用剗肺祝不

用剗肺用離肺故云下尸也本經記

主人及兄弟如葬服賓執事者如弔服皆即位于門外

如朝夕臨位婦人及內兄弟服即位于堂亦如之

臨力反

下同葬服者既夕曰丈夫髻散帶垂也賓執事者賓客來執事也髻側瓜反散悉但反疏曰丈夫髻散

帶垂者始虞與葬服同三虞皆同至卒哭卒去無時之哭則依其喪服乃變麻服葛也賓客皆執事者以其虞

為喪祭主人未執事故云賓客來執事也案特牲賓中有公有司鄭注云士之屬命於其君者也又曾子問士則朋友莫不足則取於大功以下又云士祭不足則取於兄弟大功以下鄭云祭謂虞卒哭時以此而言則公官亦為朋友也祝免澡葛經帶布席于室中東面右几

降出及宗人即位于門西東面南上

免音問注同澡音祝亦執事免

者祭祀之禮祝所親也澡治也治葛以為首經及帶接神宜變也然則士之屬官為其長弔服加麻矣至於既卒哭主人變服則除右几於席近南也為其于偽反下為神同長丁文反下文并注同近南附近之近後攷此疏曰喪服小記云總麻小功虞卒哭則免今祝是執事屬吏之等皆無免法今與總以上同著免嫌其太重故云祭祀之禮祝所親而可以受服也



右門外位

宗人告有司具遂請拜賓如臨入門哭婦人哭

臨朝哭疏

曰朝夕哭時門外送賓記入門男子婦人共哭也

主人即位于堂衆主人及兄

弟賓即位于西方如反哭位

既夕曰乃反哭入門升自西階東南衆主人堂下東

面北上異於朝夕疏曰此明賓將與祭主人及兄弟等即位之事祝入門左北面

不與執事

同位接神尊也疏曰執事即上兄弟賓即位于西方如反哭位皆是執事故曾子問喪祭不足則取兄弟故

云祝不與執事同位接神尊也宗人西階前北面

當詔主人及賓之事疏曰此宗人在堂

下是主人在堂時若主人在室宗人即升堂是以下記云主人在室則宗人升戶外北面注云當詔主人室事

也是也

### 右門內位

祝盥升取苴降洗之升入設于几東席上東縮降洗解

升止哭

縮所六反 縮從也 古文縮為感 從子容反 下從井注同 感子六反 疏曰此論設饌於神

杖不入門之事也 案此文陰厭時主人倚杖入祝從在左 西面下記云尸入祝從尸注云祝在主人前也 嫌如

初時主人倚杖入祝從之初時主人之心尚若親存宜自親之 今既接神祝當詣脩尸也 主人前自西入向東

在階下未得倚杖序今主人倚杖入祝從在左 在西階將入室故倚杖於西序 主人倚杖入祝從在左

西面

倚於綺反 注下同 主人北旋倚杖西 序乃入喪服小記曰虞杖不入於室 贊薦菹醢

醢在北

主婦不薦我斬之服不執事也。曾子問曰：士祭不足，則取於兄弟大功以下者。疏曰：案特牲

主婦盥于房中，薦兩豆。此主婦不薦，故取於兄弟大功以下者，則齊斬不執事。可知此齊斬不執事，唯為今時

至于尸人之後，亦執事兩邊。棗設於龔南，至於祔祭雖陰厭亦主婦薦。主人自執事也。知者下記云：其它如

饋食，案特牲云：主人在右，及佐食舉牲鼎是也。若大夫以上尊不執事，故少牢云：主人出迎鼎。注云：道之也是

不執事也。佐食及執事盥出，舉長在左。舉舉鼎也。長在左，在西方位也。凡事宗人

之詔。鼎入，設于西階前，東面北上。匕俎從設，左人抽扃，鼎

匕佐食及右人載。載載於俎。佐食載則亦在右。夫今文扃為鉉，古文鼎為密。卒杙者

逆退復位。復賓位也。俎入，設于豆東。魚、亞之、腊、特。亞次也。今

贊設二敦于俎南黍其東稷

東稷以西上故云尊黍也

經云敦注言蓋者案特牲云佐食分蓋銅注云分蓋者分敦黍於會為有對也敦有虞氏之器也周制士用之變敦言蓋容同姓之士得從周制耳然則此設一銅于

豆南

此銅菜羹也此對黍是清羹

疏曰

佐食出立于户西

無于户西

疏曰佐食出者以無事不可以空立故出立于户西

贊者徹鼎

反于門外祝酌醴命佐

食啓會佐食許諾啓會卻于敦南復位

會古外反後放此會合也謂

敦蓋也復位出立于户西今文啓為開疏曰特牲少牢直言酌奠不言酌醴者以彼直有酒故不言酒是酒可知此酒醴兩有今所奠者醴故須言醴也若然彼單酒此兩有者以其同小敬大敬朔月遷祖祖奠大遣奠

等皆酒醴並有故此虞之祝奠解于鉶南復位復位人之

左疏曰云復主人之左者上主人倚杖入祝從在左右不見祝更有位故復主人左也

右設饌

虞杖不入於室祔杖不升於堂

哀益哀敬彌多

也虞於寢祔於祖廟疏曰此論哀殺去杖之節也案士虞禮虞於寢又案檀弓云明日祔于祖是

祔于祖廟也小記

載猶進祗魚進髻

髻臣之反猶猶士喪既夕言未可

以吉也祗本也髻脊也今文祗為祗古文髻為髻祗音帝疏曰髻祗二者皆變於吉是以少牢

云下利升承其載如羊皆進下注云變於食生也又曰腊上純而俎亦進下又曰魚用鮓十有五而

俎縮載右首進腴注云亦變於食生也是皆與此反矣是變於吉也云猶猶士喪既夕言未可以吉

也者云與吉反則明與生人同士喪禮小斂云皆覆進祇注云祇本也進本者未異於生也至大斂戴魚左首進髻膾進祇鄭注云亦未異於生也又葬奠云如初皆未異於生故記人以猶之是以鄉飲酒鄉射記皆云右體進膳是也本經記

### 主人在室則宗人升戶

外北面

當詔主人室事

疏曰上經唯言宗人告有司具及詔主人踊皆堂下之事今主人

入室宗人當升戶外詔主人室中之事故升堂也

### 佐食無事則出戶負依

南面

依於豈反注同

疏曰此爾雅文謂戶西南面也室中尊不空立戶牖之間

上同

### 主人再拜稽首祝饗命佐食祭

饗告神饗也此祭祭於直也饗神辭記所謂哀

子某哀顯相夙興夜處不寧下至適爾皇祖某甫饗是也相息亮反下文不相并注同疏曰下云祝祝卒

注云祝祝者釋存子祭辭又下文迎尸後尸墮祭云祝祝主人拜如初此等三者皆有辭此文饗神引記者是

陰厭饗神辭下文迎尸上釋孝子辭者經記無文衆少牢迎尸祝孝子辭云存孫某敢用柔毛剛鬣嘉薦普淖

用薦歲事于皇祖伯某以某妃配某氏尚饗此是釋存子辭此迎尸上釋存子辭宜與彼同但稱良為異其迎

尸後祝辭者即下記饗辭云良子某圭為而良薦之饗鄭注云饗辭勸強尸之辭也凡吉祭饗尸曰存子是

特牲迎尸後云祝饗注云饗勸強之也其辭取於士虞記則宜云存孫某圭為存薦之饗是也下二虞卒哭記

皆有辭至佐食許諾鉤袒取黍稷祭于苴三取膚祭祭彼別釋

如初祝取奠解祭亦如之不盡益反奠之主人再拜稽

首

鉤袒如今擗衣也。宜所以藉祭也。存子始將納尸以

也。則特牲少牢當有主象而無可乎。擗音惠。疏曰：鉤袒若漢時人擗衣以露臂，故云。如今擗衣也。云：設宜

以定之者，案上文祝取宜降洗，設于几東者，至此乃祭于宜下文，乃延尸是存子迎尸之前，用宜以將納尸以

事其親為神疑於其位，故設宜以定之。解預設宜之意也。或曰：宜主道也，似重為主道。然鄭破之云：若是宜為

主道，特牲少牢吉祭亦當有主象。亦宜設宜，今而無宜，是以宜為藉祭，非主道也。若然，此據文有尸而言將納

尸有宜，案下記文無尸者，亦有宜。又特牲少牢吉祭無宜，案司巫祭祀則共匱主爿，藉館常祀亦有宜者，以天

子諸侯尊者，禮備故吉祭。亦有宜，凶祭有宜可知。祝祝卒，主人拜如初，哭出復

位

祝祝劉下之又反。祝祝者，釋孝子祭辭。



右饗神

謂陰厭

周禮喪祝掌喪祭祝號

喪祭虞也

記

始虞用柔日

葬之日日中虞欲安之柔日陰取其靜疏曰葬之日日中者上文云日

中行事是也葬用丁亥是柔日葬始虞用日中故云始虞用柔日也曰哀子某哀顯

相夙興夜處不寧

相息亮反也喪祭稱哀顯相助祭者也顯

明也相助也詩云於穆清廟肅雍顯相不寧悲思不安思思似反敢用絜牲剛鬣

敢昧冒之辭永曰剛鬣昧冒上云北反下七報反疏曰敢昧冒之辭者凡言敢者皆是以卑觸

尊不自明之意云永香合本又作薌音同泰曰薌曰剛鬣者下曲禮文香合泰也大夫士於泰

稷之號合言普淖而已此言香合蓋記者誤耳解次泰又不得在薦上疏曰案下曲禮云泰曰香

合梁曰香冀稷曰明梁是也曲禮所云黍稷別號者是人君法特牲少牢黍稷合言普淖此別號黍為香合下特號稷為普淖故知記誤也依設薦法先設醢醢次設俎後設黍稷今黍在嘉薦之上此亦記者之誤故鄭非之也若然俎在後今繫牲嘉在黍上者祭以牲為主故先言非設時在前也嘉

薦普淖

普淖如存反劉徒較反嘉薦醢醢也普淖黍稷也普大也淖和也德能大和乃有

黍稷故以

明齊淲酒

齊才計反注同淲所求反醢為號云

淲釀此酒也郊特牲曰明水淲齊貴新也或曰當為明視謂免腊也今文曰明梁梁稷也皆非其次今文淲為醢疏曰鄭以淲水邊為之與縮字義異謂以新水漬麴乃淲釀此酒又引郊特牲明水淲齊貴新也者彼注云淲猶清也五齊濁沙之使清謂之淲齊及取明水皆貴新也據彼注明水則

周禮司烜氏所取月中之水與此明齊雖異直取新義同故引為證非謂為一物也云或曰當為明

視謂兔腊也今文曰明燊燊稷也皆非其次者謂若以明齊當為明視作兔腊解者應在上為次何

因退在下今文又為稷解者上已云普淖兼泰稷何用又見稷也故知二者皆非其次也

禘事

禘音合始虞謂之禘事者主欲其禘先祖也以與先祖合為安今文曰古事疏曰案

公羊傳大禘者何合祭也合先君之主於大廟故此鄭亦以禘為合但三虞卒哭後乃有祔祭始合

先祖今始虞而言禘者鄭云以與先祖合為安故下文云適爾皇祖某甫祖某甫是始虞預言禘之意也

適爾皇祖某甫

爾女也女死者告之以適皇祖所以安之也皇君也某甫皇祖字也

若言尼甫饗之也再虞皆如初曰哀薦虞事

丁日葬則

已日再虞其祝辭異者一言耳。疏曰已日再虞者以其後虞用剛日初虞再虞皆用柔日始葬用丁日隔戊日故知再虞用己日云一言耳者則一字也謂數一虞云祫再虞云虞三虞云成是也。

### 三虞卒哭他用剛日亦如初曰哀薦成事

當祔於祖廟為

神安於此後虞改用剛日剛日陽也陽取其動也士則虞日三虞壬日卒哭其祝辭異者亦一言耳。他謂不及時而葬者喪服小記曰報葬者報虞三月而後卒哭然則虞卒哭之間有祭事者亦用剛日其祭無名謂之他者假設言之文不在卒哭上者以其非常也。今正者自相亞也。檀弓曰葬日中而虞弗忍一日離也是日以虞易奠卒哭曰成事是日也以吉祭易喪祭明日祔於祖父如是虞為喪祭卒哭為吉祭。今文他為它。報葬禮記音步付反下同。令力呈反。離力智反。疏曰鄭云當

祔於祖廟為神安於此者却解初虞再虞稱祫稱  
虞之意今三虞改用剛日將祔於祖取其動義故  
也云士則庚日三虞士日卒哭者以其己日為再  
虞後改用剛日故次取庚日為三虞也卒哭亦用  
剛日故庚日後陽辛日取壬日為卒哭云他謂不  
及時而葬者謂有故及家貧不及三月因三日殯  
日即葬於國北引喪服小記者彼鄭注云報讀為  
赴疾之赴謂不待三月因殯日虞所以安神送形  
而往迎魂而反而殯安之故疾虞三月而後卒哭  
者鄭云卒哭侍哀殺故至三月侍尋常葬後乃為  
卒哭祭也云其祭無名謂之他者謂虞卒哭祔祥  
皆有名此則無名故謂之他文不在卒哭上者此  
他祭在卒哭上今退在卒哭下者以其非常又非  
祭故也引檀弓者證卒哭辭稱成事之義但卒哭  
為吉祭者喪中自相對若據二十八月後吉  
祭而言禫祭已前總為喪祭也 本經記

喪

稱哀子哀孫

詳見卒哭祔練祥禫記

祝迎尸一人哀經奉匱哭從尸

奉匱芳房反下芳鬼反本亦作匱從才用反

尸主也孝子之祭不見親之形象心無所繫立尸而主意焉一人主人兄弟檀弓曰既封主人贈而祝宿虞尸

兄弟者以主人哭出復位無從尸之理又云哀經是主人封彼驗反劉通鄧反疏曰鄭知一人哀經是主人

疏遠故知是主人兄弟也引檀弓者證祝隨尸入門丈主人葬先反宿虞尸故得有祝迎尸之事尸入門丈

夫踊婦人踊

踊不同文者有先後也尸入主人不降者喪事主哀不主敬疏曰主人在西序東

面眾兄弟西階下亦東西婦人堂上當東序西面故主人與兄弟見尸先踊婦人後見尸故後踊是有先後云

主哀不主敬者決特牲少牢尸入主人皆降立于阼階東敬尸故此不降為主哀  
淳尸盥宗人

授巾

淳章純反注下同 淳沃也沃尸盥者賓執事者也 疏曰此直言盥不言面位 祭特牲云尸入門

左北而盥宗人授巾上陳器時匱水之等在西階之東合在門左則以器就案特牲注云侍盥者執其器就之

云沃尸盥者賓執事者也 案上文賓與衆主人皆在執事之中既宗人授巾明沃盥亦賓執事也 尸及

階祝延尸

延進也告之以升 疏曰案特牲注云延進也 延在後 疏曰案特牲注云由後詔相

之曰延然則延者皆在後也 若然記云尸設祝前鄉尸又曰降階還及門如出戶注云降階如升時以此言之 降在尸前云以升者直取與尸升同 不取後同故禮器詔有無方是也 尸升宗人詔踊如

初言詔踊如初則凡踊宗人詔之 疏曰上文無宗人詔踊之事以此宗人詔踊云如初明前踊并明下文

踊皆宗人詔之 故鄭云凡也 尸入戶踊如初哭止 哭止 婦人入于房

辟執事者辟音避疏曰以其婦  
人在堂上執事者由堂東故避之也主人及祝拜安尸

尸拜遂坐

安他果反劉湯同反安安坐也疏曰案持牲注云尸即至尊之坐或時不自安則以

拜安之此亦然安坐也爾雅文

右迎尸記尸服卒者之上服

上服者如特牲士玄端也不以爵弁

服為上者祭於君之服非所以自配鬼神士之妻則宵衣耳疏曰上經直見主人服不見尸服故

記人明之案特牲經筵日云主人冠玄端至祭日夙興主人服如初是士之正祭服玄端即是卒者

生時所著之祭服故尸還服之云不以爵弁服為上者祭於君之服非所以自配鬼神者案曾子問

孔子曰尸弁冕而出卿大夫士皆下之注云為君尸或弁者先祖或有為大夫士者謂彼君之先祖



為士尸服爵弁不服玄端若子孫為諸侯先祖為士者尸還服助祭於君之服也云士之妻則宵衣耳者以其經直云尸不辨男女士虞既男女別尸故鄭并云士之妻也采特牲正祭主婦著纁筭宵衣明女尸亦

**男男尸女女尸必使異姓不使賤者**

異姓婦也賤者謂庶孫之妻也尸配尊者必使適也適丁狄反疏曰虞卒哭之祭男女別尸故

別言之也云異姓婦也者以男無異姓之禮故也經云必使異姓者據與婦為尸者也木使同姓孫與婦為尸孫婦還與夫之祖姑為尸故不得使同姓女為尸也云賤者庶孫之妻也尸配尊者必使適也者男尸先使適孫無適孫乃使庶孫女尸先使適孫妻無適孫妻使適孫妻又無妾乃使庶孫妻即不得使庶孫妾以庶孫之妻是賤之極者若然庶孫妻亦容用之而鄭云必使適也者據經不

使賤有適孫妻則先用適而言其實容用庶孫妻  
法也必知容用庶孫者以曾子問孔子曰祭成喪  
者必有尸尸必以孫孫幼使人抱之無孫則取於  
同姓可也彼不言適是容無適而用庶此經男女  
別尸據祭而言至卒哭已後自禫已前喪中之祭  
皆男女別尸知者祭司几筵云每敦一几鄭注云  
雖合葬及同時在殯皆異几體實不同祭於廟同  
几精氣合少牢吉祭云某妃配是男女共尸篇末  
云是月也吉祭猶未配注云是月是禫月也當四  
時之祭月則祭猶未以某妃配某氏哀未忘也則  
引少牢吉祭妃配之事為證明禫月不當尸入祝  
四時祭月則不云某妃配配則共尸可知尸入祝  
從尸之祝在主人前也嫌如初時主人倚杖入祝既  
接神祝當詔備尸也疏曰上經陰厭時主人先  
祝入戶至此迎尸祝在主人前先後有異故記人

明之也云今既接神祝當詣尸即上祝命佐食通教舉

黍稷及祝酌授尸及祝出告尸坐不說屨說他活反劉詩

脫反酒燕禮之等凡坐降說屨乃升堂今不說屨

者為侍神不燕情故也淳尸盥執槃西面執匱東面執巾在

其北東面宗人授巾南面槃以威棄水為淺污人也執巾不授巾卑也

淺音箭一音箭疏曰上經直云淳尸盥宗人授巾不云執槃與執匱執巾及宗人授巾等面位故

記人明之本經記祭成喪者必有尸尸必以孫孫幼則

使人抱之無孫則取於同姓可也人子有子孫為人子不場父

義由此也 疏曰以祭成人之喪者必須有尸以象神之威儀也

成人之喪威儀具備必須有尸以象神之威儀也 尸必以孫若其孫幼則使人抱之若無孫則取同姓昭穆孫行適者可也以其成人威儀既備有為

人父之道不可 無尸 曾子問

從者錯篚于尸左席上立于其北

北席北也 虞禮篚象特牲所俎

置于席北明此篚亦在席北以擬威尸之饌也

尸取奠左執之取菹孺于醢祭

于豆間祝命佐食墮祭

孺人悅反劉氏玄反又而誰反 墮許惠反又相惠反 下祭曰

墮墮之猶言墮下也周禮曰既祭則藏其墮謂此也今文墮為綏特牲少牢或為羞失古正矣齊魯之間謂祭

為墮 疏曰云尸取奠左執之者以右手將墮故也云下祭曰墮者以其凡祭皆手舉之向下祭之故云下祭

曰墮云墮之猶言墮下者案左傳云子路將墮三都以  
三都大高故墮下之取墮為下祭之義故讀從之引周  
禮守祧職云既祭藏其墮證守祧同之耳云今文墮為  
綏又云持牲少牢或為羞此二字皆非墮下之義是鄭  
從墮未從綏與羞之意也案特牲云祝命佐食墮祭周禮曰既  
祭祭神食也士虞禮古文曰祝命佐食墮祭周禮曰既  
祭則藏其墮墮與按同耳今文改按皆為綏古文此皆  
為搯祭也又少牢尸將酢主人時上佐食以綏祭鄭注  
云綏讀為墮此三處經中墮皆不同者此五字或為墮  
或為按或為羞或為綏或為搯此五者鄭既以按綏及  
羞三者已從墮復云古文作搯以其特  
牲及此士虞皆有搯祭故亦兼搯解

**祭授尸尸祭之祭奠祝祝主人拜如初尸嘗醴奠之**

初如

亦祝祝卒乃再拜稽首疏曰亦如佐食舉肺脊授尸  
上文迎尸前祝祝卒乃再拜稽首也

尸受振祭齊之左手執之

尸才計反。右手將有事也。尸食之時亦奠肺脊于豆。

疏曰案持牲祝命過敦佐食過黍搜于席上舉肺脊以授尸尸受振祭齊之彼舉肺脊在過敦後此舉肺脊在

過敦前者彼吉祭吉凶相變故也云右手將有事也者為下文祭銅嘗銅是也云尸食之時亦奠肺脊於豆者

解經無奠文知不執以食卒者案下文云尸卒食佐食受肺脊實于豆在尸手當云受肺脊又知在豆者特牲

云尸實舉于豆是也案特牲尸乃食食舉注云舉言食者明凡解體皆連肉少牢云食舉注云舉牢肺正脊

也先飯啗之以為道也此喪祭不言食舉亦食舉可知是以特牲注云肺氣之主也脊正體之貴者先食啗之

所以道食通氣也案下文注云尸不受魚腊以喪不備味則亦不食底羞矣祝命佐食邇敦

佐食舉黍錯于席上

通近

尸祭銅嘗銅

右手也少牢曰以柶祭羊銅逆

以祭承銅嘗羊銅疏曰上文佐食舉肺脊授尸尸受

振祭齊之左手執之鄭云右手將有事指此嘗銅用右

手也引少牢者證此經嘗祭之時亦用柶柶記云銅

用若若微有滑夏用葵冬用苴有柶是用柶祭之義芑

泰羹渚自門入設于銅南載四豆設于左渚去反載

異味也渚肉汁也載切肉也疏曰云設于銅南者以

泰羹渚未設故繼銅而言之其實解北雷空處以待泰

羹云載四豆設于左者案特牲四豆設於左南上云左

者正豆之左又少牢云上佐食羞載兩瓦豆有醢醢

薦豆之北注云設于薦豆之北以其加也言北

亦是左也云博異味者以其有渚有載故也

尸飯播

餘于籩

飯扶晚反注及下并下注九飯同不反餘也

古者飯用手者案曲禮云毋搏飯又云毋攷飯黍

曰古者飯用手者飯用手言此者證播飯去手為攷飯

毋以著故知古者飯用手言此者證播飯去手為攷飯

吉時播餘於會者可知

三飯佐食舉幹尸受振祭齊之實于籩

飯間

嚼肉安食氣

嚼大敢反

疏曰以其胙骨

又三飯

舉胙祭如初佐食舉魚腊實于籩

胙音格一音各尸不受魚腊以喪不備

味

疏曰佐食舉魚腊不云尸受齊之明尸不受魚腊可知云以喪不備味者索特牲三舉魚腊尸皆振祭齊

尸不齊故云喪不備味

又三飯舉肩祭如初

後舉肩者貴要

成也 疏曰祭統云周人貴肩故云

舉魚腊俎俎釋三

个

个古賀反 釋猶遺也 遺之者君子不盡人之歡不

亦七體如其牲也 個古賀反 疏曰此經直舉魚腊



左肩臂膊肱肱脊骨七體此上經佐食初舉脊次舉幹  
又舉髀終舉肩總舉四體唯有臂膊肱肱三者佐食即當  
組釋三個故直舉魚腊而已君子不盡人之歡不竭人  
之忠此曲禮文案彼注歡謂飲食忠謂衣服於此引之  
肝據飲食者彼注對文此注散文則歡與忠通故總證  
牲體也又案特牲注釋三個注云謂改饌于西北隅遺之  
與此注不同者此注亦有改饌之義又兼有此不盡歡  
忠之禮云此腊亦七體如其牲也者案記牲有七體此  
腊亦不過於性體故云如其牲言此以對彼案彼特牲  
吉祭十一體是以特牲記云腊如牲骨乃十一體與此  
不同吉禮

尸卒食佐食受肺脊實于簠反黍如初設

飯九

而已士禮也簠猶吉祭之有肝俎  
曰案上設黍稷在俎南西黍東稷次上文佐食舉黍  
于席上此尸卒食故反黍於本處如初設云九飯而已  
士禮也者少牢十一飯諸侯十三飯天子十五飯故九

飯士禮也。云：籩猶吉祭之有肝俎者，崇特牲少牢尸舉牲體振祭齊之，皆加於肝俎。此尸舉牲體振祭齊之，皆實於籩，故云：籩猶吉祭之有肝俎。

### 右獻尸

記饗辭曰：哀子某，主為而哀薦之饗。

饗辭

勸強尸之辭也。主潔也。詩曰：吉圭為饔，凡吉祭饗尸曰存子。疏曰：饗辭勸強尸之辭也。者，崇特牲禮迎尸入室，尸即席坐，主人拜安尸，尸答拜執奠祝饗，鄭云：勸強之也。其辭引此士虞記，則宜云：存孫某，主為存薦之饗。當此時為之，凡吉祭饗尸曰存子者，此一辭說三虞卒哭勸尸辭，若祔及練祥吉祭其辭亦用此，但改哀為存耳。故鄭云：凡以該之也。本經記。

主人洗廢爵酌酒酹尸，尸拜受爵，主人北面答拜，尸祭。

酒嘗之

醕以办反劉侯吝反醕酢變吉也凡異者皆變吉古

文醕作酌疏曰自此盡升堂復位論主人初獻尸并

洗足爵鄭云爵有足輕者飾也則主人喪重爵無足可

知凡諸言廢者皆是無足廢敦之類是也云主人北面

以醕酢變吉也者案特牲少牢尸拜受主人西面拜送

與北面相反故云變吉也特牲直有主人拜送雖不見

主人而位約與少牢同皆西面也云凡異者皆變吉者

案特牲云主人拜送此云主人答拜特牲云尸卒角祝

受尸角曰送爵此不云送爵特牲齊肝訖加於菹豆此

齊肝訖加於俎皆是異於吉時故云凡異者皆變吉此

賓長以肝從實于俎縮右鹽

長丁丈反下賓長皆同縮從也縮實肝炙於俎也

喪祭進祗右鹽於俎近北便尸取之也縮執俎言右鹽

則肝鹽併也炙支夜反祗丁計反後同併與項反

疏曰喪祭進祇者案下記云載猶進祇祇本也謂肝之本頭進之向尸云右鹽於組近北便尸取之也者縮肝之組一頭向尸據執組之人左畔有肝右畔有鹽西面向尸尸東面以右手取肝於組右畔擣鹽於左畔是以鹽於組之近北便尸取之云縮組言右鹽則肝鹽併也者謂組既縮執則狹肝鹽不容相遠是執組人右畔有鹽左畔有肝故云併也

尸左執爵右取肝擣鹽振祭齊之加于俎

賓降反俎于西塾復位

取肝右手也加于俎從其牲體也以喪不志於味疏曰復位

者謂賓長也尸既振肝訖復西階前衆兄弟之南東面位云喪不志於味者特牲少牢尸齊肝訖加菹豆以近身此虞禮尸齊肝訖不加于菹豆而遠加於俎以同牲體者以喪志不在於味故遠身加俎也若然特牲少牢祝不敢與尸同加於菹豆齊肝訖加於俎與此尸同者祝無不在於味之嫌禮窮則同故也

尸卒爵祝

欽定四庫全書

受不相爵主人拜尸答拜

不相爵喪祭於禮略相爵者持牲曰送爵皇尸卒爵

右主人酌尸

祝酌授尸尸以醋主人主人拜受爵尸答拜

醋才各反本亦作酢

報

醋

主人坐祭卒爵拜尸答拜

右尸醋主人

筵祝南面

祝接神尊也筵用萑席席其祝席經記雖不言以

疏曰上文尸用萑

萑今祝宜與平常同故用萑也云

主人獻祝祝拜坐受

爵主人答拜

獻祝因反西南位受酢時主人拜受爵

疏曰以少牢云主人

爵特牲云主人拜受角尸拜送主人退雖不言西面彼  
注云退者進受爵反位則西面也是吉祭時主人西面  
故上注云北面以醕酢變吉也今至醕  
酢及獻祝訖明因反西面位可知也  
薦菹醢設俎祝

左執爵祭薦奠爵興取肺坐祭齊之興加于俎祭酒嘗

之肝從祝取肝擣鹽振祭齊之加于俎卒爵拜主人答

拜祝坐授主人

今文無擣鹽 疏曰此直言薦菹醢設  
俎者不見薦徹之人案下文云祝薦席

徹入于房注云徹薦席者執  
事者則此設者亦執事可知

右主人獻祝

主人酌獻佐食佐食北面拜坐受爵主人答拜佐食祭

酒卒爵拜主人答拜受爵出實于篚升堂復位

篚在庭不復入

事已也亦因取杖乃東面立疏曰云篚在庭者此雖無文約同薦車設薦奠之等也云不復入事已也亦因取杖乃東面立者上文哭時主人升堂西序東面又上文云主人倚杖入今升堂復位不復入室以其事已因得取杖復東面位也

### 右主人獻佐食

主婦洗足爵于房中酌亞獻尸如主人儀

爵有足輕者飾也昏禮曰

內洗在北堂直室東隅直音值疏曰如主人儀者即上主人醕尸尸拜受爵主人北面答拜之等今主婦亞獻亦然故云如主人儀也云爵有足輕者飾也者主婦主人之婦為舅姑齊衰是輕於主人故爵有足為飾

也引昏禮者證經洗爵于房中  
不言設洗處宜與昏禮同也

自反兩邊棗栗設于會

南棗在西

尚棗栗美疏曰案特牲宗婦執兩邊主婦受  
設于執南此主婦自反兩邊不使宗婦者以喪

尚縱縱反害故然上主人獻使贊薦菹醢注云齊斬之  
服不執事者彼為主人獻故不使主婦薦此亞獻已有

所事故自  
薦可知

尸祭遵祭酒如初賓以燭從如初尸祭燭卒

爵如初

右主婦亞獻

酌獻祝遵燭從獻佐食皆如初以虛爵入于房

儀初主人疏

曰此尸祭遵已下至遵燭從獻佐食皆舉主人獻尸賓  
長以肝從至佐食祭酒卒爵拜主人答拜受爵出賓于



簾並如主人儀  
故皆云如初也

# 右主婦獻祝及佐食

賓長洗纒爵三獻燔從如初儀

纒於力反 纒爵口足之間有篆又彌飾 篆

大轉反 疏曰纒爵口足之間有篆又彌飾者案屨人纒是屨之身縫中之飾則此爵云纒者亦是爵口足之

間有飾可知云又彌飾以其主婦  
**婦人復位**  
復堂上西面位事已

尸將出當哭踊 疏曰自此盥拜稽顙論祭訖送尸及改饌為陽厭之事云復堂上西面位者上云主人即位

於門外如朝夕臨位婦人及內兄弟服即位於堂亦如之以下更不見別有婦人位明復位者還此位可知又

案士喪禮凡臨位婦人即位于堂南上即西面位也云尸將出當哭踊者以哭送此喪祭故踊持牲吉祭不哭

踊故亦無復  
位之事也

### 右賓長三獻

祝出戶西面告利成主人哭

西面告主人也利猶養也成畢也言養禮畢也不

言養禮畢於尸間嫌養予亮反下同疏曰云西面告主人也者以其處主人東面故祝西面對而告

之云不言養禮畢於尸間嫌者若言養禮畢即於尸中間有嫌諷去之或本間作閑音以養尸事畢而尸空開嫌諷去之或本間作閑音以養尸事畢而尸空開

去之

皆哭

丈夫婦人於主人哭則主人之外總麻以上在位者皆哭

故鄭總丈夫婦人於主人哭斯哭矣

### 右祝告利成

祝入尸謬

謬所六反起也

祝入而無事尸則知起矣

疏曰雖不告尸無事尸亦知無事禮畢而起矣不告尸以禮畢者尸尊若告之則如發遣尊者故云不告尸

者無違尊

從者奉篚哭如初

初哭

祝前尸出戶踊如初

降堂踊如初出門亦如之

前道也如初者出如入降如升三者之節悲哀同

導下前道道尸為道同

疏曰禁上文尸入門丈夫踊婦人踊尸及階祝延尸尸升宗人詔踊如初尸入戶踊

如初故此鄭云出如入降如升三者之節悲哀同是以如之得有三者也

右尸謬降

記尸謬祝前鄉尸

鄉許亮反下注同

必先鄉之為之節疏曰此記尸謬之時祝前尸之儀也云必先鄉之為之節者言必先而向尸者

為之節  
度也  
還出戶又鄉尸還過主人又鄉尸還降階

又鄉尸

過主人則西階上不言及階明主人見尸有蹴踏之敬  
蹴子六反踏子亦反疏

曰以其經出戶降階及門皆指物而言主人既在西階上不言西階而言主人者欲見主人見尸有

蹴踏之敬故改去降階還及門如出戶

及至也言還至門明

其間無節也降階如升時將出門如出戶時皆還向尸也每將還必有辟退之容凡前尸之禮儀在

此辟音避疏曰經自階已前皆不言及從階到門言及者以其自階到門其中道遠故特言及

以殊之是以鄭云言還至門明其間無節謂無還鄉尸之節也云降階如升時將出門如出戶時皆

還鄉尸也經直云及門如出戶雖不言降階如升時以將出門如出戶明降階如升時故鄭約出門

以明降階也云皆遠鄉尸者欲見經還者皆還鄉尸也謂鄉尸乃前道也云每將還必有辟退之容此者辟退即送巡謙讓之容也云凡前尸之禮儀在此經為具

悉者  
本經記

祝反入徹設于西北隅如其設也凡在南扉用席

未反扶

劉音非隱也改設終者不知鬼神之節改設之庶幾飲饗所以為厭厭也凡在南變古文明東面不南面漸

也扉隱也于扉隱之處從其幽暗厭一豔反饌於庶反疏曰祝反入謂送尸出門而反入徹神前之饌改

設于西北隅也云如其設也者謂設于西北隅次第一如與中東面設云凡在南變古文者上文陰厭時設凡

席于室中東面右几今文几在南明其同必變文者衆少宰大夫禮陽厭時南面亦几在右此言右几嫌與大

夫同南面而右几故變文云几在南與前在與同故云明東面也又以特牲云祝筵几于室中東面至於改饌

云佐食徹尸薦俎敦設于西北隅几在南是與此同也云不南面漸也者以特牲東面右几今虞為喪祭示向

吉有漸故設几與吉祭同非隱也于扉隱之處從其祝幽闇者謂以席為障使之隱故云扉隱從其幽闇也祝

# 薦席徹入于房祝自執其俎出

徹薦席者執事者祝薦席則初自房來疏曰

祝之薦席設與徹不言其人知使執事者以其主人之事不言官者皆為之故也上文神席在西序下此祝經

記俱不言今知自房來者見公食大夫記云筵出自房昏禮與士冠席皆亦在于房故此祝席亦自房來今還

于房可  
**贊闔牖戶**

鬼神尚居幽闇或者遠人乎贊佐食者疏曰云或者遠人者禮記郊

特牲文此鄭立之義非直取鬼神居幽闇或取遠人之意故也云贊佐食者自上以來行事唯有祝與佐食以

其云祝自執其俎出故  
知闔牖戶者是佐食也

右陽厭

記尸出祝反入門左北面復位

疏曰祝既送

尸出反入門復位上文祝入門左北面位故云復位也

然後宗人詔降

謂復位

宗人乃詔主人降以其無事故也本經記

主人降賓出

宗人詔主人降賓則出廟門

主人出門哭止皆復位

外門

未入位疏曰知是門外位者以經云出門乃更云皆復位明門外未入位可知

宗人告事畢

賓出主人送拜稽顙

送拜者明于大門外也賓執事者皆去即徹室中之饌者兄弟也

疏曰上文云復位是賓門外未出大門北云送拜是出大門送拜可知賓即執事而云賓出則室中無執事之

人唯有兄弟故徹室中之饌者兄弟可知也

### 右事畢

案經言立尸之禮記有無尸之文經載其常記述其變今附見于下

記無

### 尸則禮及薦饌皆如初

無尸謂無孫列可使者也禮謂衣服即位

升降尸謂無孫列可使者禮記云無孫則取同姓

之適則大夫士祭先取孫無孫取同姓之適是無孫列可使者也適是無

亦是也者禮記曾子問云祭成者必有尸明殤死無尸可知曾子問又云宗子直有陰厭底殤直

有陽厭是無尸也云禮謂衣服即位升降者雖無尸主人亦如葬所服即位于西序及升降與有尸

相既饗祭于苴祝祝卒記異者之節疏曰云既饗者正謂祝釋饗神辭告



之使令附之安之釋饗訖佐食取黍稷祭于苴云  
記異者謂記無尸者異於有尸何者有尸祝釋存  
子辭釋辭訖為祝祝卒別有迎尸已後之事故下文云  
尸者祝祝卒饗神訖無迎尸已後之事故下文云  
不綏祭之等是不綏祭無泰羹湑醢從獻不綏言  
記異者之節也  
始也事尸之禮始於綏祭終於從獻綏當為隨  
疏曰此四事皆為尸是以上文有尸者云迎尸而  
入祝命佐食綏祭有泰羹湑自門入設于鉶南獻  
四豆設于左又尸食之後主人獻賓長以肝從主  
婦亞獻賓長以醢從賓長獻亦如之無尸闕此四  
事自筮以下三事皆蒙無字解之云不綏言獻記  
終始也者以見綏無尸具陳四事凡祭禮以獻為  
終舉終以見始亦得為義今不但言獻記其終始  
具言四事者欲明始於綏祭終於從獻故具言之綏當為  
事尸之禮始於綏祭終於從獻故具言之綏當為

墮祭者周禮守祧職云既祭主人哭出復位於祝

藏其隨字為正取減為義主人哭出復位於祝

事主人遂即哭出復戶外東面位也祝闔牖戶

降復位于門西門西北面位者門西北面位者據上

文尸出祝反入門男女拾踊三拾其業反注下同

左北面復位也更音庚踊主婦踊賓乃踊三者三為拾也如食間隱之

謂闔牖戶也九飯之頃謂曰隱之者祝升止哭聲三

啓戶聲者噫歎也將啓戶驚覺神也今文啓為開

入者是主人親至祝從啓牖鄉如初鄉許亮反  
神所恭敬之事也

翦在內也鄉牖一名也如初者主人入祝從在左  
疏曰云鄉牖一名也者詩云塞向瑾戶注云鄉

北出牖也與此注不同者語異義同主人哭出復  
北牖名鄉鄉亦是牖故云牖一名也

位堂上位也疏曰案下文宗人詔降如初注云  
詔主人降之乃降堂明此復位者復堂上東面

也卒徹祝佐食降復位祝復門西北面佐食復  
也

重閉牖戶褻也重直用反疏曰鄭知祝與佐  
食位如此者見上經云主人即位于堂衆主人及

兄弟賓即位于西方佐食即賓也故知佐食言復  
位復西方可知知祝復位復門西北面佐食上經

祝入門左北面注不與執事同位接神尊也明此  
祝復位復門西北面位可知云重閉牖戶褻也者

上經有尸者有陰厭有陽厭無闔牖戶之事今無尸者陰厭時闔牖戶今更設饌于西北隅復更闔牖戶為藝漬故不為也

### 宗人詔降如初

初贊闔牖戶宗人詔主人降之疏曰降

謂禮畢降堂也上經云贊闔牖戶主人降賓出注云宗人詔主人降彼謂降堂故知此云如初亦如

上經詔降也

### 重既虞而埋之

反重直龍反埋亡皆

之疏曰案既夕禮初喪朝禭廟重止于門外之西不入重不入者謂將嚮祖廟若過之然故不入

明曰自禭廟隨至祖廟庭厥明將出之時重出自道道左倚之鄭注云適左主人位此注就所倚之

處埋之謂於祖廟門外之東也雜記

儀禮經傳通解續卷四

欽定四庫全書

經部

儀禮經傳通解續卷五

詳校官尚書臣德保

給事中臣溫常綬覆勘

總校官進士臣繆珙

校對官中書臣吳俊

謄錄舉人臣周克鵬

欽定四庫全書

儀禮經傳通解續卷五

喪大記上五 喪禮四之上

宋 黃幹 撰

補系喪大記本謂載篇自孔氏疏案鄭目錄云記人  
君以下始死至殯葬之事今儀禮正經喪既夕虞  
三篇所載惟士禮國之大喪以及諸侯大夫之禮皆  
缺禮經既缺而身處禁書者尤諱言凶事故雖崩薨  
大變臣子至痛而必裝斷絕及民庶之不若今以小  
戴篇名及本篇所述附以周禮禮記諸書載天子諸  
侯大夫之禮補為此篇列王之禮正經之後其先後  
次第之大畧並依士喪禮士喪禮有天子諸侯大夫

所通用者不復重出  
讀禮者所當互考也

大宗伯以喪禮哀死亡

哀謂親者服焉疏者含襚

朝覲會同則為上

相大喪亦如之

相詔王禮也出接賓曰擯入詔禮曰相者五人卿為上擯大喪王后及世子

也疏曰出接賓曰擯入詔禮曰相通而言之出入皆稱擯云相者五人卿為上擯據此大宗伯是卿故指此上擯而言也云大喪王后及世子也者以其與王為上相明是王后及世子亦得見大喪所相或嗣王則大喪中兼王喪也

小宗伯掌五禮之禁令與其用等凡國之大

禮佐大宗伯凡小禮掌事如大宗伯之儀肆師之職

凡卿大夫之喪相其禮凡國之大事治其禮儀以佐宗



伯凡國之小事治其禮儀而掌其事如宗伯之禮職

喪掌諸侯之喪及卿大夫士凡有爵者之喪以國之喪

禮泣其禁令序其事

國之喪禮喪服士喪既夕士虞今存者其餘則亡事謂小斂大斂葬

也

疏曰云國之喪禮喪服士喪既夕士虞今存者此

據儀禮之內見在者而言云其餘則亡者但儀禮本事

義三千條其時有天子諸侯卿大夫士喪與既夕及虞

卒哭與祔小祥大祥禮皆有遭暴秦而亡漢興唯得十

七篇高堂生所傳即今儀禮是也云事謂小斂大

斂葬也者舉大事而言其間仍有襲事亦掌之

天子達於庶人喪從死者祭從生者

從死者謂衣衾棺槨從生者謂奠祭

之牲器

王制

右總目

疾病外內皆埽

埽悉報反來問病也疾困曰病

為賓客將

君大夫徹懸士

去琴瑟

縣音玄注同去起呂反注同欲靜也凡樂器天子宮縣諸侯軒縣大夫判縣

聲音動人病者

士特縣去琴瑟者不命之士

疏曰宮縣四面宮室軒縣去其一面判縣又去其一面特縣又去其一面縣於

東方或階間鄭云諸侯之大夫半天子之大夫西縣鍾東縣磬士亦半天子之士縣磬而已注云不命之士謂

子男寢東首於北牖下

首手又反牖依注音酉來視之時也病者恒居北牖下

或為墉下

疏曰論語鄉黨云疾君視之東首加朝服

此云東首故知是君來視之時也

以東方生長故東首

鄉生氣士喪下篇云東首於北墉下是恒在北墉下若君不視之時則不恒東首隨病者所宜此熊氏所說今

謂病者雖恒在北牖下若君來視之時則廢牀徹褻衣  
暫時移向南牖下東首令君得南面視之

加新衣體一人

牀士良反本或作床字義息列反人始生在地廢去牀庶其生氣反徹褻衣

則所加者新朝服矣互言之也加朝服者明其終男女  
於正也體手足也四人持之為其不能自屈伸也

改服

為賓客來問病亦朝服也庶人深衣

屬續以俟絕氣

屬音燭續音曠新綿也一音古曠反

續今之新綿易動搖置口鼻之上以為候

男子不死於婦人之手婦人不

死於男子之手

君子重終為其相襲喪大記

扶君卜人師扶右射

人師扶左

謂君疾時也卜當為僕聲之誤也僕人射人皆平時贊正君服位者

君薨以是

舉

不忍變也周禮射人大喪與僕人遷尸疏曰知卜當為僕者以卜人無正君之事案周禮大僕職掌正

王之服位射人職掌國之三公孤卿大夫之位及王舉動悉隨王故知也 檀弓 下遷尸奉尸夷于堂大小

緻殯條

君於大夫疾三問之士疾一問之

詳見殯後受弔條

卿大夫疾君問之無算士一問之

三問者謂君自行此云無算謂遣使

也 雜記

君夫人卒於路寢大夫世婦卒於適寢內子未

命則死於下室遷尸于寢士之妻皆死于寢

言死者必皆于正處

也寢室通耳其尊者所不燕焉君謂之路寢大夫謂之適寢士或謂之適室此變命婦言世婦者明尊卑同也世婦以君下寢之上為適寢內子卿之妻也下室其燕處也 疏曰貴賤死寢不同也君謂諸侯也諸侯三寢一正者曰路寢餘二曰小寢卒歸於正故在路寢也夫人亦有三寢一正二小亦卒正者也大夫世婦卒於適

寢適寢猶令聽事處也其制異諸侯也大夫死適寢其妻亦死適寢也大夫妻曰命婦而云世婦世婦是諸侯之次婦令既明諸侯世婦尊與命婦敵故互言見義令命婦死於正寢則世婦死女君次寢之上也內子未命則死於下室遷尸于寢者內子卿妻也若未為夫人所命則初死在下室至小斂後遷尸乃復還其正寢士妻皆死于寢者亦各死其正室也夫妻俱然故云皆也寢室通耳者案士喪禮云死于適室此云卒于適寢是寢室通也云其尊者所不燕焉者謂尊嚴之處不從而燕息焉云世婦以君下寢之上為適寢者皇氏云君謂女君而世婦以夫人下寢之上為適寢熊氏云諸侯夫人大夫妻及士之妻卒皆於夫之正寢夫人卒於君之正寢世婦卒於君之下寢之上與皇氏異雖卒夫寢皆婦人供視之是亦婦人不死男子之手也案服虔注左傳義與皇氏同夫人之卒在於夫人路寢比君路寢為小寢故僖八年夫人不薨于寢則不殯于廟服虔注云寢

謂小寢也皇氏熊氏其說各異未知孰是故兩存焉知  
死正寢者案春秋成公薨於路寢道也僖公薨于小寢  
譏即安謂就夫人寢也隱公薨不書地失其所文公薨  
于臺下襄公薨於楚宮定公薨于高寢皆非禮也案莊  
三十二年公羊傳何休注云天子諸侯皆有二寢一曰  
高寢二曰路寢三曰小寢案周禮掌王之六寢之修何  
休云天子三寢與周禮  
違不可用喪大記

始卒主人啼兄弟哭婦人哭

踊凡哭尸于室者主人二手承衾而哭

承衾者哀慕若欲攀援同上

右始死

案喪大記正以備天子以下喪禮大喪之禮莫重於嗣君即位今附見于記文之下

二十有八載帝乃殂落

殂落死也堯年十六即位七十載求禪試舜三

載自正月上日至崩二十八載堯凡壽一百一十七歲

百姓如喪考妣

考妣父母

言百官感  
德思慕

三載四海過密八音

過絕密靜也八音金石絲竹匏土革

木四夷絕音三年則華夏可知  
言盛德思化所及者遠

舜典

惟四月哉生魄

王不懌

懌音亦成王崩年之四月始生魄月十六日王有疾故不悅懌

甲子王

乃洮頽水相被冕服憑玉几

洮他刀反徐音洮頽音悔王發大命臨

羣臣必齋戒沐浴令疾病故但洮盥頽面扶相者被以冠冕加朝服憑玉几以出命

乃同召

太保奭芮伯彤伯畢公衛侯毛公

奭音釋芮如銳反彤徒冬反

同召六卿下至御治事太保畢毛稱公則三公矣此先後次第冢宰第一召公領之司徒第二芮伯為之宗伯第三彤伯為之司馬第四畢公領之司寇第五衛侯為之司空第六毛公領之召芮彤畢

衛毛皆國名入師氏大夫官  
為天子公卿師氏虎臣百尹御事  
虎臣虎賁氏

百尹百官之長及諸御治事者  
疏曰周禮師氏中大夫掌以美詔王居虎門之左司王朝得失之

事帥其屬守王之門重其所掌故與虎臣並於百尹之上特言之尹訓正也故百尹為百官之長諸

御治事謂諸掌事者王曰嗚呼疾大漸惟幾幾音蓋大夫皆被召也

音畿自歎其疾病日臻既彌留恐不獲誓言嗣大進篤惟危殆

茲予審訓命汝病日至言困甚已久留言無瘳恐不得結信出言嗣續我志以此故

我詳審教命汝昔君文王武王宣重先奠麗陳教則肄重

龍反言昔先君文武布其重先累聖之德定天命施陳教則勤勞肄不違用克達



殷集大命

文武定命陳教雖勞而不違道故能通殷為周成其大命

在後之侗

敬迓天威嗣守文武大訓無敢昏逾

侗音同又勅動反馬本作

詞云共也

在文武後之侗稚成王自斥敬迎天

之威命言奉順繼守文武大教無敢昏亂逾越言

戰慄畏懼

斥昌亦反

今天降疾殆弗興弗悟爾尚明時朕

言

今天下疾我身甚危殆不起不悟言必死汝當庶幾明是我言勿忽畧

用敬保元

子釗弘濟于艱難

釗姜遼反又音昭徐之肴反用奉我言敬安太子釗釗康王

名大渡於艱難勤德政

柔遠能邇安勸小大庶邦

言當和遠又能和近

安小大衆國勸使為善

思夫人自亂于威儀爾無以釗冒貢

于非幾

冒亡報反音勅用反

一音墨又作勗貢如字又作贛羣臣皆宜思夫人夫人自治

正於威儀有威可畏有儀可象然後足以率人汝無以釗冒進于非危之事疏曰汝羣臣等思夫

人夫人衆國各自治正於威儀有威有儀然後可以率人無威無儀則民不從命戒使謹威儀也汝

無以釗冒進于非事危茲既受命還此羣臣已受事欲令戒其不為惡也

位出綴衣于庭

出如字徐尺遂反綴丁衛反綴衣幄帳羣臣既退徹出幄帳於庭

王寢於北墉下東首反初生疏曰綴衣者連綴衣物出之於庭則是從內而出下云狄設黼屨綴

衣則綴衣是黼屨之類黼屨是王坐立之處王發顧命在此黼屨幄帳之坐命訖乃復反於寢處以

王病重不復能臨此坐故徹出幄帳於庭將欲為死備也越翼日乙丑王崩太

保命仲桓南宮毛

冢宰攝政故命二臣桓毛名

俾爰齊侯呂伋

以二千戈虎賁百人逆子釗于南門之外

伋居及反齊侯名太

公子

臣子皆侍左右將正太子之尊故出於路寢門外使桓毛二臣各執干戈於齊侯呂伋索虎

賁百人更新逆門外所以

延入翼室恤宅宗

明室路寢

殊之伋為天子虎賁氏

延之使居憂為天下宗主

疏曰天子初崩太子

必在其側於時臣子皆侍左右將正太子之尊故

使太子出於路寢門外更迎入所以殊之也經言

二千戈文在齊侯呂伋下似就齊侯取干戈傳言

使桓毛工臣各執干戈於齊侯呂伋索虎賁則是

執干戈就齊侯傳似反於經者於時新遭大禍內

外嚴戒桓毛二人必是武臣宿衛先執干戈太保

就命使之執干戈以往傳達其意故移干戈之文

於齊侯之下傳言是實也經言於齊侯呂伋下言  
以二千戈虎賁百人者指說迎太子之時有此備  
衛耳非言二人千戈亦是齊侯授也周禮虎賁氏  
下大夫其屬有虎士八百人知伋為天子虎賁氏  
故就伋取虎賁也又曰釋言云翼明也喪大記云  
君夫人卒於路寢以諸侯薨於路寢知天子亦崩  
於路寢今延太子入室必入喪所知翼室是明室  
謂路寢也延使之居憂為天下喪主也顧命  
案嗣君即位之禮以傳記考之其別有四有正嗣  
子之位始死是也有正繼體之位殯後是也有正  
改元之位踰年是也有正踐阼之位三年之喪畢  
是也今成王初崩迎子釗入翼室恤宅宗正嗣子  
之位也其餘並見殯  
章而記其大畧於此

魯隱公十有一年冬十有

一月壬辰公薨公薨不地故也

不地不書路寢之比

隱之不

忍地也

隱猶痛也  
春秋穀梁傳

莊公三十二年八月癸亥

公薨于路寢路寢正寢也寢疾居正寢正也男子

不絕于婦人之手以齊終也

齊絜也 同上又成  
十八年公薨于路寢

傳

僖公三十有三年公薨于小寢公如齊反薨于

小寢即安也

小寢夫人寢也 譏公就所  
安不終于路寢 左氏傳

小寢非

正也

非路寢也  
穀梁傳

文公十有八年春王二月丁丑公

薨于臺下臺下非正也

同上

襄公三十有一年公

薨于楚宮楚宮非正也

楚宮別宮名非  
路寢 同上

定公十

有五年公薨于高寢

高寢宮名不於路寢失其所

高寢非正也

同上

唯哭先復復而後行死事

氣絕則哭哭而復復而不蘇可以為死事疏曰氣絕而

孝子即哭哭訖乃復故云唯哭先復也復而猶望生若復而不生故得行於死事謂正尸於牀及浴襲之屬也

大記喪

夏采掌大喪以冕服復于大祖以乘車建綏復

于四郊

乘繩證反綏而誰反依字作綏誤作綏耳求之王平生常所有事之處乘車玉路於大廟以

冕服不出宮也四郊以綏出國門此行道也夏采天子之官故以冕服復于大祖以乘車建綏復于四郊天子

之禮也大祖始祖廟也故書綏為禮杜子春云當為綏禮非也玄謂明堂位曰凡四代之服器魯兼用之有虞

氏之旂夏后氏之綏彼注云綏當為綏則旌旂有是綏也綏以旄牛尾為之綴於幢上所謂注旄於干首者王祀四郊乘玉路建太常令以復去其旒異之於生亦因先王有徒綏者士冠禮及玉藻冠綏之字故書亦多作綏者今禮家定作綏禮音維徐音遂疏曰復者各依命數天子則十二人各服朝服而復於太祖之廟當升自東甬北面履危西上云臯天子復如是者三乃卷衣投於前有司以篋受之升自阼階入衣於尸復而不蘇乃行死事也故云復於太祖也云以乘車建綏復於四郊者以冕服不出官旌旗之綏又是行道之物故乘玉路之乘車建綏而復於四郊也必於太祖四郊者欲死者復蘇故於平生有事之處皆復也天子七廟此經直云太祖太祖則后稷廟也餘六廟案祭僕云大喪復于小廟注云小廟高祖以下是親廟四也隸僕職云大喪復於小寢大寢注云小寢高祖以下廟之寢也始祖曰大寢唯二祧無復文者案祭法親廟四與太祖皆月





於小寢大寢小祖大祖庫門四郊

尊者求之備也亦他日所嘗有事疏曰

此一節論人君禮備復處又多自小寢以下明招魂處所也君王侯也於小寢者前曰廟後曰寢爾雅云室有東西廂曰廟無東西廂有室曰寢此小寢者所謂高祖以下寢也王侯同大寢謂天子始祖諸侯大祖也小祖高祖以下廟也王侯同大祖天子始祖諸侯大祖廟是兩言於廟求神備也周禮夏采以冕服復於太祖廟是也其小廟則祭僕復之其小寢大寢則隸僕復之四郊則夏采復之故夏采云乘車建綏復於四郊此天子之事也其諸侯復則小臣故喪大記云小臣復案周禮內小臣上士四人案雜記云復西上注各如其命數上公九命侯伯七命則小臣不足明更有餘官又復人雖依命數復處既多則復人不足當於此復了更轉向他處

檀

復有林麓則虞人設階無林麓則狄人設階

音麓

鹿復招魂復魄也階所乘以升屋者虞人主林麓之官也狄人樂吏之賤者階梯也箕簋之類疏曰封內若有林麓則所主林麓虞人設階梯而升屋無林麓者謂官職卑小不合有林麓無虞人可使狄人是家之樂吏之賤者掌設箕簋簋階梯之類故狄人設階也喪大記小臣復復者朝服君

以卷夫人以屈狄大夫以玄纁世婦以禮衣士以爵弁士妻以稅衣皆升自東榮中屋履危北面三號捲衣投

于前司服受之降自西北榮

顙勅真反禮知彥反稅他亂反榮如字劉音營號戶

高阪捲俱免反徐純阮反以事君之衣也用朝服而復之者敬也復用死者之祭服以其求於神也君以卷謂上公也夫人以屈狄互言耳上公以衮則夫人用褱衣侯伯以鷩其夫人用揄狄

子男以毳其夫人乃用屈狄矣。赭赤也。玄衣赤裳，所謂卿大夫自芻蕘而下之服也。其世婦亦以禮衣。祭屋翼，升東榮者，謂卿大夫士也。天子諸侯言東，雷危棟上出號若云。皋某復也。司服以篋待衣於堂前。疏曰：小臣復復者，朝服者此明諸侯小臣君之近臣與君為招魂復魄。既是君之親近，冀君魂神來依之，則大夫士以下皆用近臣也。所復之人皆著朝服奉事君之魂神，故朝服君以卷者，謂上公以袞冕而下夫人以屈狄者，謂子男之夫人自屈狄而下大夫以玄纁者，玄纁也。言大夫招魂用玄冕玄衣纁裳，故云玄纁也。世婦以禮衣者，世婦大夫妻也。其上服唯禮衣，故用招魂也。言世婦者，亦見君之世婦服與大夫妻同也。士以爵弁者，士亦用助祭。上服以招魂六冕，則以衣名冠爵弁，則以冠名衣。今言爵弁者，但用其衣不用其弁也。士妻以稅衣者，稅衣六衣之下也。士妻得服之故死，用以招魂也。皆升自東榮者，榮屋翼也。天子諸侯四注為屋，而大夫以下不得。

四注但南北二注而為直頭頭即屋翼也復者升東翼而上也中屋者當屋東西之中央履危者踐履屋棟上高危之處而復也北面三號者復者北面求陰之義也鬼神所嚮也三號號呼之聲三徧也必三者一號於上冀神在天而來也一號於下冀神在地而來也一號於中冀神在天地之間而來也號輒云臯某復矣鄭注士喪禮云臯長聲也捲衣投于前司服受之者三招既竟捲斂所復之衣從屋前投與司服之官司服以篋待衣於堂前也前謂陽生之道復是求生故衣從生處來也降自西北榮者復者投衣畢而回往西北榮而下也初復是求生故升東榮而上求既不得不忍虛從所求不得之道還故就陰幽而下也不正西而西北者因徹西北扉為便也必徹西北扉者亦用陰殺之所也故鄭注士喪禮云不由前降不以虛反也降因徹西北扉若云此室凶不可居然也注云君以卷謂上公也夫人以屈狄互言耳者男子舉上公婦人舉子男之妻男子舉上

以見下婦人舉下以見上是互言也云升東榮者謂卿大夫士也者以鄉飲酒鄉射是大夫士之禮云設洗當東榮此云東榮故知是卿大夫士禮今之兩下屋云天子諸侯言東雷者雷謂東西兩頭為屋簷雷下案燕禮云設洗當東雷人君殿屋四注燕禮是諸侯禮明天子亦然同上

### 復西上

北面而西上陽長左

也復者多少各如其命之數疏曰凡招魂皆北面而招以西頭為上北面而西上陽長左也者以招魂冀生氣之來生氣為陽又北面言之南方是陽左在西方故言陽長左云復者多少如其命之數者案士喪禮復者一人以爵弁服言諸侯之士一命而用一人明復者各依命數其復處不同故檀弓云君復於小寢大寢庫門四郊而云復西上者但有兩人以上一處復者則西上也

雜記

### 王府大喪共復衣

裳

疏曰復招魂復魄司服所掌是尋常衣服玉府所掌皆玉之美物復衣裳用死者上服故玉府共之

司服大喪共其復衣服皆掌其陳序

疏曰大喪王喪也復衣服為始死招

魂復魄之服案雜記云復者升屋其人皆依命數天子則十二人諸侯九人七人五人大夫士亦依命數人執

一領天子衮冕以下上公亦皆用助祭之服也

復諸侯以褻衣冕服爵弁服

復招魂復魄也冕服者上公五侯伯四子男三褻衣亦始命為諸侯及朝覲見加賜之衣也褻猶進也疏曰

復諸侯以褻衣者謂復時以始命褻賜之衣冕服爵弁服者諸侯既用褻衣又以冕服爵弁服而復也鄭注冕服者上公自衮冕而下故為五侯伯自鷩冕而下故為四子男自毳冕而下故為三也凡服各依其命數則上公五冕之外更加爵弁服以下皮弁冠弁之等而滿九侯伯冕服之外亦加爵弁以下而滿七子男冕服之外加爵弁皮弁而滿五其褻衣君所特褻賜則宜在命數之外也故王制云三公一命衮若有加則賜是褻衣故

不入命數也此褒衣或  
是冕之最上者  
雜記夫人稅衣揄狄狄稅素紗  
言其招魂

用稅衣上至揄狄也狄稅素紗言皆以白紗穀為裏  
疏曰此明婦人復衣也婦人衣有六也夫人稅衣揄狄  
者諸侯夫人復用稅衣上至揄狄謂諸侯伯夫人也狄  
稅素紗者言從揄狄以下至於稅衣皆用素紗白穀為

裏  
內子以鞠衣褒衣素紗下大夫以禮衣其餘如士  
內子

卿之適妻也春秋傳曰晉趙姬請逆叔隗於狄趙衰以  
為內子而已下之是也下大夫謂下大夫之妻禮周禮  
作展王后之服六唯上公夫人亦有禕衣侯伯夫人自  
揄狄而下子男夫人自闕狄而下卿妻自鞠衣而下大  
夫妻自展衣而下士妻稅衣而已素紗若今紗穀之帛  
也六服皆袍制不禕以素紗裏之如今袷袍襖重繒矣  
褒衣者始為命婦見加賜之衣也其餘如士之妻則亦  
用稅衣  
疏曰此卿大夫以下之妻所復之衣內子謂

卿妻復以鞠衣褻衣者始命為內子尚所褻賜之衣復時亦用此衣故云鞠衣褻衣褻衣則鞠衣也但上命時褻賜故曰褻衣矣素紗者言此鞠衣褻衣亦以素紗為裏下大夫以禮衣者是下大夫之妻所復禮衣也對卿妻為下故復用禮衣周禮作展六服皆袍制不禪以素紗裏之袍制謂通衣裳有表有裏似袍也故云皆袍制不禪漢時有袷袍其袍下之褻以裏縵為之古之服皆以素紗為裏似此袷袍褻之裏縵故注云如今之袷袍褻重縵也其餘如士者謂鞠衣禮衣之外其餘祿衣如士之妻士妻既用祿衣而復則內子下大夫妻等亦用祿衣也云褻衣者謂內子初嫁始為卿妻加賜之以衣以褻崇之故云褻衣也雜記今案周禮內司服掌王后之六服袷衣揄狄闕狄鞠衣展衣祿衣素紗注云屈者音與闕相似禮與展相似狄當為翟翟雉名伊雉而南素質五色皆備成章曰翟王后之服刻縵為之形而采畫之綴於衣備成章曰翟王后之服刻縵為之形而采畫之綴於衣



以為文章禕衣畫翬者揄狄畫搖者闕狄刻而不畫此三者皆祭服從王祭先王則服禕衣祭先公則服揄翟祭羣小祀則服闕翟展字當為禮祿衣雜記曰夫人服稅衣喪大記曰士妻以祿衣言祿者甚衆字或作稅禕揄狄展聲相近

婦人復不以衽

衽而庶反衽婦人嫁時上服而非事鬼

祿字之誤也

神之衣故不用招魂也絳褕衣下曰衽大記

復衣不以衣尸不以斂

衣尸

於既反斂力驗反不以衣尸謂不以襲也復者庶其生也若其以衣襲斂是用生施死於義相反士喪禮云以衣衣尸浴而去之疏曰復是求生若用復衣而襲斂是用生施於死於義為反故不得將衣襲尸及斂也

同

上 復與書銘自天子達於士其辭一也男子稱名

婦人書姓與伯仲如不知姓則書氏

疏曰書銘謂書亡人名字於旌旗也

天子書銘於太常諸侯以下書於旌旗達於士其辭一也者謂士與天子同也男子稱名者此並殷禮周世則上文臣不名君天子復曰臯天子復矣諸侯復曰臯某復矣婦人書姓與伯仲者與及也復則婦人稱字此云書姓與伯仲是書銘也姓謂如魯姬齊姜而伯仲隨其次也此亦殷禮也周之文未必有伯仲當云夫人也如不知姓則書氏者如益

小記

凡復男子稱名婦人稱字

曰疏

自殷以下貴賤復同呼名周則天子稱天子諸侯稱某甫且字矣大夫士稱名而婦人並稱字喪大記天

子崩復曰天子復矣

如死時呼魄辭也不呼名臣不名君也疏曰復招魂復魄也精氣

為魂身形為魄人若命至終必是精氣離形而臣子罔極之至猶望應生故招呼死者之魂令還復身中故曰復也普天率土王者一人而已故呼天子復而王者必知呼已而返也以例而言之則王后死亦呼王后復也

禮曲

諸侯復曰某甫復矣

疏曰言某甫諸侯稱字是也同上

右復

司士作士掌事

事謂奠斂之屬疏曰始死則有奠案司士所掌不但始死奠凡喪事皆掌

之已列其職於戒臣民條內始死奠他無所載故復見於此若其他所掌則不復重出

右始死奠

鼓人大喪則詔大僕鼓

始崩及窆時也

大僕大喪始崩戒鼓

傳達于四方

戒鼓擊鼓以警衆也故書戒為駭疏曰王喪始崩擊鼓以警戒衆人使傳達于四

方以鼓聲相傳聞而達之也

小宰以官府之六聯合邦治三曰喪

荒之聯事

太宰贊贈王舍王司徒率六卿之衆庶屬其六引宗伯為上相司馬平士大夫司寇前王

此所謂官聯

大宗伯朝覲會同則為上相大喪亦如之

詳見

總目

大司寇凡朝覲會同前王大喪亦如之

大喪所前或嗣王

疏曰言或者大喪或是先后及王世子皆是大喪

師氏喪紀王舉則從

舉猶行也

故書舉為與杜子春云當為與謂王與喪紀之事疏曰王舉者舉行也此數事王行之時師氏則從以王所

在皆須詔王以美道故也

世婦凡王后有攬事於婦人則詔相

玄謂

拜拜謝之也喪大記曰夫人亦拜寄公夫人於堂上疏曰上言大喪下言后之拜事則所拜者為大喪而拜

故引喪大記為證但喪大記所云者是諸侯之喪主人拜寄公於門西夫人亦拜寄公夫人於堂上其寄公與

主人體敵故也。明知天子之喪，世子亦拜二王後於堂中。后亦拜二王後。夫人於堂上，可知是以僖公二十四年左氏傳云：宋公過鄭，鄭伯問禮於皇武子。武子對曰：宋於周為客。天子有事，膳焉有喪，拜焉。謂王喪二王後來奔嗣王，拜之。明二王後夫人來弔，后有拜法。若然，二王後夫人得赴王喪者，或夫人家在畿內來歸寧，值王喪則弔赴也。

### 大司馬大喪平士大夫

平者正其職與其位。疏曰：必使司馬平。

之者司馬之屬有司士主羣吏。令王喪不使司士，故司馬平之。

### 司士大喪作士掌事

事謂奠斂之屬。疏曰：始死則有奠，及至小斂，大斂，朔月、月半薦新，祖奠、大遣等皆是。未葬已前無尸，不忍異於生，皆稱奠。

### 宰夫大喪小喪掌小官之戒令帥執事而治

之。大喪王后世子小喪夫人以下小官士也。其大官則冢宰掌其戒令，治謂共辦。

### 小宰以法

掌賓客之戒具喪亦如之

戒官有事所當共法謂有舊法施行

雞人大

祭祀夜嘑旦以詔百官

嘑火吳反本又作呼詔古弔反夜夜漏未盡雞鳴時也呼旦

以警起百官使夙興喪紀亦如之

宰夫三公六卿之喪與職喪

帥官有司而治之凡諸大夫之喪使其旅帥有司而治

之

旅冢宰下士疏曰三公六卿喪尊故宰夫與春官職喪帥具於喪家有事官有司而治之謂共辦之大

夫之喪卑宰夫不自為使在已之下其旅三十有二人帥有事於喪家之有司而治之治之亦謂共辦之也

職喪掌諸侯之喪及卿大夫士凡有爵者之喪以國

之喪禮泣其禁令序其事

詳見總目

虎賁氏國有大故則

守王門大喪亦如之

非常之難要在門 疏曰大故謂兵災大喪謂王喪非常之難須警

備故云要在門

旅賁氏掌執戈盾夾王車而趨喪紀則衰葛

執戈盾

衰七雷反盾常準反又音允 葛葛經武士尚輕 疏曰臣為王貴賤皆斬衰斬衰麻經至葬

乃服葛令王始死即服葛故云武士尚輕

大司徒若國有大故則致萬民

於王門令無節者不行於天下

大故謂王崩及寇兵

司險國有

故則藩塞阻路而止行者以其屬守之唯有節者達之

有故喪災及兵也閉塞要害之道備姦寇也 疏曰喪謂王喪

天子崩巷市七日諸

侯薨巷市三日

疏曰若居天子諸侯之喪必巷市者以庶人憂感無復求覓財利要有急須之

物不得不求故於邑里之內而為巷市 檀弓

### 右戒臣民

射人大喪與僕人遷尸

僕人大僕也僕人與射人俱掌王之朝位也王崩小斂大斂遷

尸于室堂朝之象也檀弓曰扶君卜人師扶右射人師扶左君薨以是舉 疏曰知僕人大僕也者見大僕掌

內朝射人掌正朝掌事是同周禮又更無僕人職故知是大僕是以鄭云僕人與射人俱掌王之朝位也云王

崩小斂大斂遷尸於室堂者始死於北牖下遷尸於南牖下又云小斂於戶內是遷尸於室小斂訖遷尸於戶

外又遷尸大斂於阼階大斂訖又遷尸於西階以入棺是遷尸于堂也云朝之象也者君所在臣朝之故云朝

之象也始死條有卜人右射人左此條通用當互考

王府大喪共角枕角柩



角枕以枕尸角柶角七也以楔齒士喪曰楔齒用角柶令可飯含疏曰案既夕禮楔貌如輓之兩末狀如批

把拔屈中  
央楔齒

始死遷尸于牀撫用斂衾去死衣小臣楔齒

用角柶綴足用燕几君大夫士一也

反撫荒胡反去起呂牀謂所設牀

策當牖者也疏曰遷尸于牀者尸初在地冀生氣復而既不生故更遷尸于牀而離初死處以近南當牖也即所謂既正尸也撫用斂衾者撫覆也斂衾者將擬大斂之時衾被也既遷尸在牀而用斂衾覆之也去死衣者既覆之故除去死時所加新衣及復衣為尸將浴故也小臣楔齒用角柶者楔柱也柶以角為之長六寸兩頭曲屈為將含恐口閉急故使小臣以柶柱張尸齒令開也綴足用燕几者為尸應著屨恐足辟戾亦使小臣用燕几綴拘之令直也又云初廢牀時牀在北壁當戶至復魄遷之在牀而當牖南首所以死後必當牖南首

者以平生寢卧之處故昏禮司牢在奧曲禮云為人子者居不主奧是尊者常居之處若晝日常居則當戶故玉藻云君子之居恒當戶喪大記幕人武博大喪共帷幕帟綬詳見陳殯

具條

委人喪紀共其木材

木材給張事此以上兩條陳殯具條通用

右遷尸楔齒綴足帷堂

父兄命赴者

謂大夫以上也士主人親命之疏曰父兄命赴者亦復後之事赴謂死者生時於

他人有恩識者令死則其家宜使人往相赴告也士喪禮則孝子自命赴者若大夫以上則父兄命之雖代命之猶稱孝子

名也檀弓

天子崩告喪曰天王登假

告赴也登上也假已也上

已者若僂去云耳曲禮

凡訃於其君曰君之臣某死

訃音赴訃或皆作

赴赴至也臣死其子使人至君所告之疏曰此明遭喪訃告於君及敵者并赴於鄰國稱謂之差父母

妻長子曰君之臣某之某死

長丁丈反疏曰上某是生者臣名下某是臣之親

屬死者云君之臣姓某甲之父死也

君訃於他國之君曰寡君不祿敢告

於執事夫人曰寡小君不祿大子之喪曰寡君之適子

某死

大音泰適丁歷反也疏曰寡君不祿

君夫人不稱薨告他國君謙敢告於執事者以謙故稱寡

君若云寡德之君雖復壽考仍以短折言之故云不祿不敢指斥鄰國君身故云敢告於執事也夫人曰寡小君不祿大子之喪曰寡君之適子某死大夫訃於同國者皆當云告於執事不言者畧之故也

適者曰某不祿訃於士亦曰某不祿訃於他國之君曰

君之外臣寡大夫某死訃於適者曰吾子之外私寡大

夫某不祿使某實訃於士亦曰吾子之外私寡大夫某

不祿使某實

適依注音敵下同實依注音至下同適讀為匹敵之敵謂爵同者也實當為至此

讀周秦之人聲之誤也

疏曰訃於他國之君曰君之

外臣寡大夫某死言外臣者大夫不屬他國故云外臣

自謙退無德故云寡大夫某尊敬他君不敢申辭故曰

某死訃於適者謂大夫死訃於他國大夫相敵體者謂

訃告大夫以是別國私有恩好故曰外私以赴大

夫其辭得申故云某不祿以身赴告故云使某實

於同國大夫曰某死訃於士亦曰某死訃於他國之君

曰君之外臣某死訃於大夫曰吾子之外私某死訃於

士亦曰吾子之外私某死

疏曰士賤訃大夫及士皆云某死若訃他國之君及大夫

士等皆云某死但於他君稱外臣於大夫士言外私耳

離記

右命赴

君氏卒

隱不敢從正君之禮故亦不敢備禮於其母

聲子也

不赴于諸侯不反哭于寢不祔于姑故不曰薨不

稱夫人故不言葬

夫人喪禮有三薨則赴於同盟之國一也既葬日中自墓反虞

於正寢所謂反哭于寢二也卒哭而祔于祖姑三也若此則書曰夫人某氏薨葬我小君某氏此備禮之文也

今聲子三禮皆闕隱三年春秋左氏傳

滕侯卒不書名未同

盟也凡諸侯同盟於是稱名故薨則赴以名告終

稱嗣也

盟以名告神故薨亦以名告同盟告亡者之終稱嗣位之主

以繼好息

民謂之禮經

隱公七年春秋左氏傳

葬蔡宣公卒何以名

而葬不名卒從正

卒當赴告天子君前臣名故從君臣之正義言也

而葬

從主人

葬者有常月可知不赴告天子故從臣子辭稱

卒何以日而葬不

日卒赴

赴天子也緣天子閔傷欲其知之

而葬不告

不告天子也隱公八年春秋公羊傳

唯天子之喪有別姓而哭

使諸侯同姓異姓庶姓相從而為位別於朝覲爵同同位

疏曰此言朝覲爵同同位然禮禮諸侯受舍於朝同姓西面異姓東面與此不同者覲禮先公而後私先侯

而後伯是亦爵同同位但同姓之中先爵尊耳

肆師大喪令外內命婦

序哭

序使相次秩 疏曰案下注六鄉以出及朝廷卿大夫妻皆為外命婦其內命婦即下經內命女是

也謂三夫人已下至女御也哭法以服之輕重為先後若然則內命婦為王斬衰居前諸臣之妻從服齊衰者

居後也

內宗大喪序哭者

內宗凡內女之有爵者序哭王

九殯若有賓客則從后大喪帥叙哭者亦如之

亦從后

也后哭衆之次叙者乃哭 疏曰外內命婦哭時皆依尊卑命數在后後為前後列哭之故須帥導使有次序

也 唯天子之喪別姓而哭肆師序哭內宗序哭九殯帥叙哭皆朝夕哭條所通用

司士凡士

之有守者令哭無去守

疏曰此文承大喪之下令哭無去守則大夫士有使役守當雖

同為天子斬衰不可廢事 空官故令哭不得去守也

既正尸子坐于東方卿大

夫父兄子姓立于東方有司庶士哭于堂下北面夫人

坐于西方內命婦姑姊妹子姓立于西方外命婦率外

宗哭于堂上北面

正尸者謂遷尸牖下南首也子姓謂衆子孫也姓之言生也其男子立於

主人後女子立於夫人後世婦為內命婦卿大夫之妻為外命婦外宗姑姊妹之子疏曰人君初喪哭位子

坐于東方者子謂世子世子尊故坐于東方謂室內戶東故士喪禮云主人入坐于牀東是也卿大夫父兄子

姓立于東方者子姓謂衆子孫所生也唯士禮父兄子姓大功以上正立于室內東方今此經摠云卿大夫父

兄子姓立于東方以士禮言之當在室內但諸侯以上位尊不可不正定世子之位故顧命康王之入翼室恤

宅宗不宜與卿大夫父兄子姓俱在室內也卿大夫等或當在戶外之東方遙繼主人之後有司庶士哭于堂



下北面者以其卑故在堂下北面則諸父兄子姓等雖小功以下皆在堂上西面也夫人坐於西方者亦近尸故士喪禮云婦人俠牀東面士禮畧但言俠牀人君則當以帷幰之內命婦姑姊妹子姓立于西方者內命婦則子婦也姑姊妹謂君姑姊妹也子姓君女孫皆立于西方也外命婦率外宗哭于堂上北面者外命婦謂卿大夫妻外宗謂姑姊妹之女外命婦外宗等疏於內命婦故在戶外婦人無堂下之位故皆堂上北面又鄭注云世婦為內命婦卿大夫之妻為外命婦者前文云大夫世婦則世婦與大夫妻相敵此經內命婦與外命婦相當故知內命婦是世婦也案喪服傳云命婦者大夫之妻故云外命婦卿大夫妻又周禮命及於士則其妻亦為命婦鄭注內宰云士妻亦為命婦士妻與女御相對俱祿衣則君之女御內命婦中兼之也云外宗姑姊妹之女者但姑姊妹必嫁於外族其女是異姓所生故稱外宗案周禮外宗外女之有爵者若其有爵則為

外命婦此別云外宗客無爵者女之女亦是異姓所生而不云者則上文所謂子姓也周禮有內宗內女之有爵者此不言者則前文姑姊妹是也但姑姊妹已嫁國中則為命婦別云姑姊妹容在室女未嫁及嫁於他國或雖嫁國中從本親之位故別云姑姊妹也不云舅之女及從母之女者外宗中兼之畧可知也 大夫

之喪主人坐于東方主婦坐于西方其有命夫命婦則

坐無則皆立

命夫命婦來哭者同宗父兄子姓姑姊妹子姓也凡此哭者尊者坐卑者立 疏曰哭位

之中有命夫命婦雖有卑於死者以其位尊故坐哭若其無命夫命婦雖尊於死者亦皆立哭鄭注知命夫命婦來哭者同宗父兄子姓姑姊妹子姓也者案左氏傳士踰月外姻至今大夫初喪正尸無容即有異姓故知是同宗之親來哭者知非異姓卿大夫來弔者以其與主人等並列哭位故知是為喪來哭者若有弔者當立

哭不得坐也此大夫之喪不顯父兄子姓及姑姊妹哭位者約上文君喪及下文士喪畧可知也云凡此哭者尊者坐卑者立皇氏云凡謂君與大夫其哭者若爵位尊者則坐故上文君喪子及夫人坐大夫之喪主人主婦命夫命婦皆坐是也君之喪卿大夫皆立大夫之喪非命夫命婦者皆立是也此云尊卑非謂對死者為尊卑也若其今所行之禮與古異也成服士之喪主人父之後尊於死者則坐卑於死者則立也

兄子姓皆坐于東方主婦姑姊妹子姓皆坐于西方

士

同宗尊卑皆坐疏曰君與大夫位尊故坐者殊其貴賤士既位下故坐者等其尊卑無所異也喪大記

## 右哭位

小宰受其含祔幣玉之事

王喪諸侯諸臣有致含祔幣玉之事

右受含襚幣玉

司常大喪共銘旌

銘旌王則大常也士喪禮曰為銘各以其物疏曰士喪禮為銘各以其

物亡則以緇長半幅纁末長終幅廣三寸書名於末此蓋其制也案禮緯云天子之旌高九尺諸侯七尺大夫五尺士三尺案士喪禮竹杠長三尺則死者以尺易刃天子九尺諸侯七尺大夫五尺士三尺其旌身亦以尺易以也書銘自天子達於士其辭一也  
詳見復條

右為銘

鬯人大喪之大湔設斗共其饗鬯

斗音主斗所以沃尸也饗尸以鬯酒使

之香美者鄭司農云饗讀為薇疏曰鄭云饗尸以鬯酒使之香美者案肆師云大喪築鬻則此鬯酒中兼有

鬱金香草故得香美也司農云鬱讀為微者以鬯鬱尸故以徽為莊飾義也

鬱人大喪之

泚其其肆器

肆器陳尸之器喪大記曰君設大盤造冰馬大夫設夷盤造冰馬士併瓦盤無冰設

牀禮第有枕此之謂肆器天子亦用夷盤

肆師大喪大泚以鬯則築鬻

鬻音

煮

築香草煮以為鬯以浴尸香草鬱也

疏曰上小

宗伯大喪

以鬯泚則肆師與之築鬱金香草和鬯酒以

浴尸使之香也

典絲喪紀其其絲續組文之物

續音曠劉古曠反以給

線縷著盱口綦握之屬青與赤謂之文著直畧反下

同徐緒畧反盱香于反綦音其又音忌握烏學反劉烏

豆反

疏曰此鄭並據士喪禮而言云以給線縷者謂

所裁縫皆用線縷釋經絲也云著盱口綦握之屬者釋

經續組案士喪禮握手玄纁裏著組繫案喪大記屬續

以俟絕氣內則云履著綦鄭云綦屨繫是用續組之事

也云青與赤謂之文績人職文繡之屬亦用絲故連言也

內司服后之喪其衣

服凡內具之物

內具紛悅線纁鞞裘之屬疏曰后喪所共衣服者正謂襲時十二稱小斂十

九稱大斂百二十稱及內具之物也案內則婦事舅姑有紛悅線纁鞞裘故死者入殯亦兼有數物又有刀礪小鴈之物故云之屬以總之也以公襲卷衣一玄上兩條下陳小斂人斂衣皆通用

公襲卷衣一玄

端一朝服一素積一纁裳一爵弁二玄冕一襲衣一朱

綠帶申加大帶於上

卷音衮朱綠帶者襲衣之帶飾之離以朱綠異於生也此帶亦以

素為之申重也重於革帶也革帶以佩韍必言重加大帶者明雖有變必備此二帶也士襲三稱子羔襲五稱今公襲九稱是尊卑襲數不同矣諸侯七稱天子十二稱與疏曰公襲以卷衣上服最在內者公身貴故以

上服親身欲尊顯加賜故褻衣最外而細服居中也子羔賤故卑服親身也玄端一者賀云燕居之服玄端朱裳也朝服一者緇衣素裳公日視朝之服也素積一者皮弁之服公視朔之服也纁裳一者賀云冕服之裳也亦可驚毳任取中間一服也爵弁二者玄衣纁裳三通也此是始命之服示之重本故二通也招魂居亦用爵弁服也玄冕之下又取一也褻衣一者所加賜之衣最上華君賜也自卷衣至此合爵弁二通合九稱注云朱綠帶者襲衣之帶飾之雜以朱綠異於生也者此帶既非革帶又非大帶祇是衣之小帶衣之小帶以素為之而朱綠飾之亦異於生時也申重也重於革帶也者謂於革帶之上重如此大帶知非對小朱綠帶為重者以朱綠小帶散在於衣非是揔束其身若揔束其身唯有革帶大帶故知對革帶為重者必見革帶與大帶者明雖有變必備此二帶天子諸侯以下襲之數士喪禮襲三稱子羔襲五稱此文公襲九稱是尊卑襲數不同唯

天子諸侯無文故約之云諸侯七稱天子十二稱與與者疑辭也

雜記

君錦冒黼殺綴

旁七大夫玄冒黼殺綴旁五士緇冒黼殺綴旁三凡冒

質長與手齊殺三尺

冒莫報反黼勅貞反殺色戒反徐所例反疏曰冒謂襲後小斂前

所用以韜尸也冒有質殺者作兩囊每輒縫合一頭又縫連一邊餘一邊不縫兩囊皆然也上者曰質下者曰殺君質用錦殺用黼鄭注士喪禮云謂韜尸者制如直囊上曰質下曰殺質正也其用之先以殺韜足而上後以質韜首而下綴旁七者不縫之邊上下安七帶綴以結之故云綴旁七也大夫玄冒黼殺綴旁五士緇冒黼殺綴旁三者尊卑之差也鄭注士喪禮云上玄下纁象天地也以此推之士黼殺則君大夫畫殺為斧文也凡冒質長與手齊者凡謂貴賤冒通名也言冒之質從頭韜來至下長短與手相齊也殺三尺者殺從足韜上



長三尺  
喪大記

袍必有表不禪衣必有裳謂之一稱

袍步  
毛反

禪音單 袍褻衣必有以表之乃成稱也雜記曰子羔之襲繭衣裳與稅衣纁衽為一是也論語曰當暑袗絺綌必表而出之亦為其褻也 疏曰袍必有表不禪者袍是褻衣必須在上有以衣表之不使禪露乃成稱也注引雜記者證子羔之襲有袍繭衣上加稅衣為表乃成稱引論語者證衣上加表死則冬夏並用袍上加衣熊氏云褻衣所用尊卑不同士襲而用褻衣故士喪禮陳襲事爵弁服皮弁服祿衣注云祿所以表袍者是襲有袍士喪禮小斂云祭服次散衣次注云祿衣以下袍繭之屬是小斂有袍士喪禮大斂散衣是亦有袍若大夫襲亦有袍案雜記云子羔之襲繭衣裳是也斂則必用正服不用褻衣故檀弓云季康子之母死陳襲衣注云將以斂敬姜曰將有四方之賓來襲衣何為陳於斯命徹之若公則襲及大小斂皆不用褻衣 同上

率帶諸侯大夫皆五采士二采

率音律 此謂襲尸之大帶率緯也緯之

不加箴功大夫以上更飾以五采士以朱綠襲事成於帶變之所以異於生 疏曰此謂尸襲竟而著此帶也

率謂攝帛邊而熨殺之不加箴功異於生也以五采飾之亦異於生也大夫與諸侯同而士二采並異於生而

尊者可同也然此士天子之士也諸侯之士則緇帶故士喪禮緇帶云此謂襲尸之大帶者以吉時大帶唯有

朱綠玄華無五采小斂小斂衣數既多有絞不可加帶故知襲尸之大帶也以其稱率與大帶同故知是大帶

也云襲事成於帶變之所以異於生者鄭以襲衣與生同唯帶與生異凡襲事著衣必加帶乃成故云襲事成

於帶變之異於生也 雜記

復衣不以衣尸

詳見復條

凌人

凌力證反字從

水或力 升反

大喪共夷槃水

漢禮器制度大槃廣八尺長丈二尺深三尺漆赤中凡度長短

曰長直亮反度淺深曰深尸鳩反度廣狹曰廣先曠反  
度高下曰高古倒反相承用此音或皆依字讀疏曰  
叔孫通前漢時作漢禮器制度多得古之周制  
故鄭君依而用之周謂之夷槃漢謂之大槃君設

大盤造氷焉大夫設夷盤造氷焉士併瓦盤無氷設牀

禮第有枕

禮之善反如浴時牀也

造猶內也禮第祖簀也謂無席

先內氷盤中乃設牀於其上不施席而遷尸焉秋涼而止士不用氷以瓦為盤併以盛水耳漢禮大盤廣八尺長丈二深三尺赤中夷盤小焉周禮天子夷盤士喪禮君賜氷亦用夷盤然則其制宜同之疏曰造氷者謂造內其氷於盤中也大夫設夷盤者夷盤小於大盤亦內氷焉士併瓦盤無氷者瓦盤既小故併盤士卑故無氷設牀禮第者置氷於下設牀於上去席禮露第簀有枕謂無席如浴時牀者浴時無席為漏水也設氷無席

為通寒氣也云禮自仲春之後尸既襲既小斂先內冰  
盤中者若人若仲春則用冰若命夫命婦則火出之後  
而用冰故昭四年左傳云獻羔而啟之公始用之謂仲  
春也又云火出而畢賦周禮凌人夏頒冰是卿大夫以  
下三月以後而得用冰也既襲謂大夫也既小斂謂士  
也皆是死之明日若天子諸侯亦在襲斂之前也云周  
禮天子夷盤者案周禮凌人云大喪共夷盤冰是也但  
天子之夷盤即此之大盤也依尸而言則曰夷盤此云  
夷盤者據大夫所用對君大盤為小云其制之宜同之  
者以天子夷盤此大夫云夷盤三者俱有夷名是其制  
宜同但大小稍異

喪大記

典瑞大喪共飯玉含玉

飯扶晚反含尸暗反飯玉碎

玉以雜米也含玉柱左右齧及在口中者雜記曰含者  
執璧將命則是璧形而小耳疏曰鄭知飯玉碎以雜  
米者以其與米同內於口耳故知碎之與米同知含玉  
柱左右齧及在口中者案士喪禮云主人左扱米實于

右三實一貝左中亦如之雜記曰含者執璧將命則是璧形而小耳者彼是諸侯薨鄰國遣大夫來弔并行含襚贈之禮諸侯用璧天子雖用玉其形無文故取諸侯法以況之天子亦為璧形而小以其入口故知小也案玉府已云大喪其含玉此又言之者蓋玉府主作之此官主其成事而共之

### 玉府大喪共

含玉

疏曰玉者含玉璧形而小以為口實

舍人喪紀共飯米

飯所以實口不忍虛

也君用梁大夫用稷士用粱皆四升實者唯盈疏曰君用粱大夫用稷士用粱者此喪大記文彼據沐時所用今引證飯者但飯米沐米與重鬲所盛用米皆同喪大記注又云差率而上天子沐黍與則天子飯用黍也大記注又云差率而上天子沐黍與則天子飯用黍也大記注又云差率而上天子沐黍與則天子飯用黍也

天子飯九貝諸侯七大夫五士三

飯扶晚反此蓋夏時禮也周禮天

子飯含用玉疏曰以非周制故疑髮禮故云蓋也典瑞云大喪共飯玉含玉是周禮天子飯含用玉案禮戴

說天子飯以珠含以玉諸侯飯以珠含以碧玉大夫士飯以珠含以貝此等皆非周禮並夏商之法左傳成十七年子叔聲伯夢食瓊瑰哀十一年齊陳子行命其徒具含玉此等皆是大夫而珠玉為含者以珠玉是所舍之物故言之非謂當時實舍用珠玉也

雜記

含一牀襲一牀遷尸于堂又

一牀皆有枕席君大夫士一也

疏曰含一牀襲一牀遷尸于堂又一牀者言此

三節各自有牀皆有枕席唯含一時暫徹枕使面平故士喪禮商祝徹枕設巾是也含襲及堂皆有席故鄭注士喪禮商祝襲衣於牀牀次含牀之東衽如初又注士禮設牀第于兩楹之間衽如初有枕云衽寢臥之席亦下莞上簟是也君大夫士一也者貴賤同然也喪大記

右陳沐浴襲飯含之具

申豐曰古者日在北陸

而藏冰西陸朝覲而出之其出之也朝之祿位賓

食喪祭於是乎用之

昭四年春秋左氏傳

小宗伯王崩大肆以柩鬯泚

泚亡婢反杜音泚李士辨反鄭司農云大肆大浴

也杜子春讀泚為泚以柩鬯浴尸玄謂大肆始陳尸伸之疏曰肆訓為陳為伸故也以柩鬯浴尸使之香也

大職祝云大喪始崩以肆鬯泚尸小祝又云大喪贊泚彼二官已掌之此言之者察其不如儀也春官

大祝大喪以肆鬯泚尸

肆鬯所設鬯為陳尸也春官

小祝大喪贊

泚

故書泚為灋杜子春云當為泚泚謂浴尸春官

女御大喪掌沐浴

王及后之

喪疏曰王及后喪沐浴用潘浴用湯禮男子不死於婦人之手今喪亦使女御浴者案士喪禮浴時男子抗衾

則不使婦人令王喪婦人或亦供給湯物亦得謂之掌也

天官

管人汲不說繙屈

之盡階不升堂授御者入浴小臣四人抗衾御者二人浴浴水用盆沃水用料浴用絺巾拒用浴衣如它日小臣爪足浴餘水棄于坎其母之喪則內御者抗衾而浴管如字掌管籥之人又古亂反掌管舍之人汲音急說吐活反繙均必反抗苦浪反盆蒲奔反沃烏谷反料音主又音斗絺勑其反一本作綌去逆反拒音震它音他抗衾者蔽上重形也拒拭也爪足斷足爪也疏曰鄭注士喪禮管人有司主管舍者汲謂汲水繙汲水瓶索也遽從於事故不說去升索但縈屈執之於手中盡階不升堂者以水從西階而升盡階不上堂知西階者以士喪禮云為筵于西牆下故知從西階而升也浴水



用盆者用盆盛浴水也沃水用料酌盆水沃尸熊氏云  
用盤於牀下承浴水浴用絺布者絺是細葛涂垢為易  
故用之也大夫上絺下綌士上下同用綌詳見士喪禮  
注拒用浴衣者拒拭也用生時浴衣拭尸肉令燥也賀  
氏云以布作之生時有此也如它日者謂如平生尋常  
之日也小臣爪足者尸浴竟而小臣剪尸足之爪也浴  
盆餘汁棄之於坎中坎者是甸人所掘於階間取土為  
竈之坎其母之喪則內御者抗衾而浴者內外宜別故  
用內御舉衾也內御婦人亦管人汲事事亦如前唯浴用人不同耳管人汲授御者御者  
差沐于堂上君沐梁大夫沐稷士沐梁甸人為俎于西  
牆下陶人出重鬲管人受沐乃煮之甸人取所徹廟之  
西北扉薪用爨之管人授御者沐乃沐沐用瓦盤拒用

中如它日小臣爪手翦須濡濯棄于坎

差七何反沐音木甸田遍反塗

音役陶音桃重直龍反鬲音歷煮諸許反匪扶味反釁

七逆反

差浙也浙飯米取其潛以為沐也浴沃用料

沐於盤中文相變也士喪禮沐稻此云士沐梁蓋天子

之士也以差率而上之天子沐黍與

疏曰差為浙米

取其潘汁也君沐梁大夫沐稷皆謂用其米取其汁而

沐也將沐之時甸人之官為塗于西牆下土塗墜竈甸

人具此為塗竈以煮沐汁陶人作瓦器之官重鬲者謂

縣重之罌也是瓦瓶受三升以沐米為粥實於瓶以疏

布幕口繫以篋縣之覆以葦席管人受沐乃煮之者浙

於堂上管人亦升盡等不上堂而就御者受浙汁下往

西牆於塗竈鬲中煮之也釁然也甸人為竈竟取復魄

人所徹正寢西北匪以然竈煮沐汁也謂正寢為廟神

之也然舊云匪是屋簷也謂抽取屋西北簷也熊氏云

匪謂西北隅匪隱之處徹取屋外當匪隱處薪義亦通

也取此薪而用者示主人已死此堂無復用故取之也  
管人授御者沐者煮汁孰而管人又取以升階授堂上  
御者御者受汁入為尸沐也士喪禮云沐巾一又云拒  
用巾注云拒踈也清也如它日者事事亦如平生也小  
臣沐竟而翦手爪又治須象平生也濡濯棄于坎者皇  
氏云濡謂煩攪其髮濯謂不淨之汁也言所濡濯汁棄  
于坎中鄭注士喪禮云巾櫛浴衣亦并棄之於坎案既  
夕禮云掘坎南順廣尺輪二尺深三尺南其壤此沐汁  
棄於坎則浴汁亦然差是差摩故云浙詩云釋之叟叟  
是釋浙米也沐與浴俱有料俱有盤浴云用料沐云用  
盤是文相變也士喪禮云士沐稻是諸侯之士今此云  
士沐粱故云蓋天子之士也云以差率而上之天子沐  
黍與者案公食大夫禮黍稷為正饌稻粱為加是稻粱  
卑於黍稷就稻粱之內粱貴而稻賤稻是人所常種粱  
是穀中之美故曲禮云歲凶大夫不食粱故諸侯之士  
用稻天子之士用粱黍稷相對稷雖為重其味短故大

欽定四庫全書

卷五

夫用之黍則味美而貴故特牲少牢爾黍于席以其味美故也詩頌云其饌伊黍鄭注豐年之時雖賤者猶食黍是黍貴也故天子用之無正文故疑而云與也喪大記

右沐浴

大祝大喪相飯

疏曰云相飯者浴訖即飯舍故言相飯也不言相舍者太宰云大喪贊贈玉舍

玉此故不言春官

大宰大喪贊舍玉

助王為之也疏曰云助王為之也者謂助嗣

王也天官

右飯含襲

飯舍後有襲設冒一節今以其事附見於下

鑿巾以飯公

羊賈為之也

詳見士喪禮襲飯舍條

子羔之襲也繭衣裳

與稅衣纁衾為一素端一皮弁一爵弁一玄冕一

曾子曰不襲婦服

繭衣裳者若今大襦也繭為繭

爾稅衣若玄端而連衣裳者也大夫而以纁為之緣非也唯婦人纁衾禮以冠名服此襲其服非襲其冠曾子譏襲婦服而已玄冕又大夫服未聞子羔曷為襲之玄冕或為玄冠或為玄端疏曰此明大夫死者襲衣稱數也繭衣裳者繭為繭謂衣裳相連而綿繭著之也與稅衣者稅謂黑衣也若玄端而連衣裳也玄端多種今衣裳連是玄端玄端玄裳也纁衾為一者纁絳也衾裳下緣襦也以絳為緣故云稅衣纁衾也繭衣既褻故以稅衣表之合為一稱故云繭衣裳與稅衣纁衾為一也素端一者此第二稱也以服既不褻並無復別衣表之也盧云布上素下皮弁服賀瑒云以素為衣裳

也皮弁一者第三稱也十五升白布為衣積素為裳也爵弁一者第四稱也玄衣纁裳也玄冕一者第五稱也大夫之上服也曾子曰不襲婦服者曾子非之纁衽是婦人之服而子羔襲用之故曾子譏之依禮不合襲婦人之服鄭注此襲其服非襲其冠者鄭恐經云皮弁爵弁但云冠不云服恐襲其冠不襲其服故云以冠名服此襲其服非襲其冠子羔為大夫無文故注云未聞子羔曷為襲之

雜

記

孔子之喪公西掌殯葬焉嗆以疎米二貝

疎粳米也禮記曰稻曰嘉蔬

襲衣十有一稱加朝服一冠章甫

之冠珮象環徑五寸而緝組綬

緝巨箕反組則古反緝雜色組綬

所以繫象環家語

君之喪未小斂為寄公國賓出大夫之喪未小斂為君

命出士之喪於大夫不當斂則出

父母始死悲哀非所尊不出也出者或至

庭或至門國賓聘大夫不當斂其來非斂時疏曰此明君大夫士等未小斂之前主人出迎賓之節云或至庭者謂世子迎寄公及國賓士出迎大夫也皆至庭故下文云降自西階又云士於大夫親弔則與之哭不逆於門外是也云或至門者謂大夫於君命故下文云大夫於君命迎於寢門外是也以此言之則世子於天子之命士於君命亦皆然也君與大夫云未小斂謂未斂之前去小斂遠也士云不當斂謂去小斂近大夫與士至小斂相逼也士於大夫雖與小斂相偪不當斂之時尚為大夫出若未小斂之前為大夫出可知也案檀弓云大夫弔當事而至則辭焉注云辭猶告也擯者以主人有事告也主人無事則為大夫出彼亦謂小斂之事

與此同斂訖大夫至即拜之故雜記云當袒大夫至絕踊而拜之反改成踊是也此但云斂不云襲者未襲之前唯士為君命出其餘則不出故士喪禮未襲之前君使人弔主人迎於寢門外見賓不哭先入門右北面是也君使退主人哭拜送於外門外於時賓有大夫則特拜之因送君使而拜之非謂特出迎賓也此云不當斂則出迎賓雜記云士喪當袒大夫至絕踊而拜之與此違者皇氏云若正當斂時則不出若斂後而有大夫至則絕踊凡主人之出也徒跣扱衽拍心降自西階君拜而拜之

寄公國賓于位大夫於君命迎于寢門外使者升堂致命主人拜于下士於大夫親弔則與之哭不送於門外拜寄公國賓於位者於庭鄉其位而拜之此時寄公位在門西國賓位在門東皆北面小斂之後寄公東面國



賓門西北面士於大夫親弔謂大夫身來弔士也與之  
哭既拜之即位西階東面哭大夫特來則北面疏曰  
主人降自西階者不忍當主位寄公謂失地之君國賓  
謂鄰國大夫來聘者過主國君之喪拜於位者於庭鄉  
其位而拜之士之喪大夫親來弔立于西階下東面主  
人則降自西階下南面拜之拜訖即位西階下與大夫  
俱哭不迎大夫於門外注云此時寄公位在門西國賓  
位在門東皆北面者熊氏云寄公有賓義故在賓位故  
知在門西國賓雖為君命使或本是吉使而遭主國之  
喪而行私弔之禮故從主人之位故知在門東云小斂  
之後寄公東面國賓門西北面者熊氏云小斂之後主  
人位於阼階下西面寄公漸就賓位東面鄉主人也國  
賓亦以小斂後轉就門西賓位但爵是卿大夫猶北面  
也士喪禮云他國之異爵者門西少進是也云既拜之  
後即位西階東面哭者以大夫身來弔士之時在西階  
之南主人降自西階鄉其位而拜之拜訖主人即位於

西階下東面哭故士喪禮云賓有大夫則特拜之即位于西階下東面不踊是也云大夫特來則北面者以大夫與士若俱來皆東面故主人即位西階在大夫之北俱東面而哭今大夫獨來不與士相隨故大夫北面也必知北面者以凡特弔皆北面故

檀弓云曾子北面而弔是特弔也

夫人為寄公夫人出

命婦為夫人之命出士妻不當斂則為命婦出

出拜之於堂上

也此時寄公夫人命婦位在堂上北面小斂之後尸西東面疏曰出謂出房也婦人不下堂但出房拜於堂

上也婦人尊卑與夫同故所為出者亦同也注云此時寄公夫人命婦位在堂上北面者以前文云君之喪外命婦率外宗哭于堂上北面故知此命婦在堂上北面知寄公夫人亦然者以士喪禮他國異爵者門西北面與已國夫人同則知寄公夫人亦與命婦同也云小斂之後尸西東面者以小斂之後遷尸于堂故知從婦人

之位在大西東面也喪大記

大夫之喪庶子不受弔

不以賤者為有爵者主

疏曰不受弔者謂不為主人也適子受弔拜賓若適子或有他故不在則雖庶子不敢受弔明已卑辟適也不可以賤者為有爵者喪主也言大夫庶子不受弔則士之庶子得受弔也檀弓此條奉尸夷于堂之後凡受弔皆通用又奉尸夷于堂條有婦人迎客送客一條殯後受弔條有君弔見尸柩而後踊皆此條通用當互考

右受弔

宋成公如鄭鄭伯將享之問禮於皇武

子

皇武子鄭卿

對曰宋先代之後也於周為客天子有

事膳焉

膳符袁反祭肉也廟也膳祭肉尊之故

有事祭宗賜以祭胾

有喪拜焉

宋弔周喪王特拜謝之疏曰禮弔喪之法皆主人拜其弔者謝其勤勞弔者不答拜以其為事而來不自同於賓客此皆據弔及主人敵禮以上若其臣下來弔則主人不拜宋是先代之後王以敵禮待之故拜其來弔其餘諸侯則否僖公二十四年春秋左氏傳小斂後殯後受弔通用

小斂於戶內大斂於阼君以簞席大夫以蒲席士以葦

席

葦于鬼反簞細葦席也三者下皆有莞疏曰士以葦席與君同者士卑不嫌故得與君同用簞也知

下皆有莞者案士喪禮記云設牀當牖下莞上簞士喪經云布席于戶內下莞上簞謂小斂席也大斂云布席如初注云亦下莞上簞知士始死至大斂用席皆同也士尚有莞則知君及大夫皆有莞也但此大夫辟君上席以蒲也若吉禮祭祀則蒲在莞下故同几筵諸侯祭祀席蒲筵績純加莞席紛純與此異也喪大記

司服大喪共其斂衣服掌其陳序

疏曰云大喪王喪其  
中兼小喪也云斂衣

服者小斂皆十九稱大斂則士三十稱大夫五十稱諸  
侯皆百稱天子蓋百二十稱春官此條陳大斂衣  
條通用陳襲衣條內典絲共絲纁  
內司服共衣服此條通用當互考

小斂布絞縮者一

橫者三君錦衾大夫縞衾士緇衾皆一衣十有九稱君

陳衣于序東大夫士陳衣于房中皆西領北上絞終不

在列

絞戶交反縮所六反稱尺證反終其鳩反絞既  
斂所用束堅之者縮從也衣十有九稱法天地之

終數也士喪禮小斂陳衣於房中南領西上與大夫異  
今此同亦蓋天子之士也絞終不在列以其不成稱不  
連數也小斂無終因絞不在列見之也或曰縮者三  
疏曰布絞者以布為絞縮從也謂從者一幅豎置於尸

下橫者三幅亦在尸下從者在橫者之上每幅之末析為三片以結束為便也君錦衾大夫縞衾士緇衾皆一者謂大夫士等各用一衾故云皆一舒衾於此絞上衣十有九稱者居大夫士同用十九稱衣布於衾上然後舉尸於衣上屈衣裹又屈衾裹之然後以絞束之君陳衣于序東大夫士陳衣於房中者謂將小斂陳衣也房中者東房也大夫士唯有東房故也絞終不在列者謂不在十九稱之列不入數也小斂未有紼因絞不在列而言紼耳云衣十有九稱法天地之終數者案易繫辭云天一地二天三地四天五地六天七地八天九地十天數終於九也地數終於十也人既終故云以天地終數斂衣之也云亦蓋天子之士者以前文士沐梁與士喪禮不同已云此蓋天子之士此經陳衣與士喪禮衣不同故云亦蓋天子之士也云以其不成稱不連數也者上衣下裳相對故為成稱絞紼非衣故云不成稱經云不在列鄭恐今不布列故云不連數謂不連為十九

稱之列其實亦布陳也云小斂無絰者以大斂始  
云布絰今此經直云布絰故知無絰也喪大記君

無禭大夫士畢主人之祭服親戚之衣受之不以即陳

無禭者不陳不以斂疏曰君無禭者國君陳衣及斂  
悉宜用已衣不得陳用他人見禭送者大夫士畢主人  
之祭服者降於君也大夫士小斂則先畢盡用已正服  
後乃用賓客禭者也盧云畢盡也小斂盡主人衣美者  
乃用賓客禭衣之美者欲以美之故言祭服也親戚之  
衣受之不以即陳者若親屬有衣相送受之而不以即  
陳列也士喪禮鄭注云大功以上有同財之義禭之不  
將命自即陳於房中小功以下及同姓皆將命鄭注無  
禭者不陳不以斂如皇氏之意臣有致禭於君之禮故  
少儀云臣致禭於君但君不陳不以斂熊氏云君無禭  
大夫士謂小斂之時君不合以衣禭大夫士雖有君禭  
不陳不以斂故云無禭大夫士至大斂則得用君禭故

士喪禮大斂時云君祔祭服不倒其義俱通故兩存焉

小斂君大夫士皆用複衣

複衾

同上

凡陳衣者實之篋取衣者亦以篋升降自西

階

篋苦協反取猶受也

凡陳衣不誣非列采不入絺綌紵不入

誣立勿反紵直呂反

不屈謂舒而不卷也列采謂正

服之色也絺綌紵者當暑之襲衣也襲尸重形冬夏用

袍及斂則用正服

疏曰非列采不入者列采謂五方

正色之采非列采謂雜色也不入陳之也絺綌紵不入

者絺是細葛綌是麤葛紵是布此襲衣故不入陳也

注謂襲尸重形冬夏用袍如熊氏之意此謂大夫以下

若公則襲亦不用袍

同上

上陳大斂衣條通用

復衣不以斂

詳見復條

封人

凡喪紀則飾其牛牲

疏曰喪紀有牲者除朝夕奠用脯醢以外大小斂朔月月半薦新奠



祖奠大遣等皆有牲牢

地官

牛人喪事共其奠牛

謂殷奠遣奠也喪所薦饋曰奠疏

曰喪自未葬已前無尸飲食直奠停置于神前故謂之為奠朝夕之奠無尊卑皆脯醢酒而已無牲體殷大也唯有小斂大斂朔月月半薦新祖奠及遣奠時有牲體大遣奠非直牛亦有馬牲故鄭注云謂殷奠遣奠也云喪所薦饋曰奠以無尸故也

地官

圉人喪紀共其生獸死獸之物

地官

獸人凡喪紀共其死獸生獸

天官

腊人喪紀共其脯

腊凡乾肉之事

獸人

獸音魚本又作魚又音御

喪紀共其魚之鱓

菹

天官

醢人凡祭祀共薦羞之豆實喪紀亦如之

以上

八官並陳大斂奠至祖奠遣奠條通用

天官

右陳小斂衣奠

小斂主人即位于戶內主婦東面乃斂

疏曰主人即位于戶內者以初

時尸在牖下主人在尸東令小斂當戶內故主人在戶內稍東喪大記上始死條卜人右射人左遷尸條

射人僕人遷尸並此條通用當互考

小宗伯王崩及執事涖小斂大斂帥

異族而佐

執事大祝之屬涖臨也親斂者蓋事官之屬為之異族佐斂疏者可以相助疏曰大祝

職云大喪贊斂明大祝執事小宗伯涖之云親斂者蓋事官之屬為之者以其諸處更不見主斂事者事官又主工巧之事以無正文故疑事官之屬為之也云異族佐斂疏者可以相助者此異族據姓而言之

大

祝大喪贊斂

冬官主斂事大祝贊之

喪祝凡卿大夫之喪掌

事而斂飾棺焉

疏曰言掌事者禮有降殺勸防以下皆掌之兼主斂事故摠云掌事而斂飾棺

焉  
春官

君之喪大胥是斂衆胥佐之大夫喪大胥侍之

衆胥是斂士之喪胥為侍士是斂

胥樂官也不掌喪事胥掌為祝字之誤也

侍猶臨也大祝之職

大喪贊斂喪祝卿大夫之喪掌斂

士喪禮商祝主斂

疏曰君之喪大胥是斂者大祝是

接神者故使之執斂事也是猶執也衆胥佐之者衆祝

喪祝也衆祝賤故副佐於大祝也大祝之喪大胥侍之

者侍猶臨也君尊故大祝親執斂大夫卑故大祝臨之

衆胥是斂者衆祝周禮喪祝卑故親執斂也士之喪胥

為侍者胥亦喪祝也士卑故祝臨之士是斂者士之朋

友來助斂也士喪禮云士舉遷尸是也商祝者案士喪

禮注云商祝祝習商禮者商人教之以敬於接神宜也

喪大記

凡斂者祖遷尸者

襲

袒者於事便也故袒為便也

遷尸者襲謂大斂於地乃遷尸入棺之

屬事少故襲也

同上

士與其執事則斂斂焉則為之壹不食

凡斂者六人

與音預人襲之

斂者必使所與執事者不欲妄疏曰士與其執事則斂者釋前

士是斂義也與執事謂平生曾與亡者共執事者若未經共執事則褻惡之故不使斂也斂焉則為之壹不食者生經有恩今又為之斂為之廢壹食也凡斂者六人者凡者貴賤同也兩邊各三人故用六人同上

小斂之衣祭服不倒

尊祭服也斂者要方散衣有倒疏曰祭服謂死者所得用祭服以

上也小斂十九稱不悉著之但用裏尸要取其方而衣有倒領在足間者唯祭服尊雖散不著而領不倒在足也

同上

小斂大斂祭服不倒皆左衽結紱不紐

紐女九反舊而

慎反左衽衽鄉左反生時也疏曰皆左衽大斂小斂同故云皆也衽衣襟也生鄉右左手解抽帶便也死則襟鄉左示不復解也生時帶並為屈紐使易抽解若死則無復解義故絞束畢結之不為紐也同上

自小斂以往用夷衾夷衾質殺之裁猶冒也

疏曰往猶後也小斂

前有冒故不用夷衾自小斂後衣多不可用冒故用夷衾覆之也士喪禮云幬用夷衾覆尸柩之衾也裁猶制也言夷衾所用上齊於手下三尺所用繒色及長短制度如冒之質殺也但不復為囊及旁聯也熊氏分質字屬上殺字屬下為句其義非也然始死幬用斂衾是大斂之衾自小斂以前覆尸至小斂時君錦衾大夫縞衾士緇衾用之小斂斂訖別制夷衾以覆之其小斂之前所用大斂之衾者小斂以後停而不用至將大斂及陳衣又更制一衾主用大斂也今案士喪禮幬用斂衾疏云大斂之時兩衾俱用一衾承薦於下一衾以覆尸

則始死所用之衾至大斂即以承薦非停而不用也

同上

鋪絞終踊鋪衾踊鋪

衣踊遷尸踊斂衣踊斂衾踊斂絞終踊

目孝子踊節同上

斂

者既斂必哭

疏曰斂者即大祝衆祝之屬也既斂是斂竟也斂竟必皆哭也所以然者以其與亡

者或臣舊或有恩令手為執事專心則增感故哭也

同上

君撫大夫撫內命婦

大夫撫室老撫姪娣

撫以手案之也內命婦君之世婦疏曰君撫大夫者大夫貴故自

撫之撫內命婦者命婦君之世婦撫內命婦則不撫賤者可知也大夫撫室老撫姪娣者大夫以室老為貴臣以姪娣為貴妾死則為之服故並撫之也既撫姪娣則賤妾不撫也

君大夫馮父母妻長

子不馮庶子士馮父母妻長子庶子庶子有子則父母

不馮其尸凡馮尸者父母先妻子後

目於其親所馮也馮謂扶持服膺

疏曰君大夫馮父母妻長子者君及大夫雖尊而自主此四人喪故同馮之馮父母撫妻子而并云馮通言耳不馮庶子者賤故不得也士馮父母妻長子庶子者士賤故所馮及庶子也庶子若有子則父母亦不馮前所得馮之庶子是無子者也然君大夫之庶子雖無子亦不得馮也凡馮尸者父母先妻子後者凡主人也父母妻子謂尸之父母妻子也父母尊故馮尸在先妻子卑故馮尸在後注謂目於其親者謂死者之親目於其親所馮謂題目君於臣撫之父母於子執之子於父母馮之

婦於舅姑奉之舅姑於婦撫之妻於夫拘之夫於妻於

昆弟執之

奉芳勇反拘音俱一古侯反尊卑之儀也馮之類必當心

此恩之深淺疏曰君於臣

撫之者此以下目恩深淺尊卑馮撫之異也君尊但以手撫案尸心身不服膺也父母於子執之者盧云執當心上衣也子於父母馮之者謂服膺心上也婦於舅姑奉之者盧云尊故捧當心上衣也舅姑於婦撫之者亦手案尸心與君為臣同也妻於夫拘之者盧云拘輕於馮重於執也庾云拘者微引心上衣也賀云拘其衣衾領之交也夫於妻於昆弟執之者為妻及自為兄弟但執之盧無別釋而賀云夫於妻執其心上衣於兄弟亦執其心上衣馮者為重奉次之拘次之執次之尊者則馮奉卑者則執撫雖輕於撫而恩深故君於臣撫父母於子執是兼有尊卑深淺云馮之類必當心者士喪禮君坐撫當心此下云馮尸不敢當君所明君不撫得當君所也馮尸不當君所不敢與尊者所馮同處疏曰所也馮尸不當君所猶處也假令君馮心則餘人馮者不敢當君所馮之凡馮尸興必踊悲哀之至馮尸必坐處則宜少辟之

疏曰凡者貴賤同



然也馮尸竟則起但馮必哀  
殯故起必踊泄之也

同上

君不撫僕妾

畧於賤也  
雜記

自小宗伯至此十  
三條大斂條通用

君於大夫世婦為之賜則小斂焉

夫人於世婦為之賜小斂焉

詳見殯後  
受弔條

卒斂主人馮

之踊主婦亦如之主人袒說髦括髮以麻婦人髻帶麻

于房中

馮皮冰反袒天旱反髻側瓜反  
此云小斂蓋諸侯禮也士之既殯諸侯之小斂

士既殯說髦

於死者俱三日也婦人之髻帶麻於房中則西房也天  
子諸侯有左右房

疏曰既斂主人馮之踊主婦亦如之

主人袒者向小斂不袒今方有事故袒衣也士喪禮馮  
尸已竟而云髮袒此未括髮先云袒者或人君禮也

說髦者髦幼時翦髮為之至年長則垂著兩邊明人子  
事親恒有孺子之義也若父死說左髦母死說右髦二

親並死則並說之親沒不髻是也今小斂竟喪事已成故說之也案鄭注士既殯說髻今小斂而說者人君禮也括髮以麻者人君小斂說髻竟而男子括髮用麻也士小斂後亦括髮但未說髻耳婦人髻亦用麻對男子括髮也帶麻于房中者帶麻麻帶也謂婦人要經也士喪禮云婦人之帶牡麻結本在房鄭云婦人亦有直經但言帶者記其異此齊衰婦人斬衰婦人亦直經也男子帶經于東房而婦人帶經在西房既與男子異處故特記其異也婦人重帶故云帶而畧于經也于房中者謂男子說髻括髮在東房婦人髻帶麻于西房也云士之既殯諸侯之小斂於死者俱三日也者謂數往日也云婦人之髻帶麻于房中則西房也者士喪禮主人髻髮袒衆主人免于房鄭注云釋髻髮宜于隱者是主人等括髮在東房士喪禮又云婦人髻于室以男子在房故婦人髻于室大夫士唯有東房故也此經兼明諸侯之禮有東西房男子既括髮於東房故知婦人髻及帶

麻于西房云天子諸侯有左右房者欲明經房中是西房也天子路寢制如明堂熊氏云左房則東南火室也在於中房在室之東西也諸侯路寢室同上

### 右小斂

案小斂所用之日以喪禮義考之但有死三日而斂若併死日而數二日而小斂三

日而大斂今言三日而斂則恐指大斂而不及小斂惟白虎通義云天子諸侯三日小斂大夫士二日小斂此乃小斂日數雖引以為在禮有之然無所考天子諸侯殯葬月日與士不同則斂日亦當不同故載其詳於喪禮義而記其畧於此

### 徹帷男女奉尸夷于堂降拜

奉芳勇反夷如字本或作夷同音移夷之言尸也

於遷尸主人主婦而下從而奉之孝敬之心降拜拜賓也疏曰徹帷者初死恐人惡之故有帷也至小斂衣

欽定四庫全書

卷五

三

尸畢有飾故除帷也此士禮諸侯及大夫賓出乃徹帷夷陳也小斂竟相者舉尸將出尸往陳于堂而孝子男女親屬並扶捧之至堂以極孝敬之心也降拜者既陳於堂則適子下堂拜賓也君拜寄公國

賓大夫士拜卿大夫於位於士旁三拜夫人亦拜寄公夫人於堂上大夫內子士妻特拜命婦汜拜衆賓於堂

上衆賓謂士妻也尊者皆特拜拜士與其妻皆旅之疏曰小斂畢尸出堂嗣君下堂拜賓也拜寄公及國

賓並就於其位鄉而拜之故鄭注士喪禮云拜賓鄉賓位拜之是也大夫士者嗣君又次拜大夫士也大夫士既是先君之臣皆同有斬衰之服而小斂訖出庭列位故嗣君出拜之也拜卿大夫於位者此更申明拜卿大夫士之異卿大夫則就其位鄉而拜之於士旁三拜者旁猶面也士賤不可人人拜之故每一面并唯三拜也

必三拜者士有三等故三拜之或云衆士都共三拜也  
夫人亦拜寄公夫人於堂上者婦人無下堂位並在堂  
上故夫人拜寄公妻於堂上也大夫內子士妻者夫人  
亦拜大夫士之妻也卿妻曰內子大夫妻曰命婦此不  
云命婦者欲見卿妻與命婦同也特拜命婦者此更申  
明拜命婦與士妻之異也特猶獨也謂人人拜之尊故  
也特拜命婦則內子亦然也祀拜衆賓者謂不特也衆  
賓士妻賤故祀拜之亦旁三拜也於堂上者拜命婦及  
士妻亦並於堂上也此經唯舉君喪拜賓不云大夫士  
喪拜賓者文不具也故士喪禮云主人拜賓大夫特拜  
士族之是也案上注未小斂寄公位在門西國賓位在  
門東皆北面小斂之後寄公門西東面國賓門西北面  
大夫當在門東北面士當在門西國賓之南東面嗣君  
於阼階之下少南鄉其位而拜之案上注云寄公夫人  
命婦小斂之後尸西東面其嗣君夫人本位在西房當  
在西房之外南面拜女賓也若士妻於阼階上西面拜

賓也以無西房故也以上皆是皇氏所說熊氏以為大夫士拜卿大夫士者是大夫士家自遭喪小斂後拜卿大夫於位士旁三拜大夫內子士妻亦謂大夫士妻家自遭喪小斂後拜命婦及拜士妻之禮大夫士各自遭喪并言之者以其大夫士家喪小斂後拜賓同故也此即君大夫士之喪小斂後拜賓且與上文未小斂時文類其義踰於皇氏矣喪大記今案皇氏君拜大夫士之說非是始死條有卜人右射人左遷尸條有射人與大僕遷尸並此

哭尸于堂上主人在東方由外來

條通用當互考

者在西方諸婦南鄉

鄉許亮反

由外來者謂奔喪者也無奔喪者婦人猶東而疏曰

此一節通明小斂後尸出在堂時法也主人之位猶在尸東婦人之位亦猶在尸西如室中也由外來者謂新奔喪者若於時有新奔喪從外來者則居尸西方所以爾者阼階有事故升自西階乃就西方又一通云欲見

異于在家者故在西方也若未小斂而奔者則在東方也故奔喪注云其未小斂而至與在家同是也諸婦南鄉者諸婦主婦以下在家者若無奔喪者則婦人位本在西方婦人迎東鄉今既有外新奔者故移辟之而近北以鄉南也

客送客不下堂下堂不哭男子出寢門見人不哭

婦人所

堂及房男子所有事自堂及門非其事處而哭猶野哭也出門見人謂迎賓也

其無女主則男主

拜女賓于寢門內其無男主則女主拜男賓于阼階下子

幼則以哀抱之人為之拜為後者不在則有爵者辭無爵

者人為之拜在竟內則俟之在竟外則殯葬可也喪有無

後無無主

拜者皆拜賓於位也為後者有爵攝主為之辭於賓耳不敢當尊者禮也

疏曰此一節明小

歛之後男主女主迎送弔賓及拜賓之位又廣明喪主不在之義婦人質故迎客送客不下堂下堂不哭者敵者不下堂若有君夫人弔則主婦下堂至庭稽顙而不哭也男子出寢門見人不哭者男子遭喪敵者來弔不出門若有君命則出門亦不哭也故士喪禮君使人弔徹帷主人迎于寢門外見賓不哭是也其無女主則男主拜女賓于寢門內者此以下明喪無主而使人攝者禮也若有主則使男主拜男賓女主拜女賓若無女主則使男主拜女賓于寢門內也若無男主者亦使女主拜男賓于阼階下位也鄉云女有下堂明謂此也男拜女賓于門內少遠階下而猶不出門也子幼則以哀抱之人為之拜者若有子雖幼小則以哀抱之為主而人代之拜賓也為後者不在者謂主出行不在而家有喪則有爵者辭謂不在家之主有官爵其攝主無官爵則辭謝於賓云已無爵不敢拜賓無爵者人為之拜者謂不在之主無官爵其攝主之人而為主拜賓也在竟內則俟之者若主行近在國竟之內則俟其還乃殯葬也在竟外則殯葬可也者



謂主行在國外計不可待則殯殯後又不可待則葬可也喪有無後無主者釋所以必使人攝及其衰抱幼之義無後則已自絕嗣無關於人故可無後也若無主則相對賓有闕故四鄰里尹主之是無得無主也喪大記此條殯後迎賓拜賓通用其婦人迎送不下堂一節未小斂受吊亦通用

### 右奉尸夷于堂拜賓

大祝大喪徹奠

疏曰此文承大喪之下故奠為始死之奠小斂大斂奠並大祝徹之

### 右徹始死奠

主人即位襲帶經踊

即位阼階之下位也有襲經乃踊尊卑相變也疏曰主人拜賓後

稍近北即阼階下位襲帶經踊者拜賓時袒今拜訖襲衣加要帶首經於序東復位乃踊也前經注云未小斂

主人即位西階下東面位恐此亦然故明之云阼階之下必知然者以士喪禮小斂後衆主人東即位又云主人即位踊襲經于序東復位故知此即位在于阼階下也云有襲經乃踊尊卑相變也者案士喪禮先踊乃襲經此先襲經乃踊士為卑此據

母之喪即位而免

免音問

記異

諸侯為尊故云尊卑相變者禮斬衰括髮齊衰免以至成服而冠為母重初亦括髮既小斂則免疏曰為父喪拜賓竟而即阼階下位又序東帶經猶括髮若為母喪至拜賓竟即位時不復括髮以免代之免以襲經至大斂乃成服也所以異於父也

乃奠

小斂奠也

踊竟後始設小斂之奠也

弔者襲裘加

武帶經與主人拾踊

拾其劫反

始死弔者朝服裼裘

帶經矣武吉冠之卷也加武者明不改冠亦不免也檀弓曰主人既小斂乎游趨而出襲裘帶經而入疏曰

小斂之後來弔者揜襲裘之上裼衣若未小斂之前來弔者裘上有裼衣裼衣上有朝服開朝服露裼衣今小斂之後弔者以上朝服揜襲裘上裼衣加武者賀氏云武謂吉冠之卷主人既素冠素弁故弔者加素弁於武帶經者帶謂要帶經謂首經總之經帶以朋友之恩故加帶與經也若無朋友之恩則無帶唯經而已與主人拾踊者拾更也謂主人先踊婦人踊弔者踊三者是與主人更踊也注云加武者明不改冠亦不免也者凶冠則武與冠連不別有武免亦無武今云加武明不改作凶冠亦不作免弔所以有免以四代袒免親及朋友皆在他邦嫌有免理故云亦不免引檀弓曰以下者證小斂之前裼裘小斂之後襲裘賀氏以為加素弁於吉冠之武解經文似便與鄭注不改冠其義相妨熊氏云加武帶經謂有朋友之恩以經加於武連言帶耳熊氏以武上加經與帶之文相妨其義未善兩家之說未知孰是故備存焉

賓出徹帷

君與大夫之禮

也士卒斂則徹帷徹或為廢疏曰士小斂竟而徹帷此至小斂竟下階拜賓賓出後乃除帷是人居及大夫禮舒也注云士卒斂即徹帷者士喪禮文喪大記未小斂受弔有庶子不受弔宋成公如鄭二條奉尸夷于堂有婦人迎送不下堂一條又殯後受弔條有君弔見尸柩而後踊皆此條通用當互考

### 右襲帶經小斂奠

挈壺氏

挈劉苦結反音結又戶結反

凡喪縣壺以代哭者皆以水火

守之分以日夜

鄭司農云縣壺以為漏代更也禮未大斂代哭以水守壺者為沃漏也以火守

壺者夜則視刻數也分以日夜者異晝夜漏也漏之箭晝夜共百刻冬夏之間有長短焉太史立成法有四十

八箭

疏曰禮未大斂代哭者未殯已前無問尊卑皆哭不絕聲大斂之後乃更代而哭亦使哭不絕聲大夫

以官士親疏代哭人君尊  
又以壺為漏分更相代

君喪虞人出木角狄人出

壺雍人出鼎司馬縣之乃官代哭

代更也未殯哭不絕聲為其罷倦既小斂

可以為漏刻分時而更哭也疏曰虞人掌山澤之官  
故出木與角狄人樂吏主挈壺漏水之器故出壺雍人  
主亨飪故出鼎所以用鼎及水者冬月恐水凍則鼎漏  
遲遲更無准則故取鼎煖水用虞人木饗鼎煮之故取  
鼎及木也司馬夏官卿也其屬有挈壺氏掌知漏事故  
司馬自臨視縣漏器之時節故挈壺氏云凡喪縣壺以  
代哭者縣漏分時使均其官屬  
更次相代而哭使聲不絕也大夫官代哭不縣壺  
也士代哭不以官  
自以親疏哭也疏曰相代而哭使聲不絕也喪大記

右代哭

委人喪紀其其薪蒸木材

薪蒸給炊及燎木材給張事

司烜氏凡

邦之大事共墳燭庭燎

墳大也樹於門外曰大燭於門內曰庭燎疏曰大事謂若大

喪紀大賓客之時也庭燎在天寢之庭

君堂上二燭下二燭大夫堂上

一燭下二燭士堂上一燭下一燭

燭所以照饌也滅燎而設燭疏曰有喪

則于中庭終夜設燎至曉滅燎而日光未明故須燭以照祭饌也喪大記

### 右設燎

大斂於阼

詳見陳小斂衣條陳小斂本條內有君以簟席并司服共斂衣服及陳襲衣條內典絲

共絲績內司服共衣服皆此條通用當互考

大斂布絞縮者三橫者五布

終二衾君大夫士一也君陳衣于庭百稱北領西上大  
夫陳衣于序東五十稱西領南上士陳衣于序東三十  
稱西領南上絞終如朝服絞一幅為三不辟終五幅無

紃

幅方服反辟補麥反又音壁徐扶移反紃丁覽反  
二衾者或覆之或薦之如朝服者謂布精麤朝服十

五升小斂之絞廣終幅折其末以為堅之強也大斂之  
絞一幅三折用之以為堅之急也紃以組類為之綴之  
領側若今被識矣生時禪被有識死者去之異於生也  
士喪禮大斂亦陳衣于房中南領西上與大夫異今此  
士陳衣與大夫又同亦蓋天子之士紃或為點疏曰  
大斂布絞縮者三者謂取布一幅分裂之作三片直用  
之三片即共一幅兩頭裂中央不道橫者五者人取布  
二幅分裂作六片而用五片橫之於縮下也布終者皇

氏云終禪被也取置絞束之下擬用以舉尸也孝經云衣衾而舉之是也今案經云終在絞後終或當在絞上以絞束之且君衣百稱又通小斂與襲之衣非單終所能舉也又孝經云衾不云終皇氏之說未善也二衾者小斂若大夫士各一衾今與大斂又各加一衾為二衾其餘所用與小斂同但此衾一是始死覆尸者故士喪禮云恤用斂衾注云大斂所并用之衾一是大斂時復制又注士喪禮衾二者謂始死斂衾今又復制士既然則大夫以上亦爾君陳衣于庭百稱北領西上者衣多故陳在庭為榮顯案鄭注雜記篇以為襲禮大夫五諸侯七上公九天子十二稱則此大斂天子當百二十稱上公九十稱侯伯子男七十稱今云君百稱者據上公舉全數而言之餘可知也或大斂襲五等同百稱也北領者謂尸在堂也西上者由西階取之便也大夫士陳衣于序東西領南上異於小斂北上者小斂衣少統於尸故北上大斂衣多故南上取之便也絞終二者布精



麤皆如朝服十五升也絞一幅為三不辟者辟擘也言小斂絞全幅析裂其末為三而大斂之絞既小不復擘裂其末但古字假借讀辟為擘也終五幅無統終舉尸之禪被也統謂緣飾為識所以組類綴邊為識今無識異於生也注謂以為堅之強也者解小斂衣少用全幅布為絞欲得堅束力強也云以為為堅之急也者解大斂一幅分為三片之意凡物細則束縛牢急以衣多故須急也云統以組類為之者組之般類其制多種故云組類云綴之領側若今被識矣者領為被頭側為被旁識為記識言綴此組類於領及側如今被之記識喪大

記

大斂君大夫士祭服無算君褶衣褶衾大夫士猶小

斂也

褶音牒 褶裕也君衣尚多去其著也 疏曰祭服謂死者所得用祭服以上也算數也大斂之時

所有祭服皆用之無限數也注謂君多去其著者經云大夫士猶小斂則複衣複衾也據主人之衣故用複若

襚亦得用袷也故士喪禮云襚以褶是也 同上 陳  
小斂衣條凡陳衣者實之篋以下此條通用當互考

典瑞駟圭璋璧琮琥璜之渠眉疏壁琮以斂尸

駟音祖以斂

尸者於大斂焉加之也駟讀為組與組馬同聲之誤也  
渠眉玉飾之溝瑑也以組穿聯六玉溝瑑之中以斂尸  
圭在左璋在首琥在右璜在足璧在背琮在腹蓋取象  
方明神之也疏壁琮者通於天地 疏曰於大斂焉加  
之也者以其六玉所加與王為飾明在衣裳之外故知在  
大斂後也駟讀為組詩有執轡如組聲之誤為駟云渠  
眉玉飾之溝瑑也者此六玉兩頭皆有孔又於兩孔之  
間為溝渠如溝之兩畔稍高為眉瑑故云以組穿聯六  
玉溝瑑之中以斂尸云圭在左已下皆約大宗伯云青  
圭禮東方之等以尸南首而置此六玉焉云蓋取象方  
明神之也者案覲禮設方明上圭下璧無壁琮此云象  
者彼注上下之神非天地至貴謂日月之神故上下不

用壁琮此中有壁琮者象天地若然此言象方明者直取置六玉於六處不取玉形之義又案宗伯璧禮天琮禮地今此壁在背在下琮在腹在上不類者以背為陽腹為陰隨尸腹背而置之故上琮下璧也云疏壁琮者通於天地者天地為陰陽之主人之腹背象之故云疏之通天地也

君即位而為柩歲

壹漆之藏焉

柩蒲歷反徐房益反柩堅著之言也一漆之

柩謂柩棺親尸者

之不合疏曰君諸侯也言諸侯則王可知也柩柩棺也漆之堅強甓甓然也人君無論少長而體尊備物故亦即位而造為此棺也古者天子柩內又有水兕而諸侯無但用柩在內以親尸也歲一漆之者年年一漆示如未成也唯云漆柩則知不漆柩棺外屬等藏焉者棺中不欲空虛如急有待也虛之不令也令善也言若虛空便為不善故藏物於其中一本為虛之不合者謂不以蓋合覆其上既不合覆不欲令人見故藏焉檀弓

天子之棺四重

尚深邃也諸公三重諸侯再重大夫

深邃也四重者水牛兕牛皮二物重故為一重也又柩為第二重也又屬為第三重也又大棺為第四重也四重凡五物也以次而差之上三公三重則去水牛餘兕柩屬大棺也侯伯子男再重又去兕餘柩屬大棺大夫一重又去柩餘屬大棺也士不重又去屬唯單用大棺也天子大棺厚八寸屬六寸柩四寸又二皮六寸合二尺四寸也上公去水牛之三寸餘兕柩屬大棺則合二尺一寸諸侯又去兕牛三寸餘合一尺八寸也列國上卿又去柩四寸餘合一尺四寸也大夫大棺六寸屬四寸合一尺士則不重但大棺六寸耳故庶人四寸矣云天子卿大夫並與列國君同若天子之士與諸侯大夫同也喪質不得依吉時祭服也若吉時祭服則天子臣與諸侯同春秋時多僭趙簡水兕革棺被之其厚三寸疏云言罰乃不設屬柩非也

水兕二皮並不能厚三寸故合被之令各  
厚三寸也二皮能濕故最在裏近尸也  
**地棺**一疏曰

一者檟也材亦能濕故次皮也  
地親尸也君即位為禭是也地即檟木爾雅曰檟地一

物二名名檟  
又名地也  
**梓棺**二疏云地棺之外又有屬棺屬棺之外  
又有大棺與屬棺並用梓故云二也

**四者皆周**疏云四四重也周匝也謂四重之棺上下四  
方悉周匝也唯櫛不周匝有茵上有抗席故

也  
**棺束縮二衡三衽每束一**衡亦當為橫衽今小要衽  
或作漆或作髹疏曰棺

束者古棺木無釘故用皮束合之縮二者縮縱也縱束  
用二行也衡三者橫束三行也衽每束一者衽小要也

其形兩頭廣中央小也既不用釘棺但先鑿棺邊及兩  
頭合際處作坎形則以小要連之令固棺並相對每束

之處以一行之衽連之若豎束之處則堅著其衽以連  
棺蓋及底之木使與棺頭尾之材相固漢時呼衽為小

要也  
同上

君大棺八寸屬六寸枹四寸上大夫棺八寸

屬六寸下大夫棺六寸屬四寸士棺六寸

大棺棺之在表者也檀弓

曰天子之棺四重水兕革棺被之其厚三寸也棺一梓棺二四者皆周此以內說而出也然則大棺及屬用梓枹用枹以是差之上公革棺不被三重也諸侯無革棺再重也大夫無枹一重也士無屬不重也庶人之棺四寸上大夫謂列國之卿也趙簡子云不設屬枹時僭也疏曰檀弓文以內說而出也者謂近尸有水革次外有兕革次外有枹次外有屬次外有大棺此先云大棺及屬乃始云枹是從外鄉內而說故知大棺及屬當梓棺也枹當枹棺也哀公二年趙簡子與鄭師戰于鐵簡子自誓云桐棺三寸不設屬辟下卿之罰也案大夫禮無枹趙簡子所云罰始無枹故知  
當時大夫常禮用枹是時僭也  
君裏棺用朱綠用雜

金鐻大夫裏棺用玄綠用牛骨鐻士不綠

鐻子南反鐻所以琢著

裏

疏曰裏棺謂以繒貼棺裏也朱繒貼四方綠繒貼

四角定本經中綠字皆作琢琢謂鐻琢朱繒貼著於棺

也用雜金鐻者鐻釘也舊說云用金鐻又用象牙釘雜

之以琢朱綠著棺也隱義云朱綠皆繒也雜金鐻尚書

曰貢金三品黃白青色大夫裏棺用玄綠者四面玄四

角綠用牛骨鐻者不用牙金也士不綠者悉用玄也亦

同大夫用牛骨鐻不言

舍人喪紀共熬穀

熬穀者鐻于棺旁所

從可知也喪大記

以惑蚘蚘也

疏曰殯時設之將熬穀以惑蚘蚘又有魚腊香蚘蚘欲向棺植此惑之也

熬君四

種八筐大夫三種六筐士二種四筐加魚腊焉

熬者煎穀也士

喪禮曰熬黍稷各二筐又曰設熬旁一筐大夫三種加以梁君四種加以稻四筐則手足皆一其餘設於左右

疏曰加魚腊者魚腊謂乾腊案郊特牲士腊用兔少

牢大夫腊用麋天子諸侯無文當用六獸之屬亦為感

蚍蜉

喪大記

幕人大喪共帷幕幣綬

為賓客飾也帷以帷堂或與幕張之於庭

幣在樞上疏曰始死帷堂小斂徹之及殯在堂亦帷之也

三公及卿大夫之喪共

其幣

唯士無幣王有惠則賜之檀弓曰君於士有賜幣疏曰掌次云諸侯再重孤卿大夫不重此云三

公不云諸侯再重此云孤孤與卿大夫同不重公即是諸侯再重此不云孤孤與卿大夫同不重

掌次凡喪王則張幣三重諸侯再重孤卿大夫不重

直重

龍反

張幣樞上承塵

疏曰喪言凡者以其王以下

至孤卿大夫兼有后及三夫人已下故言凡以廣之也

后與王同三重世子三夫人與諸侯再重九嬪二十七世婦與孤卿大夫同不重一而已八十一御妻與士同



無帟有賜乃得帟也。惟堂條委人共木材此。司几條通用上一條始死帷堂及柩行通用當互考。

筵凡喪事設葦席右素几其柏席用荏黼純諸侯則紛

純每敦一几

柏鄭音椁劉依司農音迫喪事謂凡奠也荏如葦而細者鄭司農云柏席迫地之

席葦居其上或曰柏席載黍稷之席玄謂柏椁字磨滅之餘椁席藏中神坐之席也敦讀曰燾燾覆也棺在殯則椁燾既窆則加見皆謂覆之周禮雖合葬及同時在殯皆異几體實不同祭於廟同几精氣合藏才浪反

疏曰云喪事謂凡奠也者言凡非一之義士喪禮始死之奠乃至小斂之奠亦設於地未有席至大斂奠乃

有席殯後則有朝夕奠朔月奠大夫已上兼有月半奠并有薦新奠葬時又有遷奠祖奠大遣奠葬乃廢奠

而虞祭也故鄭云謂凡奠也云荏如葦而細者詩云荏葦淠淠同類之物但麤細為異耳先鄭以柏席為迫地

或為載黍稷其言無所依據故後鄭不從也玄謂柏棹  
字磨滅之餘棹席藏中神坐之席也者謂於下帳中坐  
設之云敦讀曰燾燾覆也者謂若覆燾持載者也云棺  
在殯則棹燾者檀弓云天子歆塗龍輴以棹是也云既  
窆則加見者既夕禮下棺訖則加見見謂道上帳帷荒  
將入藏以覆棺言見者以其棺不復見唯見惟荒故謂  
之見也云皆謂覆之者此解經敦字以其二處皆當覆  
故云敦也云周禮雖合葬者檀弓云古者不合葬周公  
蓋附附謂合葬是周禮合葬也云及同時在殯者禮記  
曾子問云父母之喪偕鄭云同月死是同時在殯也云  
皆異兒體實不同者解經每敘一几之義祭於廟同几  
精氣合者案禮記祭統云敷筵設同几鄭云同之言詞  
也祭者以其妃配亦不特几以其精氣合故也言祭於  
廟者謂吉祭時以其禋月吉祭猶未配故知至二十八  
月乃設凡凶事仍几故書仍為乃鄭司農云吉事變几變  
同几也凡凶事仍几更其質謂有飾也乃讀為仍仍因也

因其質謂無飾也書顧命曰翌日乙丑成王崩癸酉牖  
間南鄉西序東鄉東序西鄉皆仍几玄謂吉事王祭宗  
廟祿於室饋食於堂繹於祊每事易几神事文示新之  
也凶事謂凡奠凡朝夕相因喪禮畧疏曰先鄭云變  
更其質謂有飾又以仍几乃是前後相因不得為几體  
故不從也顧命云牖間南鄉華玉仍几西序東鄉文貝  
仍几東序西嚮彫玉仍几西夾南嚮漆仍几孔云因生  
時几皆有飾而先鄭引云者先鄭意直取仍因之義也  
玄謂吉事祭宗廟祿於室者洛誥云王入大室祿是也  
禮器云設祭于堂為祊于外此直云饋食於堂謂饋獻  
節據有熟故言饋食其實未有黍稷又不言朝踐者朝  
踐與饋獻同在堂故畧而不言也人饋獻後更延尸入  
室進黍稷尸食之事不言者以其還依祿於室之几故  
亦畧而不言也云凶事謂凡奠者即上文凡喪事右素  
几是也此文見凡奠相因不易之意案檀弓云虞而立  
尸有几筵者據大夫士而言案士喪禮大斂即有席而

云虞始有筵者以其几筵相將連言其實虞時始有几其筵大斂即有也天子諸侯禮大初死几筵並有故上云凡喪事設葦席右素几也凡几之長短阮謏言几長五尺高二尺廣二尺馬融以為長三尺舊圖以為几兩端赤中央黑也此條大斂奠奠朝夕奠朔月奠以後凡奠並通用陳小斂奠條內有封人飾牛牲牛人共奠牛圉人獸人共獸腊人共乾肉獻人共蠃醢醢人共薦羞豆實之等

右陳大斂衣及殯奠之具 宋文公卒棺有翰檜

君子謂華元樂舉於是乎不臣

詳見定條

齊姜薨初

穆姜使擇美櫨

櫨古雅反櫨梓之屬

以自為櫨與頌琴

初櫨

觀

反

疏曰櫨

親身棺也

以親

近其身故

以櫨為名焉

以送終

以送終

以送終

禮記曰喪大記云君大棺八寸屬六寸枅四寸如  
彼記云諸侯之棺三重親身之棺名之為枅枅即  
枅是也其枅用楨為之屬與大棺乃用枅耳此以  
枅為枅者名之曰枅其內必無棺也擇枅為枅其  
枅必用

季文子取以葬君子曰非禮也禮無所逆

婦養姑者也虧姑以成婦逆莫大焉

穆姜成公母  
齊姜成公婦

襄公二年  
春秋左氏傳

定姒薨不殯于廟無枅不虞

枅親  
身棺

季氏以定姒本賤既無器備議其喪制  
欲殯不過廟又不反哭過古未反

匠慶謂季

文子

匠慶魯  
大夫

曰子為正卿而小君之喪不成

謂如  
季孫

所議則為夫  
人禮不成

不終君也

慢其母是不  
終事君之道

君長誰受其

咎

長丁丈反言襄公長將責季孫

初季孫為己樹六櫝於蒲圃

東門之外

季文子樹櫝欲自為櫝

匠慶請木

為定如作櫝

季孫曰

畧

不以道取為畧

匠慶用蒲圃之櫝季孫不御

御魚吕反止也御

止也傳言遂得成禮故經無異文

君子曰志所謂多行無禮必自

及也其是之謂乎

疏曰不以道取為畧畧人畧賣人是也季孫言畧令匠慶畧他

木也官非無木可用意欲不成其喪請木不順其意怒慶此請令畧木為之也匠慶又忿季孫未必無木可用故取季孫之櫝具意言遣我畧人我止畧女季孫令之為畧匠慶奉命而畧雖自被畧不得止之季孫此議自是無禮也被匠慶畧木是自及也襄公四年春秋左氏傳

宋元

公將如晉且召六卿曰寡人不佞不能事父兄

父兄

謂華以為二三子憂若以羣子之靈獲保首領以

向

沒唯是楸柟所以藉幹者

楸蒲田反柟步口反又音附 楸柟棺中琴牀

也幹骸骨也

琴力丁反

請無及先君仲幾對曰宋國之法死

生之度先君有命矣羣臣以死守之弗敢失隊臣

之失職常刑不赦臣不忍其死君命祇辱宋公遂

行已亥卒于曲棘葬宋元公如先君禮也

昭公二十五年

春秋左氏傳

凡諸侯薨于朝會加一等死王事加二

等於是乎有以袞斂

詳見變禮道有喪

季平子卒將以

君之璵璠斂贈以珠玉孔子初為中都宰聞之歷

級而救焉

歷級遽登階不聚足

曰送而以寶玉是猶曝尸於

中原也其示民以姦利之端而有害於死者安用

之且孝子不順情以危親忠臣不兆姦以陷君

兆姦

為姦之兆成也

乃止

家語

孔子之喪公西掌殯葬焉桐棺

四寸柏棺五寸

家語

孟子自齊葬於魯反於齊止

於嬴充虞請曰前日不知虞之不肖使虞敦匠事



嚴虞不敢請今願竊有請也木若以美然曰古者棺槨無度中古棺七寸槨稱之自天子達於庶人非直為觀美也然後盡於人心不得不以為悅無財不可以為悅得之為有財古之人皆用之吾何為獨不然且比化者無使土親膚於人心獨無悛乎吾聞之君子不以天下儉其親

詳見喪禮義

魯

平公將見孟子嬖人臧倉曰孟子之後喪踰前喪君無見焉公曰諾樂正子入見曰君奚為不見孟

軻也曰或告寡人曰孟子之後喪踰前喪是以不  
往見也曰何哉君所謂踰者前以士後以大夫前  
以三鼎後以五鼎與曰否謂棺槨衣衾之美也曰  
非所謂踰也貧富不同也

同上

大祝大喪徹奠

見始死  
奠條

右徹小斂奠

君將大斂子弁經即位于序端卿大夫即位于堂廉楹  
西北面東上父兄堂下北面夫人命婦尸西東面外宗

房中南面小臣鋪席商祝鋪絞紼衾衣士盥于盤上士

舉遷尸于斂上卒斂宰告子馮之踊夫人東面亦如之

子

經者未成服弁如爵弁而素大夫之喪子亦弁經疏  
曰子弁經即位序端者序謂東序端謂序之南頭也  
卿大夫即位序于堂廡西者卿大夫謂羣臣也堂廡謂  
堂基南畔廡稜之上楹謂南近堂廡者子位既在東序  
端故羣臣列于基上東楹之西也案隱義云堂廡即堂  
上近南雷為廡也北面東上者在基上俱北面東頭為  
上也子在東尸在阼階故在基者以為東上也父兄堂  
下北面者謂諸父諸兄不仕者以其賤故在堂下而鄉  
北以東為上也若士則亦在堂下外宗房中南面者外  
宗君之姑姊妹之女及姨舅之女也輕故在房中而鄉  
南也皇氏云當在西房以東為上也今謂尸在阼夫人  
命婦在尸西此外宗等當在東房小臣鋪席者謂下莞

欽定四庫全書

卷五

上簞數於阼階上供大斂也士喪禮云布席如初注云亦下莞上簞也鋪於阼階上於堂南北為少南商祝鋪絞紼衾衣者商祝亦是周禮喪祝也其鋪絞紼衾衣等致于小臣所鋪席上以待尸士盥于盤上者士亦喪祝之屬也周禮喪祝上士二人中士四人下士八人是將應舉尸故先盥手于盤上也雜記云士盥于盤北是也士舉遷尸于斂上者斂上即斂處也卒斂者大斂衣裝畢也宰告者大宰也斂畢大宰告孝子道斂畢也子馮之踊者孝子待得告乃馮尸而起踊夫人東面亦如之者亦馮尸而踊踊者夫人命婦俱東嚮於尸西今獨云夫人馮者命婦賤不得馮也馮竟乃斂於棺注云子弁經者未成服者成服則著喪冠也此云弁經是未成服此雖以大斂為文其小斂時子亦弁經君大夫士之子皆然故雜記云小斂環經公大夫士一也大夫之喪子亦弁經者案雜記云大夫與殯亦弁經與他殯事尚弁經明自為父母弁經可知其士則素冠故武叔小斂投

冠是諸侯大夫與天子士同喪大記

夫人東面坐馮之興踊

雜記案雜記

自外宗房中南面而下至夫人東面文並與大記同但夫人東面之下有坐馮之興踊五字別雜記注云此喪大記脫字重著於是令畧其同記其異者如此案始死條有卜人扶右射人扶左遷尸條有射人僕人遷尸小斂條自小宗伯涖斂以下十三條皆大斂通用當互考

大夫之喪將大斂既鋪

絞衾衾衣君至主人迎先入門右巫止于門外君釋采祝先入升堂君即位于序端卿大夫即位于堂廉楹西北面東上主人房外南面主婦尸西東面遷尸卒斂宰告主人降北面于堂下君撫之主人拜稽顙君降升主

人馮之命主婦馮之

先入門右者入門而右也。巫止者，君行必與巫巫主辟凶邪也。釋菜

禮門神也。必禮門神者，禮君非問疾弔喪不入。諸臣之家也。主人房外南面。大夫之子尊得升視斂也。疏曰

此明大夫大斂節也。主人迎者，主人適子也。適子，閭君至而出門迎君也。門右者，門內東邊也。適子出門迎君

望見馬首不哭不拜而先還入門右北面，注云：不哭，厭於君喪禮云：見馬首不哭，還入門右北面，注云：不哭，厭於君

不敢伸其私恩也。巫止於門外者，君臨臣喪，巫祝桃茢以辟邪氣，以禮敬主人，故不用將巫入，故止巫於門外

也。士喪禮云：巫止于廟門外，祝代之。君釋菜者，鄭云：禮門神也。君非問疾弔喪不入。諸臣之家，故禮門神而入

也。祝先入升堂者，巫止而祝代，入故先於君而入。門升自阼階也。祝以其事接通鬼神者也。君即位于序端者

君隨祝後而升堂，即位於東序之端，阼階上之東是適子臨斂處也。士喪禮云：君升自阼階，西鄉，主人房外南

面者主人鄉者在門右君升則主人亦升立君之北東  
房之外面向南俱欲視斂也遷尸者鄉鋪絞終衾衣而  
君至今列位畢故舉尸于鋪衣上也宰告主人道斂畢  
主人降西階堂下而鄉北立待君也君撫之者君臣情  
重方為分異故斂竟而君以手撫案尸與之別也主人  
拜稽顙者主人在堂下鄉北見君撫尸故拜稽顙以禮  
君之恩君降者君撫尸畢而下堂也升主人馮之者君  
命主人升還馮尸也主人升降皆西階也士喪禮云主  
人中庭君坐撫當心主人拜稽顙君降西鄉命主人馮  
尸主人升自西階由足西面馮尸不當君所命主婦馮  
之者君亦又命主婦馮尸也注云大夫之子尊得升視  
斂也者以士喪禮其子不得升今大夫之子將斂之時  
在房外南面故云大夫

士之喪將大斂君不在其餘禮

猶大夫也

其餘謂卿大夫及主婦之位疏曰其餘禮猶大夫也者謂鋪衣列位男女之儀事悉如

大夫也喪大記

公視大斂公升商祝鋪席乃斂

疏曰臣喪大斂君未

至之前主人雖已鋪席布絞給余聞君將來至則徹去之君至升堂而商祝更鋪席待君至乃斂也所以然者重榮君來為新之也亦示事由君也

雜記

君於大夫世婦大斂焉於士

為之賜大斂焉夫人於世婦大斂焉於諸妻為之賜大

斂焉

詳見殯後受吊條

右大斂

天子七日而殯諸侯五日而殯大夫三日而殯

尊者舒卑者速

疏曰天子諸侯位既尊重送終禮物其數既多許其申遂故日月緩也大夫及士禮數既卑送終之物其數



簡少又職惟促遽義許奪情故日月促也必至三日者冀其更生三日不生亦不生矣王制始死條有卜

人右射人左射人僕人遷尸並此條通用當考

君大夫髻爪實于綠中士埋

之髻音舜綠當為角聲之誤也角中謂棺內四隅也髻亂髮也將實爪髮棺中必為小囊盛之此綠或為

簠疏曰實于綠中者綠即棺角也其死者亂髮及手足之爪盛于小囊實于棺角之中士埋之者士亦有物盛髮爪而埋之注綠當為角者上文綠為色以飾棺裏非藏物之處以綠與角聲相近故讀綠為角喪大記

君蓋用漆三衽三束大夫蓋用漆二衽二束士蓋不

用漆二衽二束

用漆者塗合牡牝之中也衽小要也疏曰君蓋用漆者蓋棺上蓋用漆謂漆

其衽合縫處也三衽三束者衽謂燕尾合棺縫際也束謂以皮束棺也棺兩邊各三衽每當衽上輒以牛皮束

之故云三社三束也大夫蓋用漆二社二束者亦漆社合縫處也大夫士橫社有二每社有束故云二社二束也士蓋不用漆士卑故不漆也言二社二束者與大夫同檀弓云棺束縮二衡三者據君言也若大夫士橫惟二束此文是也故鄭注司士云結披必當棺束於束繫紐天子諸侯載柩三束大夫士二束喪大記曰君纁披六大夫披四前纁後玄士二披用纁人君禮文欲其數多圍數兩旁言六耳其實旁三是也皇氏不見鄭之此注以為此經大夫士二社二束者據披從束而言其橫皆為三束其義非也同上

天子之殯

也蔽塗龍輶以椁

蔽木以周龍輶如椁而塗之天子殯以輶車畫轅為龍

疏曰蔽叢也謂

用木叢棺而四面塗之龍輶者殯時輶車載柩而畫轅為龍以椁者亦題湊叢木象椁之形

加斧于

椁上畢塗屋

斧謂之黼白黑文也以刺繡於

繆幕加椁以覆棺已乃屋其上盡塗之

疏曰斧謂

繡覆棺之衣為斧文也先敢四面為椁使上與棺齊而上猶開也以棺衣從椁上入覆於棺故云加斧於椁上也畢塗屋者畢盡也斧覆既竟又四注為屋覆上而下四面盡塗之也天子之禮也

檀弓

君殯用輶櫨至于上畢塗屋大夫殯以幬櫨置于西序

塗不暨于棺

櫨猶敢也屋殯上覆加屋者也幬覆也暨及也此記參差以檀弓參之天子之殯居

棺以龍輶櫨木題湊象椁上四注如屋以覆之盡塗之諸侯輶不畫龍櫨不題湊象椁其他亦如之大夫之殯廢輶置棺西牆下就牆櫨其三面塗之不及棺者言櫨中狹小裁取容棺然則天子諸侯差寬大矣士殯

見衽塗上帷之

上不櫨掘地下棺見小要耳帷之鬼神尚幽闇也士達於天子皆然幬或作錦

或作塋喪大記

甸師喪事代王受胄哉

菜盛者祭祀之主也今國遭大喪若

云此黍稷不馨使鬼神不逞于王既殯大祝作禱辭授甸人使以禱藉田之神受胄哉弭後殃疏曰言喪事者謂王喪既殯後甸師氏於大祝取禱辭禱藉田之神胄過也代王受過災止後殃故為此禱也大祝作禱辭在既殯後者見大祝職云授甸人禱辭在天官大斂後大斂則殯故知在既殯後天官大祝大喪

言甸人讀禱

言猶語也禱六辭之屬禱也甸人喪事代王受胄哉大祝為禱辭語之使以禱於藉

田之神也

疏曰大祝掌六辭五曰禱故於王既殯作禱辭授甸人使以禱焉春官

小祝設

熬置銘

疏曰熬謂熬穀殯在堂時設於棺旁所以惑蚘蜋云置銘者銘謂銘旌書死者名既殯置於西

階上所表  
春官

右殯 布幕衛也縵幕魯也

詳見喪禮義

孺子犢之

喪

讀叶孫反 哀公之少子

魯

哀公欲設撥

撥可撥引輶車所謂緋

問於

有若有若曰其可也君之三臣猶設之

猶尚也以臣況子也

三臣仲孫叔

顏柳曰天子龍輶而棹幬

輶車也

幬覆也

殯以棹覆棺而塗之所謂最塗龍輶以棹

疏曰經直云龍輶知畫輶為龍者以輶之形狀

庫下而寬廣無似龍形唯輶與龍為形相類故知

畫輶也最塗龍輶以棹者輶外邊從累其木上與

棹齊乃最木為題湊 諸侯輶而設幬 輶不畫龍

為四阿棹制而塗之

龍輶此直云輶故云不畫龍其木亦不

題湊故鄭注喪大記云諸侯不題湊

為掄沈故

設撥

以水澆掄白皮之汁有

三臣者廢輶而設撥

竊禮之不中者也而君何學焉

正其學非禮也廢去也緋繫於輜三

臣於禮去輜今有緋是用輜僭禮也殯禮大夫菆置西序士掘垆見衽疏云喪大記大夫二綈二

碑是大夫有綈綈即緋也又注既夕禮云大夫以上始有四周謂之輜是大夫有輜也此云三臣於

禮去輜用輜僭禮不同者大夫以柩朝廟之時用輜緋唯殯時用輜軸不得用輜緋此文據殯時大

記及既夕禮謂朝廟及下棺也云大夫菆置西序士掘垆見衽者是喪大記文謂菆叢其木以郭三

面倚於西序垆謂穿地為坎深淺見其棺蓋上小要之衽言棺上小要之衽出於平地顏柳以有若

對非其實恐哀公從之以其正禮而言檀弓 惟殯非古也自敬姜之

哭穆伯始也

穆伯魯大夫敬姜穆伯妻文伯歎之母也禮朝夕哭不惟疏曰下文云

文伯之喪敬姜晝夜哭又國語云敬姜自績文伯諫之是也朝夕哭不惟是雜記文以孝子思念其親故朝夕哭時乃審徹其惟也今敬姜之哭穆伯以辟嫌之故遂朝夕哭不復徹惟故下文云穆伯之喪敬姜晝哭與此同也案春秋文十五年公孫敖之喪聲已不視惟堂而哭公孫敖亦是穆伯此聲已哭在堂下怨恨穆伯不欲見其堂故惟殯也姜哭於堂上遠嫌不欲見夫之殯故惟殯案張逸答陳鏗云敬姜早寡晝哭以避嫌惟殯或亦避嫌表夫之遠色也同上

天子諸侯之喪斬衰者奠大夫齊衰者奠

曾子問詳見士喪禮大

條 斂奠

右大斂奠

小宗伯辨吉凶之五服 司服掌王之吉凶衣服大

僕喪紀正王之服位詔法儀詔告也 內司服凡祭祀賓

客共后之衣服及九嬪世婦共其衣服共喪衰亦如之

疏曰外命婦喪衰謂王服齊衰於后無服若九嬪已下及女御於王服斬衰於后服齊衰也 天官 追

師追丁回反 追治玉石之名 一曰彫 掌王后之首服為九嬪及外內

命婦之首服以待祭祀賓客喪紀共筭經亦如之天官

內宰凡喪事佐后使治外內命婦正其服位使其屬之上士



內命婦謂九嬪世婦女御鄭司農云外命婦卿大夫之妻王命其夫后命其婦玄謂士妻亦為命婦疏曰凡有喪事內宰皆佐后使其屬官治內外之命婦正其服之精麤位之前後也以外內命婦卑故內宰不自治之故經云使其屬之上士治之內命婦不言三夫人者三夫人從后不在治限故不言也司農云王命其夫后命其婦者先鄭見禮記玉藻云君命屈狄是子男夫人彼是后命之明王朝之臣亦王命其夫后命其婦可知玄謂士妻亦為命婦者夏殷之禮爵命不及於士周之禮上士三命中士再命下士一命夫尊于朝婦榮于室明士妻亦為命婦可知若然喪服命夫命婦皆據大夫不命士者彼據降服不降服為說故惟據大夫為命夫其妻為命婦不及

諸子大喪正羣子之服位

疏曰位謂在殯宮外

內哭位也正其服者公卿大夫之子為王斬衰與父同故雜記大夫之子得行大夫禮

肆師禁

外內命男女之衰不中灋者且授之杖

外命男六卿以出也內命男朝

廷卿大夫士也其妻為外命女喪服為夫之君齊衰不杖內命女王之三夫人以下不中法違升數與裁制者鄭司農云三日授子杖五日授大夫杖七日授士杖此舊說也喪大記曰君之喪三日子夫人杖五日既殯授大夫世婦杖無七日授士杖文玄謂授杖日數王喪依諸侯與七日授士杖四制云疏曰外內命男女為王雖有齊斬不同其衰皆有升數多少及裁制故禁之使依法也授之杖者外內命男及內命女皆為王斬者有杖授之其外命女為王齊衰無杖故云且者見不定之詞也喪服為夫之君見喪服不杖齊衰章內命女三夫人以下者通九嬪二十七世婦八十一御妻皆為王斬衰而杖也言升數者諸臣妻為夫之君義服衰六升諸臣為王義服斬衰衰三升半冠六升三夫人已下為王正服斬衰衰三升是其數也言裁制者喪服云凡衰外

削幅裳內削幅幅三禡以下具有裁制也司農所云授杖之日仍是四制之文也王喪諸臣等無授杖之日數以諸侯之臣與王之臣同斬衰杖竹故授杖日數亦宜同也檀弓云天子崩三日祝先服明子與夫人亦服矣則天子之子及后亦服矣五日官長服明天子三公已下及三夫人已下亦服矣但服杖同時有服即杖矣唯天子服授杖亦當七日矣是以天子崩三日祝先服王喪約同諸侯之制也春官天子崩三日祝先服祝佐含斂先病疏曰祝大祝也服服杖也是喪服之數故呼杖為服祝佐含斂先病故先杖也然云祝服故子亦三日五日官長服官長大夫士疏曰官長大夫而杖也五日官長服士也亦服杖也病在祝後故五日也七日國中男女服及庶人在官者服謂齊衰三月而除之必待七日者天子七日而殯三月天下服諸侯之殯後嗣王成服故民得成服也

三月天下服者謂諸侯之大夫為王總衰既葬而除之也近者亦不待三月今據遠者為言耳然四條皆云服何以知其或杖服或衰服案喪大記云君之喪三日子夫人杖五日既殯授大夫世婦杖又喪四制云三日授子杖五日授大夫杖七日授士杖案如大記及四制則知今云三日五日服杖明矣其七日及三月者唯服而已無杖四制云七日授士杖此云五日士杖者士若有地德深則五日若無地德薄則七日崔氏云此據朝廷之士四制是邑

君之喪三日予夫人杖五日既殯

宰之士也 檀弓

授大夫世婦杖

三日者死之後三日也為君杖不同日人君禮大可以見親疏也疏曰熊氏

云子杖通女子子在室者若嫁為他國夫人則不杖嫁為卿大夫之妻與大夫同五日杖也君之女及內宗外宗之屬嫁為士妻及君之女

御皆七日杖也 喪大記

大夫之喪三日之朝既

殯主人主婦室老皆杖

疏曰死後三日既殯之後乃杖應杖者三日悉杖也 同上

士之喪二日而殯三日之朝主人杖婦人皆杖

士二日而

殯下大夫也士之禮死與往日生與來日此二日於死日亦得三日也婦人皆杖者主婦容妾為君女子子在

室者

疏曰婦人是衆羣婦故云妾及女子子以其皆杖故也 同上

子皆杖不以即

位

子謂凡庶子也不以即位與去杖同 疏曰皇氏云子謂大夫士之庶子也不以杖即位辟適子也 同

上 公之喪諸達官之長杖

謂君所命雖有官職不達於君則不服斬 疏曰公

者五等諸侯也諸者非一之詞達官為國之卿大夫士被君命者也不達於君謂府史之屬也賤不被命是不達於君也不服斬衰但齊三月耳故喪服齊衰三月章有庶人為國君即此是也 檀弓

右成服

君於大夫世婦大斂焉為之賜則小斂焉

為之賜謂有恩惠也疏

曰此經以下至君退必奠明君於大夫及士并夫人於大夫士恩賜弔臨及主人迎送之節此論君於大夫世婦之禮此世婦謂內命婦大斂為常為之恩賜則小斂而往然則君於大夫大斂是常小斂是恩賜案隱元年公子益師卒公不與小斂故不書日者熊氏云彼謂卿也卿則小斂焉為之賜則未襲而往故昭十五年有事於武宮籥入叔弓卒去樂卒事公羊云君聞大夫之喪去樂卒事而往可也故鄭云去樂卒事而往未襲也是卿未襲而往案柳莊非卿衛君即弔急弔賢也於外命婦既加蓋而君至

於臣之妻

畧也疏曰外命婦恩輕故既大斂入棺加蓋之後而君至也則知大夫及世婦未加蓋以前君至也於

士既殯而往為之賜大斂焉夫人於世婦大斂焉為之

賜小斂焉於諸妻為之賜大斂焉於大夫外命婦既殯

而往

疏曰此經明君賜及夫人於大夫士及妻妾恩賜之差於諸妻為之賜大斂焉諸妻姪婦及同姓女

也同士禮故為之賜大斂焉若夫人姪婦尊同世婦當大斂焉為之賜小斂焉於大夫外命婦既殯而往者謂

夫人於大夫及外命婦既殯而往但有一禮無恩賜差降之事大夫士既殯而君往焉

使人戒之主人具殷奠之禮俟于門外見馬首先入門

右巫止于門外祝代之先君釋菜于門內祝先升自阼

階負墉南面君即位于阼小臣二人執戈立于前二人

立于後

殷猶大也朝夕小奠至月朔則大奠君將來則具大奠之禮以待之榮君之來也祝負墉南面

直君北房戶東也小臣執戈先後君君升而夾階立大夫殯即成服成服則君亦成服錫衰而往弔之

疏曰

負墉南面者墉壁也祝先升自阼階在君之北立於房戶之東皆負壁而向南也

擯者進

當贊主人

也始立門東北面

主人拜稽顙君稱言視祝而踊主人踊

稱言舉所

以來之辭也視祝而踊祝相君之禮當節之也

大夫則奠可也士則出俟于門

外命之反奠乃反奠卒奠主人先俟于門外君退主人

送于門外拜稽顙

迎不拜拜送者拜迎則為君之答已疏曰此明君來弔士與大夫其禮

不同大夫則奠可也君既在阼主人在庭踊畢則釋此殷奠于殯可也言對人居可為此奠士卑不敢留君待



奠故先出俟君于門外謂君將去也君使人命反設奠士乃反入設奠也卒奠者設奠畢也奠畢主人又先出門待君大夫士同然君退者出去也主人於門外送之而拜也云迎不拜拜送者拜迎則為君之答已者案曲禮凡非弔喪非見國君無不答拜然則喪法孝子拜賓無答拜之理令者君出孝子雖拜君無答理而云拜迎則為君之答已者以尋常禮敵孝子雖拜賓無答理令君來臨臣臣既拜迎尊卑禮隔意恐君之答已故不敢拜迎案僖二十四年左傳宋先代之後於周為客有喪拜焉者謂其餘諸侯來弔國喪以其卑王不拜之若宋來弔王用敵禮拜謝之亦是主人拜賓之義也

君於大夫疾三問之在殯三往

馬士疾一問之在殯壹往焉

所以致殷勤也

君弔則復殯服

復反

也反其未殯未成服之服

新君事也謂臣喪既殯後君始來弔也復或為服

疏曰謂臣喪大斂與殯之時君

有故不得來至殯後主人已成服而君始來弔主人則反復殯時未成服之服反服此服新君之事其服則苴經免布深衣也不散帶故小記云君弔雖不當免時也主人必免不散麻注云為人君變貶於大斂之前既啟之後

夫人弔於大夫士主人出迎于門外見馬首先入

門右夫人入升堂即位主婦降自西階拜稽顙于下夫人視世子而踊奠如君至之禮夫人退主婦送于門內

拜稽顙主人送于大門之外不拜視世子而踊世子從夫人以為節也世子

之從夫人位如祝從君也疏曰此明夫人弔臣禮先入門右謂大門也謂孝子迎君之妻禮亦如迎君禮也

夫人入升堂即位者亦升阼階西鄉如君也主婦臣妻也既夫人來弔故婦人為主人當夫人升堂即位時而

主婦從西階而下拜稽顙於堂下如男主也世子夫人之世子隨夫人來也夫人來弔則世子在前道引其禮如祝道君也奠如君至之禮者亦先戒具殷奠夫人即位哭後主婦拜竟而設奠事如君弔禮者若士則亦主人先出而聽命反奠也夫人退主婦送于門內拜稽顙者門寢門也婦人迎送不出門故夫人去於路寢門內而拜送之不拜迎而拜送義與君同也主人送于大門之外不拜者亦如送君也而不拜者喪無二主主婦已拜故主大夫君不迎于門外入即位于堂下主人北面人不拜

衆主人南面婦人即位于房中若有君命命夫命婦之

命四鄰賓客其君後主人而拜入即位於下不升堂而位阼階之下西面下正

君也衆主人南面於其北婦人即位於房中君雖不升堂猶辟之也後主人而拜者將拜賓使主人陪其後而

君前拜不俱拜者主人無二也疏曰不迎於門外者  
貶於正君謂大夫下臣稱大夫為君故曰大夫君也大  
夫君入寢門不得升堂乃即阼階下位而西鄉也主人  
北面者主人適子也其君既即阼階下位故適子辟之  
位所以在君之南北面也婦人之位在堂其君既來故  
婦人並位于東房中也此言婦人即位于房中非止大  
夫之君亦總正君來禮如此也又前君臨大斂云主婦  
尸西不言辟者大斂哀深故不辟君今既殯後哀殺故  
辟也若當此大夫君來弔時或有其本國之君命或有  
國中大夫命婦之命或有昔經使四鄰之國卿大夫遣  
使來弔若或有此諸侯在庭則此大夫之君代主人拜  
命及拜諸賓也所以爾者喪用尊者拜賓故也君雖代  
為主而猶不敢同於國君專代為主故以主人陪置君  
之後也主人在君後而拜謂君先拜主人後拜也云主  
人無二也者以經云其君後主人而拜是君在前主人  
在後又君拜在前主人拜在後是主人立與拜皆在君

後不與君同時拜君既為主當君弔見尸柩而後踊塗之

推君在前故云主人無二也

往不踊也疏曰君弔臣唯見尸柩乃踊者若不見尸柩

則不踊案前文既殯君往視祝而踊者皇氏云雖殯未塗

則得踊故鄭此注云塗之後雖往不踊也是既殯未塗

塗得有踊也此一節未小斂既小斂受弔通用大

夫士若君不戒而往不具殷奠君退必奠祭君之來

戒故臣不得具殷奠君退必奠者君來不先戒當時雖

不得殷奠而君去後必設奠告殯以榮君來故也喪

大記未小斂受弔條有庶子不受弔宋成公如鄭

又奉尸夷于堂後迎賓送賓皆此條通用當互考

### 右殯後受弔

天府凡國之玉鎮大寶器藏焉若有大祭大喪則出而

陳之既事藏之

玉鎮大寶器玉瑞玉器之美者禘祫及大喪陳之以華國顧命陳寶赤刀大訓

弘璧琬琰在西序大玉夷玉天球河圖在東序盾之舞衣大貝鼗鼓在西房兕之戈和之弓垂之竹矢在東房

此其行事見於經

春官

典路若有大祭祀則出路贊駕說大喪

亦如之

亦出路當陳之書顧命陳先王寶器又曰大路在賓階面綴路在阼階面先路在左塾之前次

路在右塾之

前春官

右陳寶器

案即位之別有四正嗣子之位已見始死條下顧命有王麻冕黼裳道揚末命

及康王之誥有惟予一人釗報誥之語乃既殯之後嗣君即繼體之位之禮令附見于此若踰年合

正改元之位三年合正踐阼之位如春秋元年書即位則是踰年正改元之位也正月元日舜格于

文祖伊尹以冕服奉嗣王歸于亳則是三年正踐  
阼之位也然崩薨之日或在歲終則蓋有未殯而  
踰年者矣故踰年正繼體之位之禮遂無所附喪  
大記補經亦止於虞禮則三年之禮亦無所附今  
併列於此記之下其義則見於下文春秋傳  
注疏與喪禮義白虎通之說所當通考也

乙丑

王崩丁卯命作冊度

三日命史為冊書法度傳顧命於康王

越七日

癸酉伯相命士須材

伯相息亮反邦伯為相則召公於丁卯七日癸酉召公

命士致材木須待以供喪用

疏曰須待也召公

命士致材木須待以供喪用謂棹與明器是喪之

雜用也案士喪禮將葬筮宅之後始作棹及明器

此既殯即須材木者以天子禮大當須預營之故

禮記云虞人致百祀之木可為

狄設黼宸綴衣

狄

棺槨者斬之是與士禮不同

士庖屏風畫為斧文置戶牖間復設幄帳象平生  
所為 疏曰經於四坐之上言黼黻綴衣則四坐

皆設 牖間南嚮敷重篋席黼純華玉仍几 嚮許亮  
之 反篋眠

結反純之尹反又之閏反下同 篋桃枝竹白黑  
雜繒緣之華彩色華玉以飾憑几仍因也因生時

几不改作此見羣 西序東嚮敷重底席綴純文貝  
臣覲諸侯之坐

仍几 底之履反馬云青蒲也 東西廂謂之序底  
弱革綴雜彩有文之貝飾几此旦夕聽事之

坐 東序西嚮敷重豐席畫純彫玉仍几 豐莞彩色  
為畫彫刻

鏤此養國老 西夾南嚮敷重筍席玄紛純漆仍几  
饗君臣之坐

夾工洽反徐音頰筍悉允反 西廂夾室之前筍  
弱竹玄紛黑綬此親屬私宴之坐故席几質飾



越玉五重陳寶

越玉馬云越地所獻玉也重直容反於東西序坐北列玉五重又陳先王所

寶之器物

赤刀大訓弘璧琬琰在西序

琬紆琰反琰以冉反寶刀赤刃削

大訓虞書典謨大璧琬琰之珪為二重削音笑

大玉夷玉天球河圖在

東序

夷玉東夷之美玉說文夷玉即珣玕琪天球音求馬云玉磬三玉為三重夷常也球雍

州所貢河圖八卦伏羲氏王天下龍馬出河遂則其文以畫八卦謂之河圖歷代傳寶之

舞衣大貝鼗鼓在西房

鼗扶云反盾國所為舞者之衣皆中法大貝如車

渠鼗鼓長八尺商周傳寶之西房西夾坐東

兕之戈和之弓垂之竹矢

在東房

兕和古之巧人垂舜共工所為皆中法故亦傳寶之東房東廂夾室

大輅在

賓階面綴輅在阼階面

大輅玉綴輅金面  
前皆南向

先輅在左

塾之前次輅在右塾之前

塾音孰一音育  
象次輅木金玉象皆以

凡陳列皆象成王生時華國之事所以重顧命  
飾車木則無飾皆在路寢門內左右塾前北面二

人雀弁執惠立于畢門之內

弁皮彥反徐扶變反  
士衛殯與在廟同

故雀韋弁惠三隅矛路寢門一名畢門  
入廟助祭乃服雀弁於此服雀弁者士衛王殯與

在廟同故雀韋弁也鄭玄曰赤黑曰雀言如雀頭  
色也雀弁制如冕黑色但無藻耳然則雀弁所用

當與冕同言雀韋弁者蓋以周禮司服云凡兵  
事韋弁服此人執兵宜以韋為之異於祭服

人綦弁執戈上必夾兩階阼

綦音其馬本作駢云  
青黑色阼音侯徐音

士 綦文鹿子皮弁亦士堂廡曰 一人冕執劉立  
祀士所立處 廡力占反稜也

于東堂一人冕執鉞立于西堂

鉞音越說文云大斧也 冕皆大夫

也劉鉞屬立于 一人冕執鉞立于東垂一人冕執

瞿立于西垂

幾音遠瞿其俱反徐音懼 幾 瞿皆戟屬立于東西下之階上 一人

冕執銳立于側階

銳以視反 銳矛屬也側階北下立階上 疏曰堂上而言東

垂西垂知在堂上之遠地堂之遠地當於序外東  
廂西廂必有階上堂知此立于東西堂之階上也  
鄭王皆以側階為東下階也然立于東垂者已在  
東下階上何由此人復共並立故傳以為北下階  
上謂堂北階北階則惟堂  
北一階而已側猶持也 王麻冕黼裳由賓階墜

隋子西反徐子諳反王及羣卿士邦君麻冕蟻

裳入即位

蟻魚綺反公卿大夫及諸侯皆同服亦廟中之禮蟻裳名色玄

太保

太史太宗皆麻冕彤裳

執事各異裳彤纁也太保太宗即宗伯也

太保

承介圭上宗奉同瑁由阼階

隋瑁莫告反大圭尺二寸天子守之

故奉以奠康王所位同爵名瑁所以冒諸侯圭以齊瑞信方四寸邪刻之用阼階升由便不嫌太

史秉書由賓階

隋御王冊命太史持冊書願命進康王故同階疏曰

此將傳顧命布設位次即上所作法度也邦君即位既定然後王始升階但以君臣之序先言王服因服之下即言升階從省文又曰禮績麻三十升以為冕王麻冕者蓋袞冕也黼裳者以裳之章色

黼黻有文也禮無蟻裳今云蟻者裳之名也蟻者  
蚍蜉蟲也此蟲色黑知蟻裳色玄以色玄如蟻故  
以蟻名之禮祭服皆玄衣纁裳此獨云玄裳者卿  
士邦君於此無事不可全與祭同改其裳以示變  
於常也太保太史太史有所主者則純如祭服暫從吉  
也太保太史太宗三官者皆執事俱彤裳而言各  
異裳者各自異於卿士邦君也彤赤也禮祭服纁  
裳纁是赤色之淺者故以彤為纁言是常祭服也  
玉人云鎮圭尺有二寸天子守之鎮圭圭之大者  
介訓大也故知是彼鎮圭天子之所守故奉之以  
奠康王所位以明正位為天子也上宗奉同瑁則  
下文云天子受同瑁太保必奠於位其奉介圭下  
文不言受者以同瑁并在其手故不得執之太保  
必奠於其位但文不見耳禮於奠爵無名同者但  
下文祭酢皆用同奉酒知同是酒爵之名也玉人  
云天子執冒四寸以朝諸侯鄭注云名玉曰冒者

言德能覆蓋天下也四寸者方以尊接卑以小為  
貴禮天子所以執瑁者諸侯即位天子賜之以命  
圭圭頭邪銳其瑁當下邪刻之其刻濶狹長短如  
圭頭諸侯來朝執圭以授天子天子以冒之刻處  
冒彼圭頭若大小相當則是本所賜其或不同則  
圭是偽作知諸侯信與不信故天子執瑁所以冒  
諸侯之圭以齊瑞信者也詐階者東階也禮凶事  
設洗於西階西南古事設洗於東階東南此太保  
上宗皆行吉事盥洗在東故用詐階升由便以卑  
不嫌為主人也太史持冊書顧命欲以進王故與  
王同升西階鄭玄云御猶嚮也王此時立賓階上  
少東太史東面於殯西南而讀冊書以命王嗣位  
之事曰皇后憑玉几道揚末命命汝嗣訓大君成王  
道稱揚終命所以感動康王命臨君周邦率循大  
汝繼嗣其道疏曰以訓為道

卞卞皮彥反保扶變反用是變和天下用答揚

文武之先訓

言用和道和天下用對揚聖祖文武之大教叙成王意

王再拜

興答曰眇眇予末小子其能而亂四方以敬忌天

威

言微微我淺末小子其能如父祖治四方以敬忌天威德乎謙辭託不能

乃受同瑁

王三宿三祭三咤

咤陟嫁反亦作宅又音妬徐又音托又豬夜反說文作託丁故

反奠爵也馬本作訖

與說文音義同王受瑁為主受同以祭禮成於三故酌者實三爵於王王三

進爵三祭酒三奠爵告已受羣臣所傳顧命曰實三爵於王當是實三爵而續送三祭各用一

同非一同而三反也

上宗曰饗

祭必受福讚王曰饗福酒

太保受同降

受王

所饗同下

堂反於籩 鹽以異同秉璋以酢

酢才各反 以鹽手洗異同實

太保

酒秉璋以酢祭半圭曰璋臣所奉王以祭太保又祭報祭曰酢

授宗人同拜王答

拜

宗人小宗伯佐太宗者太宗供王宗人供太保拜白已傳顧命故授宗人同拜王答拜尊所受

命

供音恭

傳顧命訖也將欲拜故先授宗人同拜者自成王言已

神不拜康王但白神言已傳顧命王答拜者尊所受之命亦告神使知故答拜也

太保受

同祭濟

濟才細反 太保既拜而祭既祭受福濟至齒則王亦至齒王言饗太保言濟互相

音戶

宅授宗人同拜王答拜

宅如字馬同徐殆故反 太保居其

所授宗人同拜白成王以事畢王答拜敬所白 疏曰宅訓居也太保居其所於受福酒之處足不



移為將拜故授宗人同祭祀既畢而更拜者自成  
王以事畢也既拜白成王以傳顧命事畢則王受  
顧命亦畢王答太保降收有司於此盡收徹可知  
拜敬所白也

丑列反徐  
直列反

諸侯出廟門侯

言諸侯則卿士已下亦可知殯之所處故曰廟

皆待王後命

書顧命

康王既尸天子遂誥諸侯作康王

之誥

既受顧命羣臣陳戒遂報誥之因事曰遂

康王之誥王出在應門

之內

出畢門立應門之中庭南面

太保率西方諸侯入應門左

畢公率東方諸侯入應門右

二公為二伯各率其所掌諸侯隨其方為

位皆  
北面

皆布乘黃朱

乘繩證反朱鬣以為庭實

諸侯皆陳四黃馬鬣力輒反

賓稱奉圭兼幣曰一二臣衛敢執壤奠

賓諸侯也舉奉圭兼

幣之辭言一二見非一也為蕃衛故曰臣衛來朝而過國喪遂因見新王敢執壤地所出而奠幣也

見賢遍反贊音至

皆再拜稽首王義嗣德答拜

諸侯拜送幣而首至

地盡禮也康王以義繼先人明德答其拜受其幣

太保暨芮伯咸進相揖

皆再拜稽首

不言諸侯以外見

曰敢敬告天子皇天改大

邦殷之命惟周文武誕受姜若克恤西土

姜羊父反馬云

道也

言文武大受天道而順之能憂我西土之民本其所起

惟新陟王畢協賞

罰戡定厥功用敷遺後人休令王敬之哉張皇六

師無壞我高祖寡命

無壞音怪 言當張大六師之衆無壞我高德之祖寡有

之教命

疏曰王肅云美文

王少有及之故曰寡有也

王若曰庶邦侯甸男

衛

不言羣臣以外見內

惟予一人釗報誥昔君文武丕平富

不務咎

言先君文武道大政化平美不務咎惡

底至齊信用昭明于

天下

底之履反 致行至中信之道用顯明于天下言聖德洽

則亦有熊羆之

士不二心之臣保乂王家用端命于上帝皇天用

訓厥道付畀四方

君聖臣良用受端直之命於上天天用順其道付與四方之國

王天

乃命建侯樹屏在我後之人

言文武所施命令立諸侯樹以

欽定四庫全書

卷五

為藩屏傳王業在我後之人謂子孫

今予一二伯父尚胥暨顧綏爾

先公之臣服于先王

天子稱同姓諸侯曰伯父言令我一二伯父庶幾相與顧

念文武之道安汝先公之臣服於先王而法循之

雖爾身在外乃心罔不

在王室用奉恤厥若無遺鞠子羞

鞠居六反當各用心奉憂其

所行順道無自荒怠遺我稚子之羞辱

羣公既皆聽命相揖趨出王

釋冕反喪服

或問康王釋喪服而被裳冕且受黃朱圭幣之獻諸家以為禮之變獨蘇

氏以為禮之失朱先生答曰天子諸侯之禮與士庶人不同故孟子有吾未之學之語蓋謂此類耳

如伊訓元祀十二月朔亦是新喪伊尹已奉嗣王祇見厥祖固不可用凶服矣或問居喪朝服朱

先生曰麻冕乃是祭服顧命用之者以其以後繼  
統事于宗廟故也受冊用之者以其在廟而凶服  
不可入故也舊說以廟門為殯宮之門不知是否  
若朝服則古者人君亮陰三年自無變服視朝之  
禮第不知百官總已以聽冢宰冢宰百官各以何  
服蒞事耳想不至便用玄冠黑帶也後世既無亮  
陰總已之事人主不免視朝聽政則豈可不酌其  
輕重而為之權制乎又況古者天子皮弁素積以  
日視朝衣冠皆白不以為嫌則今在喪而白衣衣  
冠以臨朝恐未為不可但入太廟則須吉服而小  
變耳

成湯既沒太甲元年

太甲太丁子湯孫也太丁未立而卒及湯沒而

太甲立伊尹作伊訓惟元祀十有二月乙丑伊尹

祠于先王

此湯崩踰月太甲即位奠殯而告疏曰傳解祠先王奠殯而告是言祠是奠

也祠喪于殯斂皆名為奠虞祔卒哭始名為祭知祠非宗廟者元祀是初喪之時未得祠廟故知祠實是奠也奠祠俱是享神故可以祠言奠亦由於時猶質未有節文周時則有異故解祠為奠耳又曰太甲中篇云三祀十有二月伊尹以冕服奉嗣王則是除喪即吉明十二月服終禮記稱三年之喪二十五月而畢知此年十一月湯崩湯崩踰月太甲即位奠殯而告亦如周康王受顧命尸於天子春秋之世既有奠殯即位踰年即位此踰月即位當奠殯即位也此言伊尹祠于先王是特設祀也嗣王祇見厥祖是始見祖也特設祀禮而王始見祖明是初即王位告殯為喪主也

奉嗣

王祇見厥祖侯甸羣后咸在百官總已以聽冢宰

伊尹制百官以三公攝冢宰

春秋文公九年毛伯來求金何

以不稱使當喪未君也踰年矣何以謂之未君

據崩

在八年踰年即位

即位矣而未稱王也未稱王何以知其

即位以諸侯之踰年即位亦知天子之踰年即位也以天子三年然後稱王亦知諸侯於其封內三年稱子也

緣終始之義一年不二君

故君薨稱子其既葬稱子

緣臣民

之心不可曠年無君

故踰年稱公

緣孝子之心則三年

不忍當也

不忍當公位天子未除喪曰予小子

注云

謙未敢稱

一人春秋傳曰以諸侯之踰年即位亦知天子之踰年即位以天子三年然後稱王亦知諸侯於其封內三年稱子疏曰天子踰年即位無文約魯十二公諸侯三年內稱子亦無文約天子踰年不稱使也是天子諸侯互相明也又准左傳之義諸侯薨而嗣子即位凡有三時一是始喪即適子之位二是踰年正月即一國正君臣之位三是除喪而見於天子天子命之嗣列為諸侯之位今此踰年即位是遭喪明年為元年正月即位白虎通云父沒稱子其屈於尸柩也既葬稱子者即尊之漸也踰年稱公者緣臣民之心不可一日無君終始之義一年不二君故踰年即位保臣民之心也

文公元年春王正月公即位

先君未葬而公即位不可曠年無君

曰諸侯之禮既葬成君先君雖未葬既踰年而君即位不可曠年無君故也釋例云遭喪繼立者每



新年必改元正位百官以序故國史書即位于策以表之文公成公先君之喪未葬而書即位因三正之始明繼嗣之正表朝儀以固百姓之心此乃國君明分制之大禮譬周康王麻冕黼裳以行事事畢然後反喪服也杜引顧命康王之事以譬此者彼是既殯此是踰年雖時不同取其暫服吉服事相似耳又案釋例曰尚書顧命天子在殯之遺制也推此亦足以準諸侯之禮矣

定公

元年夏六月公之喪至自乾侯戊辰公即位

諸侯薨五

日而殯殯則嗣子即位癸亥昭公喪至五日殯於宮定公乃即位疏曰公羊穀梁皆云正棺於兩楹之間然後即位案正棺兩楹之間即禮所謂夷于堂者也喪大記君薨之禮云既小斂男女奉尸夷于堂鄭玄云士之既殯諸侯之小斂於死者俱三日戊辰去癸亥五日非正棺之日不得為正棺

即位也雜記云諸侯行而死歸至于廟門遂入適所殯鄭玄云適所殯謂兩楹之間自外來者正棺於兩楹之間尸亦夷之於此因殯焉殯必於兩楹之間者以其死不於室而自外來留之於中不忍遠也鄭取二傳之說言死從外來者殯在兩楹之間若謂殯為正棺則與杜言合矣左氏傳

癸亥公之喪至自乾侯則曷為以戊辰之日然後

即位正棺於兩楹之間然後即位

公羊傳

沈子曰

正棺乎兩楹之間然後即位也內之大事日即位君之大事也其不日何也以年決者不以日決也此則其日何也踰年即位厲也

厲危也公喪在外踰年六月乃得即

位危故  
日之

於厲之中又有義焉

先君未殯則後君不得即位

未殯

雖有天子之命猶不敢況臨諸臣乎

以輕喻重也雖為天子所

召不敢背殯而往況君喪未殯而行即位之禮以臨諸臣乎

背音佩

周人有喪魯

人有喪周人弔魯人不弔周人曰固吾臣也使人

可也魯人曰吾君也親之者也使大夫則不可也

君至尊也去父之殯而往弔猶不敢況未殯而臨

諸臣乎

穀梁傳

月正元日舜格于文祖

月正正月元日上日

也舜服堯喪三年畢將即政故復至文祖廟告文祖者堯文德之祖廟

惟三祀十

有二月朔伊尹以冕服奉嗣王歸于亳

詳見祥禪記禪易服

居倚廬不塗君為廬宮之大夫士禫之

宮謂園障之也禫袒也謂不障

疏曰此論初遭喪君大夫士居廬之禮居倚廬者謂於中門之外東牆下倚木為廬故云居倚廬不塗者但以草夾障不以泥塗之也君為廬宮之者謂廬外以帷障之如宮牆大夫士禫之者禫袒也其廬袒露不帷障也案既夕禮注云倚木為廬在中門外東方北戶喪大記

宮正大喪則授廬舍

辨其親疎貴賤之居

廬倚廬也舍壘室也親者貴者居倚廬疎者賤者居壘室雜記曰大

夫居廬士居壘室疏曰云廬倚廬也者謂於路門之外東壁倚木為廬云舍壘室也者舍對廬為壘室壘室者兩下為之與廬異故云壘室也云親者貴者居倚廬者親謂大功已上貴謂大夫已上者居倚廬云疎者賤

者居堊室者疎謂小功總麻賤謂士二者居堊室知義  
如此者以其經云辨其親疎貴賤明當如此解之也又  
引雜記者彼是諸侯之臣其大夫居廬士居堊室彼  
注士居堊室亦謂邑宰也朝廷之士亦居廬 天官

### 右居廬

書曰高宗梁闇三年不言何謂梁闇也

傳曰高宗居凶廬三年不言此之謂梁闇子張曰

何謂也孔子曰古者君薨王世子聽于冢宰三年

不敢服先王之服履先王之位而聽焉以民臣之

義則不可一日無君矣不可一日無君猶不可一

日無天也以孝子之隱乎則孝子三年弗居矣

隱痛

也字或為殷故曰義者彼也隱者此也遠彼而近此則

孝子之道備矣

尚書大傳案禮記作諒闇鄭玄以為凶廬論語作諒陰孔氏曰諒

信也陰默也字義各不同禮記論語見喪通禮言語條

滕定公薨世子五

月居廬未有命戒百官族人可謂曰知

詳見喪服

外宗大喪則敘外內朝莫哭者

內內外宗及外命婦疏曰經直云外內鄭云

內外宗及外命婦則內中以兼外宗外中不見內命婦也經不云內外宗內外命婦者意欲見內是內宗舉內以見外其中則不得舉外以見內以其內命婦九嬪敘之也故九嬪職云大喪帥敘哭者注云后哭衆乃哭是內命婦九嬪敘之故鄭亦不言內命婦春官

世婦大喪比外內命婦之

朝莫哭不敬者而苛罰之

苛謹也 疏曰大喪謂王喪 殯後有朝夕哭事外命婦朝

廷卿大夫士之妻內命婦九嬪已下以尊卑為位而哭 而有不敬者則呵責罰之 春官 哭位條內有天子

之喪別姓而哭肆師令序哭內宗序 哭九嬪帥敘哭並此條通用當互考 朝夕哭不惟 孝

子心欲見殯殯也既出則施 其屨鬼神尚幽闇也 雜記 士備入而后朝夕踊 猶備

盡也國君之喪嫌主人哭入則踊 疏曰此一節論君 喪羣臣朝夕哭踊之事備盡也國君喪嗣國孝子雖朝

夕先入即位哭必待諸臣皆入列位畢後乃俱踊者也 士卑最後故舉士入為畢也所入有前後而相待踊者

孝子哀深故前入也踊須相 視為節故俟齊也 檀弓

## 右朝夕哭

大祝徹奠

見始死奠條

右徹大斂奠

司服大喪共其奠衣服

奠衣服令坐上視衣也疏曰

斂之餘也至祭祀之時則出而陳於坐上則此奠衣服者也春官陳小斂奠條內有封人飾牛牲等七官又陳大斂條內有司几筵設葦席素几皆此條所通用此條後凡奠通用當互考

右朝夕奠

籩人喪事共其薦籩羞籩

謂殷奠時疏曰殷猶大也大奠朔月月半薦新祖奠遣

奠之類也案士喪禮月半不殷奠注云士月半不復如朔月盛奠下尊者疏云下尊者以下大夫以上有月



半奠故士禮月半不殷奠而此有月半奠也 天官

陳小斂奠條內有封人等七官陳大斂條內有司几筵

設葦席素几朝夕奠條內有司服共奠衣服皆此條通用此條凡後殷奠通用當考 天子諸侯

之喪斬衰者奠大夫齊衰者奠 詳見大斂奠章 外饗凡小喪

紀陳其鼎俎而實之 疏曰小喪紀謂夫人以下之喪陳其鼎俎謂殷奠及虞祔之祭皆有

鼎俎  
天官

### 右朔月月半殷奠

小宗伯及執事祗葬獻器遂哭之卜葬兆甫窆亦如之

窆昌絹反李依杜呂銳反鄭音穿兆墓塋域甫始也鄭讀窆為穿杜讀窆為甍謂葬穿壙也 疏曰亦如上

獻明器哭之但明器材哭於殯門外此卜葬地在壙所則哭亦與在殯所哭之相似故云亦如之春官

冢人掌公墓之地辨其兆域而為之圖先王之葬居中

以昭穆為左右

公君也圖為畫其地形及丘壟所處而藏之先王造塋者昭居左穆居右夾處

東西疏曰訓公為君者言公則諸侯之通稱言居則上通天子此既王之墓域故訓為君也云圖謂畫其地及丘壟所處藏之者謂未有死者之時先畫其地之形勢豫圖出其丘壟之處也既為之圖而藏之後須葬者依圖置之也云先王造塋者但王者之都有遷徙之法若文王居豐葬於畢即是造塋者子孫皆就而葬之即以文王居中文王第當穆則武王為昭居左成王為穆居右康王為昭居左昭王為穆居右已下皆然至平王東遷死葬即又是造塋者子孫據昭穆夾處東西若然兄死弟及俱為君則以兄弟為昭穆以其弟已為臣臣

子一列則如父子故列昭穆也但置塋以昭穆夾處與置廟同也

凡諸侯居左右以前

卿大夫士居後各以其族

子孫各就其所出王以尊卑處其前後而亦併昭穆併

薄冷反

疏曰言凡者非一以其王之子孫皆適為天子庶為諸侯先王子孫為畿內諸侯王朝卿大夫士死

者則居先王前後之左右諸侯言左右卿大夫士下云各以其族互相通也注言子孫者據造塋者所生為子

已後左右王之所生累世皆是孫言以尊卑處其前後者尊謂諸侯卑謂卿大夫士云亦併昭穆者謂兄弟同

倫當昭自與昭併當穆自與穆併不謂昭穆併有也

凡死於兵者不入兆域

戰敗無勇

投諸塋外以罰之

疏曰曲禮云死寇曰兵注云當饗祿其後即下文云凡有功者居前是也此是戰敗故投

之塋外

凡有功者居前

疏曰云居前者則不問為諸侯

與卿大夫士但是有功則得居王墓之前以表顯之也此則曲禮云死冠曰兵兼餘功若司勲王功事功國功之等皆是也上云諸侯居左右已前即是昭居左穆居右今云昭穆之中央謂正當王冢前由其有功故特居中顯異以爵等為丘封之度與其樹數

別尊卑也王公曰丘諸侯曰封

漢律曰列侯墳高四丈關內侯以下至庶人各有差別彼列反疏曰雖云度與樹數天子已下無差次之文注云別尊卑尊者丘高而樹多卑者封下而樹少故云別尊卑也鄭知王公曰丘諸臣曰封者此無正文爾雅云土之高曰丘高丘曰阜是自然之物故屬之王公也聚土曰封人所造故屬之諸臣若然則公中可以兼五等也鄭引漢律者周禮丘封高大喪既有日請度甫下樹木之數無文以漢法況之也

大喪既有日請度甫

窆遂為之尸

度待洛反甫始也請量度所始窆之處地為尸者成葬為祭墓地之尸也鄭司農

云既有日既有葬日也始窆時祭以告后土冢人為之尸疏曰大喪謂王喪有日謂葬日天子七月而葬葬用下句云請度甫窆者謂冢人請於冢宰量度始穿地之處也言遂為尸者因事曰遂初請量度至葬訖祭墓故冢人遂為尸也先鄭以遂為之尸據始穿時祭墓地冢人為之尸後鄭據始穿無祭事至葬訖成墓乃始祭墓故冢人為尸不從先鄭者據小宗伯成葬而祭墓為位則初穿地時無祭墓之事然引之在下者小宗伯雖無初祭墓之事亦得及窆以度為丘隧隧義道也度丘通一義故引之在下及窆以度為丘隧與義道廣袤所至窆器下棺豐碑之屬喪大記凡封用綈去碑負引若封以衡大夫以咸去起呂反咸又作緘同古咸反疏曰上經已甫窆此經復云及窆者此更本初欲窆之時先量度作丘作隧道之處廣狹長短故文重耳鄭案僖二十五年左傳云晉文公請隧不許則天子有隧諸侯已下有義道隧與義異者隧道則上有負土謂若鄭

莊公與母掘地而相見者也。美道無負土，若然，隧與美別。而鄭云曰：美道者對則異，散則通。故鄭舉美為况也。

凡諸侯及諸臣葬於墓者，授之兆。

疏曰：上文惟見王及子孫之墓地，不見同

姓異姓諸侯之墓地，故此經摠見之。若然，此墓地舊有兆域，今新死者隨即授之耳。

同上 葬於

北方北首。

疏曰：言葬於北國及北首者，鬼神尚幽闇，往請幽冥故也。殯時仍南首者，孝子猶若其生

不忍以神待之。 檀弓

龜人若有祭事，則奉龜以往，喪亦如之。

疏曰：喪謂卜葬宅及日皆亦奉龜往卜處也。 春官

大卜凡喪事命龜。

重喪禮次大祭

祀也。士喪禮則筮宅卜日，天子卜葬兆。凡大事大卜陳龜貞龜命龜，眡高其他以差降焉。 疏曰：天子卜葬日

與士同其宅亦卜之，與士異孝經云：卜其宅兆亦據大夫已上。若士則筮宅也。云凡大事大卜陳龜貞龜命龜。

視高者據此大卜所掌皆是大事故大卜或陳龜或貞  
龜或視高其他以差降者更有臨卜已下至作龜官之  
尊卑以次為之  
是也  
春官

大夫卜宅與葬日有司麻衣布衰布

帶因喪屨緇布冠不跣占者皮弁

有司卜人也麻衣白布深衣而著衰焉及

布帶緇布冠此服非純吉亦非純凶也皮弁則純吉之  
尤者也占者尊於有司卜求吉其服彌吉大夫士朔服  
皮弁疏曰大夫卜宅謂葬地大夫尊故得卜宅并葬  
日有司謂卜人麻衣謂白布深衣布衰謂麤衰也皇氏  
云以三升半布為衰長六寸廣四寸綴於深衣前當脅  
上云又有負版長一尺六寸廣四寸布帶以布為帶因  
喪屨謂因喪之繩屨緇布冠不跣者以緇布為冠不加  
緇此服非純吉亦非純凶也者謂麻衣白布深衣十五  
升是吉布衰是凶布帶亦凶緇布冠是吉不跣亦凶故  
云非純吉亦非純凶然緇布冠古法不跣今特云緇布

冠不縫者以後代緇布冠有縫此以凶事故不縫云皮弁則純吉之尤者也者以上麻衣緇布冠雜有吉禮此皮弁是純吉尤甚者云卜求吉其服彌吉者解用皮弁之意云大夫士朔服皮弁者於諸侯是視朔之服於天子是視朝如筮則史練冠長衣以筮占者朝服

朝直遙反筮

者筮宅謂下大夫若士也筮史筮人也長衣深衣之純以素也長衣練冠純凶服也朝服純吉服也大夫士日朝服以朝也疏曰如筮者下大夫及士不合用卜故知用筮也卜時緇布冠麻衣布衰雜以吉凶之服如筮則練冠長衣以筮輕故用純凶服也卜重故占者皮弁筮輕故占者朝服注云長衣深衣之純以素也者長衣深衣其制同凶時深衣純以布上經麻衣深衣亦純以布此經長衣則布衣純之以素也練冠是小祥以後以練為冠都無吉象故云純凶服云大夫士日朝服以朝也者謂緇衣素裳諸侯每日視朝之服案士喪禮云族



長涖卜及宗人吉服鄭注云吉服玄端也此占者朝服者彼謂士之卜禮故占者著玄端此據筮禮故占者朝服案士虞禮注云士之屬吏為其長帛服加麻此史練冠長衣者此經文含大夫其臣為大夫以布帶繩屨故史練冠長衣若士之卜史當從帛服不得練冠長衣也

雜記

大夫之喪大宗人相

小宗人命龜卜人作龜

相悉亮反

卜葬及日也相主

謂揚火灼之以出兆疏曰大夫謂卿也明卿喪用人及卜之法也大宗謂大宗伯也相佐威儀小宗謂小宗伯也命龜謂告龜道所卜之辭也卜人亦有司作謂用揚火灼之也並皆有司也皇氏云大小二宗皆並是其君之職來為喪事如司徒旅歸四布是也故宗伯肆師云凡卿大夫之喪相其禮鄭注知卜葬及日者以文承上大夫卜宅與葬日之下故知此經是上大夫之卜葬宅及日也

雜記

龜人下卜而凡四事皆卜葬日

欽定四庫全書

儀禮經傳通解續

九上

右卜宅

周公在豐

致政老歸

將沒欲葬成周公薨成

王葬于畢

尚書

又案尚書大傳曰周公生欲事宗廟死欲聚葬於畢畢者文王之墓地

故周公死成王不葬於周而葬之於畢

太公封於營丘比及五世

皆反葬於周

詳見喪禮義

成子高寢疾

成子高齊大夫國成伯高

父慶遺入請曰子之病革矣如至乎大病則如之

何

觀其意革急也

子高曰吾聞之也生有益於人死不害

於人吾縱生無益於人吾可以死害於人乎哉我

死則擇不食之地而葬我焉

不食謂不壘  
耕壇弓

公叔

文子升於瑕丘蘧伯玉從

二子衛大夫文子  
獻公之孫名拔

文子

曰樂哉斯丘也死則我欲葬焉蘧伯玉曰吾子樂

之則瑗請前

刺其欲害人良田  
瑗伯玉名同上

虞人致百祀之木可以為棺槨者斬之不至者廢其祀

勿其人

勿勿粉反徐忘粉反  
畿內百縣之祀也

疏曰謂王殯後事也百祀  
虞人掌山澤之官百祀

者於畿內諸臣采地之祀言百者舉其全數也既殯旬  
而布材故虞人斬百祀之木可以為周棺之槨者送之  
也必取祀木者賀瑒云君者德著幽顯若存則  
人神均其慶沒則靈祇等其哀傷也

檀弓

柏槨以

端長六尺

以端題湊也其方蓋一尺

疏曰柏椁者謂

也鄭注方相職云天子椁柏黃腸為裏而表以石焉以  
端者端猶頭也積柏材作椁並葺材頭也故云以端長  
六尺者天子椁材每段長六尺而方一尺注云以端者  
以此木之端首題湊嚮內知其方蓋一尺者以庶人四  
寸之棺五寸之槨厚於棺一寸案喪大記君大棺八  
寸君謂諸侯則天子之大棺或當九寸其槨厚一尺故  
云其方蓋一尺則槨之厚也如鄭此言槨材並皆從下  
壘至上始為題湊湊嚮也言木頭相嚮而作四阿也如  
此乃得槨之厚薄與棺相準皇氏以為壘槨材從下即  
題湊槨六尺與槨全不相應又鄭何云其方蓋一尺皇  
氏之義非檀弓

君松椁大夫柏椁士雜木椁

檀謂周棺者

以端長六尺夫子制於中都使庶人之椁五寸五寸謂  
端方也此謂尊者用大材卑者用小材耳自天子諸侯

卿大夫士庶人六等其棺長自六尺而下其方自五寸而上未聞其差所定也抗木之厚蓋與椁方齊天子五重上公四重諸侯三重大夫再重士一重疏曰此明所用棺木不同君松椁者君諸侯用松為椁材也盧云以松黃腸為椁庾云黃腸松心也大夫柏椁者以柏為椁不用黃腸下天子也士雜木椁者士又卑不得同君故用雜木也庶人之椁五寸五寸謂端方也者每段厚薄廣狹五寸也端頭也謂材頭之方天子長六尺謂尊者用大材庶人方五寸是卑者用小材未聞其差所定也者天子既六尺而下未知諸侯卿大夫士庶人節級之數庶人自五寸而上未知士及大夫卿與諸侯天子差益之數故云未聞其差所定抗木之厚蓋與椁方齊者以椁繞四旁抗木在上俱在於外故疑厚薄齊等云天子五重以下者據抗木之數言之故禮器天子五重八翼是也每一重縮二在下橫三在上故既夕注云象天三合地二也

棺椁之間君容祝

大夫容壺士容甒

祝

祝冒六反疏曰君容祝者祝如漆甯是諸侯

間可以藏物因以為節

棺槨間所容也若天子棺槨間則差寬大故司几筵云柏席用桂玄謂柏槨字摩滅之餘擲席藏中神坐之席是也諸侯棺槨間亦容席故司几筵云柏席諸侯則紛純稍狹於天子故此云容祝大夫容壺者壺是漏水之器大夫所掌甒盛酒之器士所用也君裏槨虞筐大夫不裏槨士不虞筐裏槨之物虞筐之文未聞也喪大記

右井槨 顧命越七日癸酉伯相命士須材

詳見陳寶

器條下

宋元公卒槨有四阿君子謂華元樂舉於

是乎不臣

詳見定條

晉魏舒合諸侯之大夫于狄泉

將以城成周魏獻子屬役於韓簡子及原壽過而

田於大陸焚焉還卒於甯范獻子去其柏椁以其

未復命而田也

范獻子代魏子為政去其柏椁示貶之定公元年春秋左氏傳

昔者夫子居於宋見桓司馬自為石椁三年而

不成夫子曰若是其靡也死不如速朽之愈也

詳見

士喪禮

小宗伯王崩及執事祇葬獻器遂哭之

執事蓋梓匠之屬至將葬獻明

器之材又獻素獻成皆於殯門外王不親哭有官代之疏曰檀弓云既殯旬而布材與明器云執事祇葬獻

器遂哭之謂獻明器之時小宗伯哭此明器哀其生死異也將葬獻明器之材者見士喪禮云獻材于殯門外西面北上綯主人徧視之如哭樽獻素獻成亦如之注云形法定為素飾治畢為成是其事也云主不親哭有官代之者決士喪禮主人親哭以其無官今王不親哭以其有官有官即小宗伯哭之是也後陳明器一條並此條通用當互考

### 右獻明器

天子崩七月而葬諸侯五月而葬大夫三月而葬

禮器

士三月而葬是月也卒哭大夫三月而葬五月而卒哭

諸侯五月而葬七月而卒哭

尊卑恩之差也 疏曰大夫以上葬與卒哭異月者



以其位尊念親哀情於時長遠士職卑位下禮數未申  
故三月而葬葬罷即卒哭 雜記 卜宅條內有龜人  
大卜而下四事並 此條通用當互考

右卜葬日 隱公三年葬宋繆公葬者曷為或日

或不日不及時而日渴葬也 渴喻急也乙未 不及

時而不日慢葬也 慢薄不能以禮葬也 過時而日

隱之也 隱痛也痛賢君不得以時 過時而不日謂


之不能葬也 解緩不能以時葬夏 當時而不日正

也 當丁浪反又如字下同 當時而日危不得葬也

公羊傳

宣公八年葬敬嬴禮卜葬先遠日辟不懷

也左氏傳



儀禮經傳通解續卷五